
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<http://books.google.com>





A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>

BIBLIOTHECA S. J.


Maison Saint-Augustin

ENGHIEN

1F 194 / 1



Ch. Wery fecit



1771

10.5

DES AM

294.

五

DISCOVRS
SVR L'HISTOIRE
DV ROY CHARLES

VII. IADIS ESCRIPTE

par Maistre Alain Chartier
son Secretaire.

OV SE PEVT VEOIR,

Que Dieu iamais n'abandonna ceste tres-Chre-
stienne invincible Couronne en ses plus fort
deplorablez affaires : & que tout ce que ses plus
coniuerez ennemis ont onques voulu entre-
prendre, s'est en fin comme en moins de rien
dissipé, & esvanoüy en fumee.

*Peruerse engeance de Babylone, heu-
reux celuy qui te pourra rendre la
pareille des maux que tu nous
as voulu brasser.*

PSEAVME CXXXVI.

CIO IO XCHII.





N T R E tant de diuerſes ſortes d'eſcripre où les gens de lettres aient onques voulu employer leur eſtude, l'hiſtoire ſans aucune contradiction, comme la plus vtile & neceſſaire pour le cours de la vie humaine, a tousiours obtenu le premier & principal lieu, apres les eſcriptures ſainctes. Les cinq liures meſmes de Moyſe qu'eſt-ce autre choſe qu'une pure ſuite d'hiſtoire, où ſous le voile d'une continuee narration par ordre de temps, de choſes veriſablement aduenues ſelon la lettre, ſont adōbrez les plus haults & ſacrez myſteres de noſtre religion & creance? Ceux en apres de Ioſué, & des Iuges, des Roys, & leur ſuite, voire la pluſpart du vieil & nouveau Teſtament, ne ſont-ce pas toutes hiſtoires enrichies de fort beaux enſeignemens & preceptes de tout ce qui peut appartenir à l'adminiſtration & condui-

A ij

ête des Royaumes, Republicques, & autres souuerains Potentats qui ont le maniement des peuples? dont à bon droit ils sont appelez pasteurs par Homere, parce que c'est à eux à les gouverner, garder, conseruer, non d'autre sorte qu'un soigneux & vigilant berger fait son troupeau, qu'il doit mener à la pasture hors du danger des loups, & autres bestes raiuissantes, & de tous autres inconueniens, entant qu'à luy est: ce qui nous represente proprement l'image & portraict d'un bon Prince, lequel ne se propose pas que ses subiects soient faicts pour luy, ny pour ses vouldoirs & plaisirs, mais luy pour eux, & pour leur benefice & soulagemēt: parquoy il ne les doit pas escorcher de subsides & de charges defraisonnables, ains les tondre moderement: & encore ce qu'il en tire, ne l'employer pas en ses luxes & voluptez, ny à des pompes & magnificences vaines, inutiles & transitoires, qui ne seruent qu'à tarir la bourse; dont puis-apres il est contrainct de se desborder à des concussions tortionnaires & tyranniques; ains pour le bien & vtilité du publicq; tout ainsi que le

sang d'un cheual forbeu à luy en faire
 vne charge & medicament qui le ralle-
 ge de son mal, & au reste, comme dit
 fort bien Aristote en ses politiques,
 exercer les siens, les faire viure & ad-
 dresser en toutes sortes de vertus, &
 de bonnes mœurs; en pieté, deuotion,
 modestie, sobriété, continence & iu-
 stice, dont il leur doit luy-mesme tracer
 le chemin: car les Princes rendent les
 vertus aisees (dit Chrysostome) y in-
 uitans par leur exemple les debonnai-
 res & dociles, & contraignans les con-
 tumaces & deprauez par menaces &
 chastiemens à les imiter. La gloire ou-
 tre plus & honneur d'un Roy ou autre
 Prince souuerain, consiste en premier
 lieu en l'observation de la religion, &
 en ses vertueux & louables comporte-
 mens: & consequemment au bon or-
 dre, reglement & police de son estat,
 affin de le repurger le plus qu'il pourra
 de tous vices & deprauations, & que
 tout y abonde en paix & repos: que le
 peuple s'y accroisse & multiplie, suiuant
 ce que met le Sage, *La dignité du Roy est
 en la multitude du peuple, & la honte du*

A iij

Prince consiste au petit nombre de ses subiects. Car les Rois furent premierement establis pour garentir ceux qui se soubsmettoient à eux volontairement, des violences & oppressions des plus forts, tant estrangers, que leurs propres concitoiens, la plus part du temps plus dommageables & pernicieux aux leurs propres, que ne sont les autres.

Tout cela se peut voir és histoires, mesmement és Sainctes ; qui nous apprennent d'abondant à cognoistre Dieu ; en le cognoissant, à l'aimer, & en l'aimât, à le respecter & craindre de l'offenser, & de luy desplaire : à peu pres ce qui est cōpris en ceste tant belle & riche sentence royale, *Servir à Dieu, est vraiment regner*. Si que ceux qui ont voulu suivre & tenir ceste droite route, selon que le Psalme le leur remarque, *Le sceptre de ta royauté soit de droicte & equité*, ont passé leurs iours en toute benediction & repos, avec vne fin correspondante à leur bonne & louable vie : là où les iniques & peruers, qui mesprisans Dieu & ses ordonnances, & foullans aux pieds tout droict & deuoir, se sont laissez precipi-

ter aux excez & desbordemens , n'ont gueres failly de rencontrer vne infortune & tragique issue , sans rien laisser de leur memoire qu'une tresmauvaise & infecte odeur , d'eux , & de leurs actions , & vne detestable ombre de nom , qui pour le surplus s'est esteint & enseuely avec eux dans le profond gouffre d'une oubliance perpetuelle, fors que de leurs mal-versations & forfaits; l'une des choses que tous cueurs bien nais doiuent autant abhorrer , que de s'en aller de ce monde, tout ainsi qu'un coup d'escoppette , ou autre tel son esclattant , qui ne laisse apres soy rien de marque , ains disparoist , & se perd viste comme la veue d'un esclair ; ce à quoy a voulu battre le Pseaume 9. pour vne des maledictions de ce monde , *Periit memoria eorum cum sonitu.*

M A I S l'histoire est celle qui nous en peut guarentir , & nous faire à iamais reuiure apres nostre mort , comme à fort bien dict vn de nos Italiens modernes, *Trabe l'huomo del sepolchro , e in vita il serba.* Et bien plus splendidement Ciceron encore en son Orateur , où il

A iiij

l'appelle , Tres-fidelle tesmoin , & records des temps , claire lumiere de la verité , vne vie de la memoire , soigneuse maistresse & regente de la vie humaine , & messagere iuree de l'antiquité. Car nous y pouuons veoir le bien & le mal , qui succedent communement pour se bien ou mal gouverner ; les causes & occasions de l'un & de l'autre , avec leurs euenemens & remedes : & en somme vn vray exemplaire & image de toutes les actions des hommes , & les moyens qu'il y a de les contenir en paix & repos , vnion & accord les vns enuers les autres : Dont rien ne sçauroit estre (dit le mesme Cicerō fort Chrestienement) de plus cher & recommandable à ce grand & souverain Monarque de l'univers , qui a faict toutes choses pour l'homme , & les hommes les vns pour les autres , si que ceux qui s'esuertuent par effect de rendre les autres meilleurs , & plus vertueux , & par consequent plus vtils à la chose publique , leur tiennent lieu d'un autre Dieu.

Ces tant beaux admōnestemens doncques & fructueuses instructions pour leur conduite & direction , prouenants

de la lecture des histoires, tous les Roys & Princes terriens les deuroient auoir à toutes heures deuant les yeux, *Nocturna versare manu, versare diurna*, pour en perceuoir le fruit qui y est compris és clairs exemples qu'elles leur tracent & representent de bien & legitiment regner: & les maux au contraire, les dangers & inconueniens qu'ils encourent en se foruoiant hors du droit chemin d'une deuee administration. C'est vn bien grand heur d'autre part, & pleniere beatitude à vn peuple, dont il doit bien rendre graces à Dieu: car cela n'arriue pas tous les iours, de se rencontrer sous vn bon, sage, & valeureux prince, ententif & versé aux affaires de son Estat, qui aime ses subiects, les soulage, supporte, & garde d'oppression, en leur administrant iustice: & surtout, qu'il n'oye point par les oreilles, ny ne voye par les yeux des autres, car il n'y a rien de plus dangereux, ains y applique les siens propres: *Mais qui est celuy là, afin que nous luy en donnions louange?* certes bien mal-aiseement se trouueront tant de bones & louables parties en vn seul subiect, mesmement où il y a tant de licence de

tout faire à son appetit & vouloir, tât de
 flatteries, menfonges, vanitez, & desgui-
 semens, qui ne luy permettēt pas de
 iouir de sa preud'hommie & integrité, &
 si fort peu souuent il arriue que plusieurs
 bons & vertueux Princes s'entresuiuent
 immediatement, & succedent les vns aux
 autres, qu'il n'y en ait de mal condition-
 nez entre deux. Iules Cesar qui le pre-
 mier par sa vaillance empieta la Monar-
 chie Romaine, fut belliqueux plus que
 nul autre. Octauian Auguste son succes-
 seur, vn tresbon & très-heureux Prince,
 sage, moderé, & d'un naturel pacifique.
 Tibere, cault, preuoiant, & aduisé, mais
 malin, felon, sanguinolent, seuer, & tres-
 malaisé à cognoistre. Caligule meschant
 tout outre. Claudius, idiot, hebeté, se lais-
 sāt manier à ses femmes, & domestiques.
 Neron, le cōble de tout vice & meschan-
 ceté: soubs Galba, Othō, & Vitellius tout
 alla sen dessus dessous. Vespasian, & son
 fils, Titus, deux tresbons & vtils admini-
 strateurs du publicq, qui en peu de temps
 reſtablirent les choses en leur entier. Do-
 mitian, des pires en toutes sortes de mau-
 uaistiez & felonies. Trajā, tres-bō & tres-
 vaillāt Empereur. Adriā, meſlé de l'un &

de l'autre, de vertus & d'imperfections. Antonin, la pieté mesme. Marc Aurele, vn vray parangon de iustice, prudence, prud'homie, & reformation de mœurs, Commodus son fils, tout le reuers de la medaille, vn magazin de vices & desbordemens. Septimius Seuerus, tres-valeureux Prince, mais vn peu enclin à la cruauté: son fils Caracalle, vn vaut-rié, perdu apres toutes sortes de lubricitez. Macrin son Connestable & meurtrier, vn traistre & perfide vsurpateur, avec son fils de mesme farine, à peine eurent-ils le loisir de mōstrer au mōde quels ils estoient. Helio-gabal, vn vray mōstre, vne tres-orde & infecte cloaque de toutes les plus detestables vilenies & desbordemens. Alexādre Seuer, vn tres-accōply exemplaire de vertu & integrité. Et ainsi des autres, entre deux vertes vne meure: entre deux mauuais la pluspart, vn passable, à guise d'une fiebure intermittente.

Mais pour nous approcher de nostre histoire, le Roy Iean fut d'un cœur noble & genereux, esloigné de toute dissimulation & feintise, & au surplus infortuné. Sō fils Charles V. à bon droit surnommé le Sage, bon mesnager, prouident, & fort

aduifé. Charles VI. fon fils, aliené de fon bon fens la pluspart des quarante deux ans qu'il regna, durant lesquels ce royaume souffrit de merueilleuses desolations pour les partialitez de la maison de Bourgoigne, enuers cellé de France, nonobstant que toutes deux vinssent d'un mefme eftocq, lesquelles ont tousiours depuis duré. Car ces derniers troubles qui ont rauagé cest Estat, autāt & plus cruellement qu'il fut oncques, ne font autre chose que les reliquats du leuain des haines & rancunes inueterées de ces deux familles, dont tout ainfi que le ferment enfle & lousleue la pafte, en semblable leurs querelles, animofitez & diffentions, ne voulans de rien ceder l'une à l'autre, ont de longue main excité de grandes combuftions & ruines, dont toute la Chrestienté s'est sentie. Et semble proprement que ce foit l'inimitié & debat d'Esau contre fon frere Iacob, lequel s'estant formé au ventre de leur mere, perseuera tousiours depuis, d'Edō à ſçauoir le rouge, contre le blāc & candide Ifrael, & de là en auant s'estendit des Idumeens contre la pofterité de Iudah: qui est l'i-

mage du divorce & rancune des Espagnols descēdus des Idumeens enuers les François, qui representent le royaume de Iudah. Car ces deux puissantes maisons n'ont pas en vain chargé ces deux liurees, en quoy il y a de grands mysteres cachez là deffoubs : Ce que n'ot pas mesme oublié les Romans de la table ronde, de ces deux dragons blanc & rouge des-
emprisonnez par Merlin, au tēps du Roy Vterpandragon, pere du Roy Artus, desquels apres vn long & mortel combat, le blanc vient finablement au dessus du rouge, ce qui denotoit de grandes choses aduenir, portant là les predictions dudit Merlin.

TELLS dissensions au reste sont ordinaires en la nature, qui toute est remplie d'une repugnance, contrarieté & discord, dont Empedocle maintenoit que venoiet à se procreer toutes choses. Il n'y a beste, oiseau, ny poisson, qui n'ait naturellement son contraire, les herbes & autres vegetaux aussi, voire les mineraux, & semblables substances inanimees : si que tout se meine & conduit par vne antipathie, & sympathie, discorde, & concorde.

Il n'y a chose grāde ou petite qu'elle soit, qui n'ait deux genies ou intelligēces, qui cōtinuellemēt luy assistēt, l'une à dextre, l'autre à senestre, l'une propice & fauorable, l'autre contrariante, & son aduersaire. Ce qu'a voulu denoter Homere au 20. de son Iliade, par ce gros conflict des dieux & deesses là haut au ciel, où ils se bandent & partialisent, les vns en faueur des Grecs, & les autres pour les Trojans. Mais Isaie à ce mesmes propos avec plus d'autorité & creance: *Il aduendra qu'en ce iour là le Seigneur visitera l'armee du ciel, laquelle est en haut, sur les Roys de la terre, qui sont en la terre.* Si que rien ne se meut, ny fait icy bas, qu'il ne soit premierement meu & esbauché du ciel, ou puissances celestes, & le ciel de la diuine preordonnance au monde intelligible, que l'Apostre appelle le troisieme ciel, où il fut rauy. Et au 10. de Daniel, l'Ange Gabriel ne combat-il pas par 21. iours l'esprit qu'il appelle le Prince des Perses, sans en pouoir venir à bout que le S. Archange Michel ne fust arriué à son aide? De là proce dēt les maintenemēs & dures des Roy-

aumes, des citez, Repub. & potētats: leurs progrez & accroiffemens, & en fin leurs decadences & ruines. Ainsi les Medes & Perſes renuerſerēt l'Empire des Aſſyriens, les Grecs, celui des Perſes, & les Romains, celui des Grecs, qui fut la quatriefme des Monarchies annoncees par Daniel, apres laquelle n'en faut plus attendre que celle qui és derniers iours ſe viendra rasſembler de toutes les nations de la terre ſous l'vniuerſel ſouuerain Monarque, le MESSIHE noſtre Sauueur & Redempteur, *A qui Dieu ſon pere a donné toute authorité & puiſſance tant en la terre comme au ciel: & aux Roys d'icy bas chacun en ſon endroiſt ſoubs luy, pour y dominer ſur les peuples à eux commis, ainſi que ſes lieutenans generaux, non reſponſables les vns aux autres, ny à autre qu'à luy ſeulement, iuſqu'à ce que tous ſoyent reduiſts en vn meſme parc, ſous vn ſeul paſteur, pour de là mettre fin à toutes choſes temporelles. Parquoy bien en vain aſpirent à ceſte vniuerſelle Monarchie, ceux qui s'attendēt d'y paruenir, & encore par de petites*

subtilitez, par leurs ruzes & fraudes Pu-
 niques, masquées d'un zele de la Religio
 Catholique, dont de leur autorité pri-
 vée ils s'vsurpent le tiltre de protecteurs,
 & s'en constituent les arcboutans & es-
 tançons, comme s'il n'y auoit autres que
 eux qui la peussent garentir & garder de
 s'afaisser & venir à bas. C'est vne nouuel-
 le milice, & maniere de conquerir sans
 coup frapper, & soubsmettre à eux tout
 le rond de la terre, nō encore pratiquee
 ailleurs, que lon sçache, si elle leur pou-
 uoit reussir, mais mal-aiseement en ces
 quartiers de par deça, contre des nations
 si belliqueuses & aguerries. Ce que les
 Anglois entreprendrent iadis sur nous,
 comme on peut voir en ceste hystoire, fut
 à force ouuerte, & de vaillās hōmes, d'v-
 ne braue & genereuse hostilité legitime,
 où il y eust infinis beaux faicts d'armes
 d'une part & d'autre, dignes d'une per-
 petuelle recommandation & louange,
 escarmouches, rencontres, batailles, sie-
 ges & assaux de villes, duels, & autres si-
 gnalez exploits belliques : & ce par de
 longues suites d'annees, passans à tous
 propos la mer sur nous, & nous fort
 rarement

raremēt sur eux ; cōtens que nous estions de nos limites en terre ferme , sans nous aller encoffrer en des isles, qui seroit plustost se restraindre que s'elargir. Mais ces nouueaux conquerans de l'autre monde veuillent tout tirer à des pratiques , negociations & menees ; à des cautelles & astuces ; mal considerans qu'il y a plus de peaux de Renards chez les pelletiers, que de loups ceruiers , & de chats sauuages, qui ont les dents , & les griffes plus accrees. Tout leur faiēt depuis la mort de l'Empereur Charles le Quint, Prince certes fort belliqueux , & dont on ne scauroit parler qu'avec beaucoup de loüange , se peut dire auoir esté , & à ceste heure plus que iamais , vn vray trafficq & chippoterie, tel que de banquiers qui ont donné du nez à terre , & taschent de se releuer ; vne vraye bourse d'Anuers toute espuisee & applatie ; vn changē de Lyon renuerſé cen dessus dessous ; vn *banqui* de Rome tout saphrané ; & vn mont de Gēnes explané à fleur de terre. Ce n'est pas vne batterie directe dont ils procedent pour faire bresche à vn pan de cortine, les flancs leuez , & apres venir courageu-

B

sement à l'assault ; ains vne mine clandestine pardeffous terre comme blereaux : & si veullēt nonobstant tout cela se porter pour les plus vaillās guerriers de tous autres. Combien plus magnaniment le bō Ennius fait parler ce valeureux Roy des Epirotes Pyrrhus, lequel apres deux grosses victoires obtenues sur les Romains , leur enuoye tenir ce langage , sur quoy se deburoient reigler tous ceux qui veulent faire profession des armes.

*Haud cauponantes bellum , sed belligerantes,
Ferro, non auro, vitam cernamus Vtrique,
Vos ne velit, an me, regnare hera, quid vef-*
rat fors,

Virtute experiamur.

Il ne nous faut point , ce dit-il , maquignonner , tauerner ne chiquaner la guerre ; c'est vne trop digne & sacree chose pour des gens de cœur ; ains la demesler entre nous en hardis & vaillans combattans, à la poincte de l'espee, avec l'acier & le fer , & nompas avec l'or & l'argent ; par de petites corruptions & donnees de deniers aux subiects naturels des Princes, pour les leur suborner & soubstraire hors de leur fidelité & deuoir , affin d'empiet-

ter frauduleusement leur estat, en leur proposant vn siecle doré deffoubs eux, au lieu de celuy de fer où ils souloient estre, vn parfait repos & consolation de leurs consciences; vne celeste Hierusalē qu'ils leur veulent bastir icy bas, pour y resider en tout aise & contentement tant du corps que de l'esprit, & vne pleniēre abondance de biens: Mais ils trouueroient en fin que ce seroit la fable de l'oïseleur d'Esopē; lequel tendant ses gluaux & filets pour y attraper les petits oyseaux, cōme le Merle, qui l'obseruoit de loing, luy eust demādē, qu'il faisoit là: Le fonde, dit-il, vne belle grosse cité pour vous autres les plus dignes & excellens animaux de tous; affin que vous vous y puissiez retirer en ioye & repos, & à sauueté de vos aduersaires; & là dessus le pauvre mal-aduisé Merle s'en estāt cuidé approcher, ne se donna garde qu'il se trouua pris. Ha, dit il lors, Mōsieur le gentil fondateur de villes, vous en auez beau edifier tant que vous voudrez de semblables (ces gēs icy nos bons voisins, & oïseurs appellent cela *poblar*, par vne antiphrase, car tout leur faict n'est q̄ de despeupler & destruire:

B ij

mais si lon me veut croire, vous ne trou-
 uerez gueres d'habitans pour y mettre.
 Ainsi est-il de vous autres zelez prote-
 cteurs de la religion Catholique. Certes
 vous voudriez volontiers veoir tout ce
 beau Royaume, qui vous est vne mailhe
 en l'œil, cōme souloit estre iadis l'isle d'E-
 gine au port du Piree, abysmé en vne mer
 morte dont il ne fut iamais nouuelles : &
 diriez ainsi que Fimbria ; lequel ayant
 appellé Sceuole en iustice, cōme on luy
 demanda ce qu'il vouloit à vn si preu-
 d'hōme, ne ce qu'il pouuoit auoir à dire
 contre vn si saint & innocent personna-
 ge : De ce, respondit il, qu'il n'a receu à
 trauers le corps le coup de dague que ie
 luy auois donné. De mesme vous plai-
 gnez vous de nous, que nous ne nous
 rendons vos esclaués, & ne vous tendōs
 liberallement les mains pour les lier &
 garotter, maintenant que vous voiez bié
 que vous ne sçauriez pas venir à bout de
 vos cauteleuses attentes ; de l'annexer à
 vos coronas. C'est vn trop gros morceau
 pour vo°, & difficile à aualer ; plustost vo°
 en estrāgleriez vo° : & quād vous l'auriez
 dans l'estomach, si ne le pourriez vous

digerer : car vous n'avez pas icy affaire à de pauvres sauvages tous nuds , q̄ vos dogues & Alans tournoient en fuite d'arriere avant que de venir aux mains : Vous avez rencontré forme & chaussure à vostre pied , d'aussi mauuais garçons que vous; non sous vn Atabaliba, où Mottezuma, ains sous vn chef & capitaine que vous avez tousiours redoubté plus que la foudre; comme celuy dont il semble qu'un de vos Poëtes aye voulu publier ce bel eloge soldatesque;

La guerre est ma patrie,

Mon harnois, ma maison;

Et en toute saison

La suiure, c'est ma vie.

Ce que met aussi Cicéron en ses Tusculanes de la tolérance & endurcissement des anciens legionnaires Romains, se peut à bon droit approprier & à luy & à ses soldats. *Voiez combien grand & laborieux est l'endurcy exercice & travail de nos gens de guerre. Porter sur eux à manger pour quinze iours : porter ce dont ils peuvent auoir besoin pour leur usage; avec deux grands pieux pour la pallissade servant de parapet au rempar. Car pour le regard de leurs grands rouda-*

B iij

ches , & leurs si pesans corcelets , brassats , morions , & larges tranchantes espees, cela ne leur couste non plus à porter parmy le faix dont ils sont chargez , que leurs espaules , bras & mains, estimans que les armes doivent estre autant de membres es combattans. Tout de mesme , aussi peu grefue à nostre preux invincible Roy vn gros corps de cuirace à l'espreuve, que sa camisolle ou pourpoint : son casquet, qu'un legier chappeau : faire des traictes de trante ou quarante heures sans demonter , que d'estre assis dans vne chaire à iouer aux eschez, ou autrement passer son temps. La campagne luy est vne belle salle, ou l'oguerie gallerie toute i'ochee de frescades. Ses plus melodieux instrumens, le son des trompettes, phifres , & tambours : le hennissement de cheuaux , sa musique : ses banquets, vn morceau de iambon, & de viande froide en passant chemin, & boire à mesme la bouteille du premier venu , & le plus souuent de l'eau pure : Toutes ces austerez militaires accompagnees d'un telle affabilité & douceur, mais assistees quant & quant d'une Royale Majesté où il est requis, qu'à peine tant de rares & excel-

lentes parties se pourroient elles retrouver chacune à part en plusieurs personnes seules, non qu'en vn seul Prince.

M A I S pour reprendre les brisées de nostre histoire, dont nous nous sommes destournez par ceste assez longue digression, le Roy Charles V I I. assoupist comme en moins de rien les alterations de son Royaume, & y pacifia toutes choses, qui s'ameliorerent encore, tousiours allés de bié en mieux, sous son successeur Loys X I. Celui qui selon le dire commun mit nos Roys hors de page. Et de là consecutiuelement sous Charles V I I I. qui alla en propre personne conquerir le Royaume de Naples, comme Loys X I I. fit le Duché de Milan. Tant que finablement ceste tres-Chrestienne inuincible corone paruinist à sa plus grâde splendeur qu'elle n'auoit point encore esté, sous François premier, pere & restaurateur des bonnes lettres, ce qui luy a acquis vne permanente eternelle memoire, avec ses beaux faicts. Apres luy vint Henry second, puis la mort duquel tout est allé de mal en pis, iusqu'à ceste heure, que par vne prouidence diuine le Royaume a changé de famil-

B iiij

le, tout ainsi que par fois pour ressiour les terres labourables ja languissantes & ennuyees de leurs accoustumees semences qu'on y a retiré plusieurs fois, on est contrainct de les leur renoueller de quelque autre endroict, mais non trop esloigné de là, & non d'un estrange climat. Le Royaume donques aiant esté par plus de trente ans entiers sans relasche si malmené de troubles & patialitez domestiques qu'onques autre n'en souffrit plus sans vne finale ruine, & ce pour ramener les choses à vn meilleur estre, & les restablir de nouveau, malgré toutes les machinations & traueses de noz plus inueterez ennemis, qui ont trouué le moié de nous diuiser & troubler par diuers pretextes & desguisemens seruans à leurs intentions alendroit de noz aueuglez, Dieu y a finalement mis la main. Car il ne faut point douter que ce dur fleau ne soit particulièrement venu de sa permission, pour nous punir de noz offences, ioint la vicissitude & continuelle revolution des choses humaines, qui ne demeurerent iamais fermes en vn mesme estat, ains ne font qu'incessamment tournoier avec le ciel. Voions

ce qu'en dit le Sage au premier de l'Ecclesiaste. *Qu'est-ce que ce qui fut iadis? - le mesme qui doit encor estre. - Quest-ce qui ia a esté fait? - Cela qui reste encore à faire. - Rien n'est nouveau sous le Soleil. Il n'y a nul qui puisse dire, - voicy ce qui est tout de neuf: - car cela s'est passé és siècles, - qui ont précédé deuant nous.* C'est ny plus ny moins que des maladies, dont les accidents peuuent bien varier selon la diuersité des temperaments & complexions des personnes, des eages, saisons, pais, & autres telles circonstances, mais l'essence du mal est tousiours la mesme. Et tout ainsi qu'Hippocrates redigea la Medecine en art & methode sur l'observation des tableaux qu'apportoient au temple d'Esculape ceux qui auoient esté gueris de leurs maladies, contenant leurs prognostiques & symptomes, leurs cours & progresz, & en somme tout ce qu'on y auoit peu remarquer, avec les regimes, les remedes & medicaments desquels on s'y estoit seruy: le semblable pouuons nous practiquer en la lecture des histoires, où voians les desconuenues des autres, les moiens qu'ils y ont tenus pour s'en

garentir, & ce qui en est en fin résulté, nous pouuons de là tirer vne instruction pour nous preualoir des exemples qui s'y trouueront le mieux correspondre, & nous en seruir au soulagement de noz maux: Car le passé nous doit seruir de precepteur pour le temps present, & le presët nous instruire de l'aduenir. Mais selon que Platon ordonne, qu'il ne soit loisible d'aller puiser chez ses voisins, auant que d'auoir fouillé sur le sien, pour voir s'il s'y pourra trouuer de l'eau, afin de n'abuser desidieusement du labeur d'autrui, & d'ailleurs que les Naturalistes tiennent, que les viandes, & les simples qui croissent au climat de nostre naissance, nous doiuent estre plus propres & connaturels, que d'autres qu'on iroit mendier au loing en pais estrange, il nous a semblé que nos histoires par consequent nous deuroient estre plus familiares & conuenables, comme domestiques qu'elles nous sont, que les externes & lointaines: & encores les plus proches de nostre temps, pourueu qu'elles se rapportent à l'estat & disposition où nos affaires se retrouuent,

que ne feroient de plus anciennes & reculees. Et de faict seroit-il possible de trouuer rien plus à propos pour vne instruction presente, que la forme de ce conseil que fait assembler le Roy Charles V I I. l'ordre & maniere qu'on y obserue à y opiner librement, & les moiens qu'on y allegue pour la pacification de l'estat, fort troublé alors ? avec plusieurs autres beaux admonnestemens & exemples dont elle est par tout surlemee , encore que le langage sente aucunement son rance & moisy, & qu'aisi que disoit Ciceron des commétaires de Cesar, tout fard & attiffement en soient hors. Car là dedans se peut voir tout ainsi que dans vn miroir , vne fidelle representation des calamitez & desolations dont ce royaume se trauaille ainsi de soymesme, à l'instigatiō de ceux qui ne veulēt que sa ruine, & qui sous leurs faux desguisez pretextes ont tellemēt seduit & charmé la plus part du fol mal-aduisé peuple , qu'il préd plaisir à mettre de sa propre main le feu au milieu , & aux quatre coings d'ice-lui qui iadis souloit estre si florissant & si redoutable à toutes autres nations,

l'une des plus fermes colonnes au reste, & solides appuis de la foy Chrestienne, contre les assaults & menaces des plus dangereux infideles : & le remplir de fonds en comble de troubles, combustions, vrolleries, brigandages, meurtres, massacres, & assassinats ; & d'irreconciliables à tout iamaïs partialitez & rancunes, si Dieu de sa grace & bonté speciale n'y met sa souueraine main, contre laquelle tous les attentats de ses creatures sont moins qu'une petite bouffée de vêt contre vn ferm'-asseuré rocher. Tout le but de ces nos mortels ennemis ne tendant en fin, qu'à empescher de tous leurs efforts, s'ils le peuuent, que cest estat ne demeure iamaïs ainsi paisiblement vnycōme il souloit estre sous vn seul Roy ; ains de tascher par tous moyens à eux possibles de le desmembrer en plusieurs petits eschantillons & parcelles diuisees les vnes des autres, pour le rendre par là plus foible & debile : ou bien d'y entretenir tousiours cest embrasement qu'ils y ont allumé, y iectans peu à peu du bois ; & cōtrepesans caultement l'aide & secours qu'ils deburont donner à leurs partisans

& fauteurs ; de sorte qu'il ne se puisse amortir ny d'une façon ny d'une autre, soit pour eux, soit pour leurs contraires, ains demeure tousiours enflambé tant que tout soit rednié en cendres, tesmoin les menaces du Legat de s'en aller , & quitter là tout si on accordoit la trefue; mais il se r'aduisa bien tost, craignant d'estre pris au mot ; & que de son absence ne s'ensuiuist vne bonne paix au lieu de ceste suspésion d'armes : car ces maddrez preuoioient bien , que si vne fois le peuple las & matté de ceste doloieuse guerre venoit à estre à l'opposite affriandé de la douceur de ce peu de relasche & repos, il ne voudroit pas aisément puis apres s'engoulpher de nouveau en ceste mer d'inquietude , en ces tormentes & miseres, qu'il a iusques icy esprouuees : n'estans pas si grossiers au reste , eux qui sont les maistres iurez de toutes ruzes & cautelles, de se mettre en la fantasie pouuoir iamaïs venir à bout de s'emparer de cest estat ; & moins encore de le posseder , & en iouir paisiblement : Mais ils apperçoient de loin que leur Roy estât fort vieil & caduc, si qu'à maniere de parler il a

defia l'un des pieds dans la fosse ; n'ayant
 qu'un seul fils tout ieune encore , flouet,
 maladif , imbecille tant du corps que de
 l'esprit, & en somme de nulle ou bien peu
 d'esperance ; le pere venant à rendre l'e-
 sprit, leur estat court un grand danger de
 prendre coup , escarté comme il est en
 tant de lambeaux , avec de si grands in-
 terualles & interruptions entredeux (vne
 vraye marquetterie ;) Tout ainsi qu'une
 voulte ou arcade , dont si la clef qui re-
 tient les coupes en subiection , vient v-
 ne fois à se desmentir & desioindre hors
 de son assiette, tout ce qui pose dessus viêt
 bien tost à bas : A peu pres ce que l'ora-
 teur Demades souloit dire d'Antipater ;
A filio putri Macedoniam pendere. Et à la
 verité nul estat ne se peut dire bien assieu-
 ré, ou il y a vne telle , & si inegalle dis-
 proportion de la vieillesse de celuy qui
 regne , & de l'imbecillité & ieunesse de
 son successeur. Eux doncques n'aians en
 ce cas rien tant à craindre de nulle-part,
 mal voulos , detestez & haïs qu'ils sont
 de toutes les nations de la terre , que de
 ceste grosse masse de Monarchie Françoisse
 pédant qu'elle sera en son entier ; qui les
 borne de toutes parts, comme elle en est
 aussi bornée, & ne s'est non seulement ga-

rentie de tous leurs plus efforcez efforts, ains a tousiours plus eniâbé sur eux, qu'ils n'ont empieté sur elle, par conséquent tous leurs proiects ne doiuent tendre durant que leur Roy est encor sur pieds, que de tâcher à nous affoiblir le plus qu'ils pourront, afin qu'iceluy decedé on n'ait si tost le moien de leur nuire, soit à force ouuerte, soit par practiques & menees à leur exemple, leur rendant la pareille de ce qu'ils nous ont voulu prester, & avec l'interest, peut estre, mais non pas si desloyalement, par la faueur que sous-main on pourra prester à ceux qui n'attendent que l'occasion de pouuoir secouer le dur ioug de leur insupportable seruitude, avec les forces, & commoditez dont cest estat ne fut onques si espuisé, qu'il n'eût eu plus que de reste, non que pour se garentir & defendre, ains entreprendre & assaillir, & en departir d'abondant à ses allies & confederez qui seroient recourus à son aide & protection. Les affaires donques des Espagnols estans en tels termes, de n'auoir qu'un fils, & encore de si peu d'attente (Ptolomee parauanture, & Cleopatra) les doit on tenir si maladeuisez qu'ils se voulussent iamais dessaisir de l'Infante, ny de consentir qu'elle sorte

d'entre leurs mains, pour la marier autre part qu'en leur propre sang, (chose à eux familiere de longuemain, de ne s'allier gueres à d'autres qu'eux, comme souloient faire les Iuifs) en danger, si ainsi estoit, de se veoir du iour au lendemain, avec leurs Royaumes, & Seigneuries, qui toutes tombent en quenouille, reduits sous la puissance d'un estranger.

M A I S pour reprendre nostre propos sur le contexte de nostre histoire, des grands moiens de cest Estat, & de ses richesses & facultez, qui ne peurét onques estre taries, non plus qu'une viue perennelle source, & de tant de commoditez qui y ont abondé de tout temps, suffisantes pour tousiours maintenir la guerre, tant en deniers, qu'en victuailles, & toutes sortes d'attirail, & de combattās tres-valeureux entre tous autres, principalement de gend'armirie, nos Annales portent qu'en vne entreueue d'un de noz Roys avec celui d'Angleterre à Pequigny, l'Anglois le voulut traicter le premier, mais ce fut avec vne telle pompe & magnificence qu'on n'en auoit point encore veu de semblable, luy faisât mōstre de ses

de ses richesses , & entre autres d'un buffet de vaisselle & de vases d'or, tous estoffez de pierreries d'une inestimable valeur , avec tout le reste de l'équipage y correspondant. Le Roy l'invita pour le lendemain, qui luy donna un fort maigre-affamé dîner , & sur la fin d'icelui, dict, qu'il luy vouloit aussi faire voir quelque chose de ses thresors , faisant là dessus abattre la muraille du pavillon , par où il luy monstra quatre mille hommes d'armes faisant le nombre de dix mille chevaux de combat, tous l'armet en teste , la lance au poing , rangez en bataille sur un riddeau qui s'estend le long de la riviè-re de Some entre Amiens & Pecquigny. Et bien mon frere (alla-il dire) que vous semble de ce buffet ? Il est beau à la verité , & fort bien garny , respondit l'Anglois, & m'en passerois biẽ à moins. Mais pour le regard de l'or & argent, qu'on lise en premier lieu ce qui est escrit de l'or Tholosan , que Strabon estend à huit & vingts cinq mille marcs d'or, & deux millions quatre cens mille marcs d'argent, ce qui monteroit à pres de trente millions d'or , gardez inutilement dans un tẽple.

C

En Pline & Plutarque on peut veoir, cōme vn Mamurra maistre des œuures de Iules Cesar. és guerres Gauloises, en huiët ou neuf ans qu'elles durerent, fit vn tel butin pour sa part, qu'à sō retour il acheta vne seule maison à Rome six cens mille escus, estant à croire qu'il n'y emploia pas tout ce qu'il auoit. Et combien y en deuoit-il auoir de plus authorisez que luy, & par consequent qui y fissent vne trop plus grosse main encore? Quant à Cesar, il s'acquitta de plus de trois millions d'or qu'il deuoit, & s'apprestoit de faire d'extremes despences à son triomphe; Mais cependant il donna au Consul Paulus neuf cens mille escus, pour ne luy estre ni cōtraire ny fauorable: Desendetta le Tribū Curion de quatorze ou quinze cens mille escus: & vne fois qu'il estoit allé faire ses visites delà les Monts, se trouuerēt à la porte de son logis à Lucques, plus de deux cēs faisseaux de verges & haches, marques & enseignes de Magistrats, qui l'estoiēt venus bien-veigner de Rome, tous lesquels avec leurs femmes & familiers remporterent de luy de fort grands presents, le tout prouenāt des despouilles de cest estat, aux despens duquel

il y entretint tousiours dix legions de gēs de pied, avec de la caualerie à l'equipolēt, sans les autres forces & frais immenses qu'une si grosse guerre requeroit ; ny en tout cela estre secouru d'un seul double du thresor publicq: & de là conséquēmēt la ciuile contre Pompee & ses adherans. Noz voisins en voudroient bien faire de mēme, mais ils sont plustost en danger que leurs tant de millions n'y demeurent en fin pour les gages, bien legeremēt employez à la corruption des trahistres vendeurs & proditeurs de leur Patrie, quelque instāce que le Duc de Ferie eait sceu faire és Estats, du réboursemēt de sō maître, nōobstant que d'arriuee ils n'eussent fait demōstratiō de ne pretendre rien de tous ses gros frais & despēses, que le seul maintienement de la Religiō Catholique, cōme à to⁹ ppos l'alleguoiet leurs predicateurs mercenaires, q ne faisoiet point de scrupule d'appliquer au Roy d'Espagne ce q l'Eglise chante de IESVS CHRIST en l'Hymne des Innocens, *Non eripit terrestria, - qui regna dat cœlestia*. Mais par ceste inconsiderée hastiueté, eschappee certes mal à propos pour des gēs si cauts

& subtils , & cōme auortee avant terme, se descouurit indiscretement la fin où tēdoient leurs masquées hypocrisies, qui n'est que de ruiner cest estat, puis qu'ils ne s'en peuuent pas emparer.

En ceste histoire outre plus se pourra veoir, que les desolations de ce Royau-me qui auoient duré plus de soixāte ans, l'aians deu mettre à sec de finances, neātmoins vn seul simple petit Escuier Gafcon, Pierre de Xaintrailles, lequel commandoit au chasteau de Couffi pour le Roy, y aiant eu la gorge coupee par la trahison de ses domestiques, se trouuerēt plus de cent mille escus dans ses coffres, par luy buttinez en peu de mois. Et en doit-il auoir esté moins fait en ces troubles cy, que le royaume est trop plus opulent & riche en deniers qu'il n'estoit lors? Nos Annales fōt mētiō entre autres choses, que le Roy Charles V. fils du Roy Icā, lequel pris à la defaicte de Poictiers, finas ses iours en Angleterre, estāt venu à la corone en vn tref-inique & necessiteux tēps, nōobstāt tāt de grāds & pesans affaires qu'il eut tout le lōg des 17. ans qu'il regna, aiāt neātmoins sur les bras entrepris

de faire de son bon meſnage & eſpargne vn cerf d'or maſſif de la grâdeur qu'on le peut veoir en la grand' ſalle du Palais, en auoit deſia parfait le deuât, mais ſa mort preuint le reſte. Guaguin, & autres mettent qu'il laiffa dixhuiât millions d'or, combien qu'à ſon aduenemēt à la Corone il euſt trouué les coffres de l'eſpargne tous eſpuiſez. Cela nous apprend ce que peuuent le bon gouuernement & ſage conduite d'un Prince au ſoulagement & conſeruatiō de ſes ſubieſts. Ceſtui-cy ne regna pas des plus longuement, & encore en vn ſiecle non à beaucoup pres ſi pecunieux que le noſtre, le royaume eſtant fort apauuri & extenué des ruines qu'il auoit ſouffertes, ſes limites nō ſi eſtēdus cōme ils ſōt, dōt la pluspart eſtoiet occupez par de tres-puiſſās ennemis: ce neātmoins d'auoir aſſemblé vn tel threſor en ſi peu d'ānees, cela mōſtre aſſez que ce prouerbe eſt veritable, *Quā magnū vectigal parſimonia!* Mais de nos iours quelles deſpēces ont fait le Roy Frāçois I. tāt en ſes guerres cōtinuelles durāt les 33. ans de ſon regne, qu'au paiemēt de ſa rançō, en ſes ſuperbes baſtimēs, en la ſplēdide & ſomptu-

euse cour qu'il tenoit, & en tât de richès & précieux meubles? nonobstât cela il laissa le royaume à s^{on} fils Héry II. le plus riche & opulent qu'il fut onques, avec plus de trois milliōs d'or, & son annee deuât soy, le peuple gras & reposé. Le me deporté de celles dudit Héry II. qui furēt encores pl^{us} excessiues, & toutes fois riē qu'un jouer, & à maniere de parler, mocquerie, au prix des immēses pdigalitez & dissipatiōs des 30. ans du gouuernemēt de la Royne mere, & de leurs enfans: ce qui nous acertaine de plus en plus que ce royaume est inexpuisable, il ne faut que deux ou trois bōnes & fertiles annees de suite, pour le remettre sus de nouveau, pl^{us} frais & gail-lard que iamais. Dōt biē abusēs se trouuerōt ceux qui se proposent du cōtraire, & qu'ils viēdrōt en fin à bout de ceste guerre, pource qu'ils ont le dernier escu, ou pour parler plus p^{ro}premēt, qu'ils sōt à leur dernier escu. Car nos minieres ne cōsistēt pas comme les leurs en ie ne sçay quel escoute s'il pleut d'or & d'argēt, q^{uand} vne fois euacuees il faut attēdre deux ou trois mille ans à en p^{ro}creer de nouueaux, tēsmoin Tague & le Pactole, autrefois de si grād

profit, & deormais le Potoffi au Peru, en-
 semble tels autres endroits de leurs Indes,
 q s'en vōt tātost tout à sec. Les nostres se
 renouuellēt tous les ans, elles ne tarissent
 iamais, qu'aussi tost elles ne se rabreuuent
 iusqu'au regorger, tout ainsi que les cou-
 rās des grosses riuieres qui ont tousiours
 de quoy couler, sans qu'ō en voye iamais
 le fonds: là où les richesses de ces gēs cy
 ne sont que torrents, & moulins cho-
 mans, qui ne tornent que par esclusees &
 bastardeaux, à force de retenir l'eau. N'est
 ce pas chose presque incroyable que selon
 le cōpte qu'on en tint lors, en l'an 1555. au
 plus fort des guerres d'entre le Roy Héry
 II. & l'Empereur Charles V. sur vne trai-
 ctē generale de vins octroiee aux païs
 bas, & de là cōsecutiuelement pour les re-
 gions Septentrionales, par vn seul de-
 stroict entre Aubenton & la Capelle se
 trouuerent auoir esté enleuees, & par
 charroy, ce qui est encore bien plus
 estrange, de quinze à seize cens mil-
 le pieces de vin en moins de vingt
 mois? A quelles sommes de deniers
 cela se pouuoit-il donques monter, qui
 en contrechange entroient pour ce seul

regard dans ce royaume? car tout en par-
toit. On en peut encore estimer plus des
bleds, draps de laine, toiles, aulonnes, &
autres dérees qui y prouviénēt, cōme à l'é-
uy. Certes cela s'est verifié n'y a pas trête
ans, que pour vn coup ont esté nôbréz en
la Duché de Bretagne, & Côté de la Val
plus de six vingts mille mestiers de tisse-
rands. A l'opposite, la douane des draps
de soye de Lyon aiant il y a seize ou dix-
huiēt ans esté estrouffec à six vingts mille
escus par an, à certains partisans, à la char-
ge qu'ils en pouvoient prendre quatre
pour cent, d'autres mieux affectionnez
au bien du Royaume en offrirent le dou-
ble, & encore à ne prendre que deux
pour cent : si on vient à le calculer, cest
article seul monteroit à plus de dix mil-
lions d'or, que l'Italie tiroit d'icy par
chacun an auant ces troubles : & voila ce
que les Espagnols luy valent. Me fera-il
permis d'alleguer icy vne chose plus que
monstrueuse, & dont i'aurois besoin de
caution pour m'en faire croire au temps
aduenir? N'y a pas cinq ans qu'en ce-
ste derniere combustion de la France par
plus de trente ans tout de suite, aiant

esté si malmenee des rauages des guerres
 ciuiles ; si espuisee de subfides & concus-
 sions , la pluspart des deniers transportez
 dehors ; se soient neantmoins trouuez à
 Paris au logis d'un Thresorier alternatif,
 qui à peine n'auoit pas esté en charge huit
 ou neuf ans, plus de trois cens mille escus
 d'or en or, cachez dans vne poultre & des
 foliueaux , sans ses autres meubles , basti-
 mës & acquisitions. Cela sera bien trou-
 ué incroyable à ceux qui viendront apres
 nous : & neantmoins chacun sçait assez
 qu'il est vray. Mais plus encore est à ad-
 mirer la patience du perdueur , qui surpas-
 se celle de Iob: il y en a qui se fussent pen-
 dus pour moins.

O VY-MAIS , dira quelqu'un, en reme-
 morant tout cecy , ce n'est qu'accroistre
 de plus en plus l'enuie à nos bons voisins
 de s'emparer de ce de tout temps si riche
 & plantureux estat , si conuoitté d'eux, &
 maintenât plus que iamais. Comme s'ils
 ne l'auoient pas sans cela assez conceuë
 en leurs allouuiz & insatiables courages;
 & ne cogneussent aussi bien , voire peult
 estre mieux que nous , la portee & les fa-
 cultez d'iceluy, y aians les yeux fichez de

si longuemain. Mais encore les y deuroit bien enflamber d'avantage; & y a apparence qu'en partie il batte là pour leur en faire venir de plus en plus l'eau à la bouche, ce Dialogue du Maheustre & du Manant, fait en faueur des Predicateurs, & de la Sezerie Parisienne contre leurs principaux chefs; où il met en termes exprès, qu'aucuns de leurs plus particuliers favoris & conducteurs de leurs affaires, faisoient leur compte de haulser le reue-nu de ce Royaume, quand ils en seroient possesseurs paisibles, iusques à cinquante millions de liures; & desia mangeoient leur pain à la fumee de ce rost: Mais il leur faudroit, comme respondirent les deputez de l'Asie à Marc Antoine, qui leur demandoit vn redoublement de tribut, faire aussi redoubler, & peult estre tripler, les saisons de l'annee, & les recoltes qui s'y font; si d'aventure ils ne vouloient reigler tout le demeurant de l'Estat sur la Bourgoigne, qu'on sçait assez n'auoir onques sous tous les feus Roys porté plus de cent à six vingts mil escus par an pour toutes charges & redeuāces, là où depuis quatre ou cinq ans on l'auroit surcrüe

à plus d'un million: & le Lyonnais tout de mesme.

LAISSONS doncq à la malheure ces miserables conuoiteux du bien d'autrui, halletter apres tât qu'il leur plaira ; l'importance est de s'en defendre , & y employer iusqu'à la derniere goutte de sang, qu'on ne sçauroit mieux qu'à la tuition de son Roy, & de sa patrie ; de ses frâchises & libertez ; *Dulce & decorum est pro patria mori*. Nous le deuons, & l'auons ainsi promis & iuré des l'heure de nostre naissance : & mesmemét cōtre de si desloiales gēs, dont tout le faict ne cōsiste qu'en fraulde & en trahison; parquoy Dieu dissipera leurs conseils , & les esuauouira en fumee, comme estans fondez sur de peruerses & malignes intentions ; pour l'accomplissement desquelles; ce qui luy deplait tousiours d'auantage , ils ne craignent point , vrais faulxaires qu'ils sont, d'éprunter le respect & autorité de son nom; tout autât que s'ils contrefaisoient son seau & son seing pour piper le mōde. Outre qu'une si haute & ardue entreprise que cestecy , avec les menees & pratiques où elle est la plus-part fondee , si tout cela n'est assisté de quelque puissant

effort d'armes, sous vn valeureux conducteur, c'est autant que de battre l'eau; & se peut accompagner proprement à vne imagination ou idole; ou au modèle d'un edifice, qui attend des matériaux & estoffes, & la main des ouuriers pour le mettre à execution. Ainsi en vſa tousiours l'Empereur Charles, & s'en trouua bien; aussi est-ce le plus certain; lequel ſçauoit fort bien accompagner ses desseins & projets d'une bõne & puissante armee, qu'il menoit luy-mesme en personne, sans s'en reposer sur ses Lieutenans; principalement contre les François, qui iadis firent sentir l'effroy & terreur de leurs armes victorieuses iusqu'aux quatre coings de la terre. Les Romains, ne furēt ils pas autresfois les plus belliqueux de tous autres; les plus preux, plus hardis & entreprenans; sages, prouidents, aduisez: & neâtmoins quelle peur môstroient ils auoir des Gaullois, quand pour leur resister, toutesfois & quantes que le bruiet venoit de la moindre de leurs descentes, eage aucun n'estoit exempté, non pas mesme la dignité Sacerdotale, la plus priuilegee de toutes autres, de prendre les

armes? on sçait assez que la finale victoire qu'obtint Cesar contre Pompee, dont luy fut acquis en vne seule heure du iour ce grãd Empire, proceda principallemēt des forces Gaulloises, & mesme de la dixiesme legion, ditte l'Alouette, des hautes crestes de leurs morions & pennaches, composee de Gascons. Et en la guerre qu'il eut depuis en Afrique contre Scipion, & les demeurans de la faction Pōpeienne, on trouue escrit en ceste sorte: *Là dessus aduint vne chose presqu'incroyable, que moins de trente hommes d'armes François rembarrerēt plus de deux mille cheuaux Maures, & les menerent battans iusques dans la ville.* Toutes ses œeures sont semees de leurs vaillances. Mais es temps plus modernes, quels beaux & memorables exploits-d'armes ont fait les François, tant en l'Asie qu'en l'Europe, où leur reputation a tousiours esté telle, qu'à bõ droict Cesar aiant de plainc-arriuee tourné en fuite Pharnaces Roy de Pont, qui auoit vne grosse armee, avec vne petite poignee de gens, vint à s'exclamer : *O heureux Pompee qui pour auoir eu affaire à de telles manieres de gens, t'es acquis à si bon marché le*

*surnom de grand ! que ne t'es tu rencontré avec des Gaullois ? Tu eusses certes achepté bien plus cherement tes trophées. Et où s'en est dōcq allé ceste anciēne valeur & proüesse ? pourra lon dire : En, & contre foy-mesme ; -Populūmque furentem--in sua viētrici conuersum viscera dextra ; afin que nos aduersaires ne se glorifient pas d'auoir rien d'eux, & par eux seuls obtenu sur nous. Ce n'est pas par leurs magnanimes efforts ; ny encore par leurs pratiques & menees, combien qu'ils y aient apporté tout ce qui se peult de leurs artifices accoustumez, si les Nostres (*perditio tua ex te, Israel*) n'y eussent autant ou plus ardemment presté la main ; si du nom de Nostres on doit honorer ces perfides Espagnolisez, qui se sont d'eux-mesmes creusé le piege pour s'y laisser prendre.*

MAINTENANT entrans en comparaison des deux articles dessusdits, avec ceux de nos aduersaires, commençons tout premierement par ceste vaste, immēse, & inestimable montjoye ou mammonne de leurs richesses, surpassans de bien loin, si on les en veut croire, celles de Salomon, de Croesus, & de Darius

dernier Roy des Perſes ; ou s'il s'en trou-
 ue encore quelques autres de plus opu-
 lents dans le *deſſe* de Budee, & ſembla-
 bles auteurs qui en taillent comme à
 plain-drap. Cela eſt aſſez commun & no-
 toire à tous, à leur dire meſme, que de-
 puis la paix generale de l'an 1559. d'où
 ſont procedez tous les troubles & ſedi-
 tions des vns & des autres : car tout ainſi
 que la violence d'un vent vehement ne
 peult pas eſmouuoir de ſi groſſes vagues
 en vn torrent ou autre impetueuſe rui-
 ere telle que la Lizere ou le Roſne, à cau-
 ſe que la roideur de l'eau rôpt & domine
 l'effort d'iceluy, cōme il feroit ſur des lacs
 calmes & dormans; de meſme durant les
 orages des guerres d'entre ces deux bel-
 liquieux peuples ne ſe ſont pas peu exciter
 de telles eſmotions & mutinemens con-
 tr'eux meſmes, comme en leur oiſiueté
 & repos, quand leurs tempeſtatifs cou-
 rages n'ont rien eu plus où ailleurs em-
 ploier leur ardente ferocité. Les pays
 bas donques, la plus graſſe & fertile
 piece qu'ils euſſent tant pour tant, leur
 ayant couſté à leur dire propre plus
 de quatre vingts ou cent millions

d'or à garder, dont ils en doiuent la plus grand'part, & deurent encore Dieu aydant, d'icy à de longues suittes d'annees, avec de plus grosses sommes encore; Génes en sçauroit bien que dire, & leurs Indes à quoy s'en tenir, qui apres auoir esté espuisees de l'or & l'argent qui y souloient estre, sont pour le iourd'huy alienees pour la pluspart, & engagees aux particuliers,iusqu'au reuenu des minieres qui s'en vont desormais à sec : l'à où s'ils eussent voulu traicter plus humainement ces pays-bas, comme ils souloient estre soubz l'Empereur Charles, & nompas les escorcher tout à faict, ainsi qu'ils font, ils en eussent peu tirer plus de douze cens mille escus de net tous les ans; sans qu'il leur eust esté besoin d'entrer en de si gros frais & despences, nonobstant lesquelles ils sont en plus grád dâger que iamais, de les perdre du tout pour eux. Est-ce doncques cela ce tant bon & exquis conseil d'Espagne, qui a bruiet par tout de n'auoir son pareil nulle-part, ains estre le superlatif de tous autres? Mais c'est en prudence mondaine, ou pluystost malice, qui n'est qu'une pure folie deuant Dieu,

Dieu, & le plus souuent enuers les hommes mesmes, si elle n'est contemperee de preud'hommie & de droicteure, si qu'en telles manieres de gens se verifie ordinairement ce dire du Royal Prophete, *Tous les aguets qu'ils dressent tourneront à leur ruine:- & leur malice en fin retombera-dessus leur teste.* Aussi ont fort bien les Mathematiens difiny la ligne droicte estre la plus courte de toutes autres, dont il n'y a point de plus seure astuce & cautelle, que d'aller droitement & rondement en besoigne. car il n'y a qu'une seule sorte de cercle, de ligne droicte, & d'angles droicts, les plus solides de tous autres, & infinies d'ouales, de tortues, & d'obliques.

SUR ce subiect se presente vne fort belle cōsideration, qui merite biē d'estre succinctement atteinte icy, à propos de ce que Chabrias valeureux capitaine Athenien souloit dire, qu'il estimoit plus vne armee de Cerfs sous la conduicte d'un Lyon, qu'une de Lyons sous la charge & conduite d'un Cerf; mais au contraire de cela on tient estre plus duisible à un Estat, que le Prince soit moiēnement versé & entendu au maniement de ses

D

affaires, & assisté d'un bon conseil, que le rebours, (quand on dit bon, c'est à dire composé de gens qui soient sages, & preud'hommes) pource que n'estant qu'un homme seul, il ne peut pas entendre à tout, & que par raison plusieurs yeux peuvent veoir plus clair qu'un ou deux. Mais il faut presupposer aussi, qu'il ne soit pas de sa part ignorant, ni trop addonné à ses plaisirs & oisiveté. Car en ce cas, dequoy luy pourroit servir tout l'Areopage d'Athenes, ou senat Romain? Et pourtant Lampride en la vie de l'Empereur Alexandre Seuerus conclud, qu'un prince mediocremēt aduisé aiant un excellent Conseil, est à preferer, pourueu aussi qu'il le vueille croire, & le laisser faire, sans le trauerfer & desdire, à un plus ingenieux & practiqué avec un conseil mediocre: mais si l'un & l'autre sont accomplis, bien-heureux se peut dire l'Estat qui en est administré & regy.

Q u o y que ce soit, on ne voit pas que ce conseil soit gueres bon, d'auoir mis en la teste de leur Roy, qu'il luy failloit ainsi gourmander & tyranniser ses subiects

(nous viendrons puis apres à l'autre ad-
uis qu'on luy a donné de s'acheurer à ce-
ste Corone)& de traicter ce benin & do-
cile peuple, s'il en vouloit iouïr paisible-
ment, de la mesme sorte que l'inconfide-
ree leunesse d'entour le Roy Roboam
luy persuada de respondre à ceux, qui luy
demandoient vn soulagement & mode-
ration des excessiues & insupportables
charges dont ils auoient esté comme ac-
cablez durant le regne de son feu pere.
Sire (luy disoient-ils) *vous respondrez à ces*
mutins qui vous importunēt si effrontement de
les releuer de vos droicts & deuoirs, en disant,
Vostre feu pere (que Dieu absolue) nous chargea
par trop d'impositions, si qu'à peine les pouuïōs
nous plus supporter, tant il aggraua nostre
ioug: Vous leur direz dōques, Mō petit doigt est
plus gros que n'estoit mon pere par le fin-du
corps. Il vous chastia simplement de verges, mais
ie vo^x veux fouetter à coups d'estriuières avec les
boucles & ardillons. Car c'est cōme il faut faire
obeir tels seditieux refractaires, & les engarder
de se soubsleuer. Et ceux cy, quoy? Valgame
dios sacree Catholicissime Maiesté, qu'ō
neviēdra iamais à bout de ces bourrachés
de Vallōs, Flamēs, Brabāçōs, Hollādois,

D ij

qu'à coups de baston, & de verges de fer. Les veut-on auoir plus souples qu'un gant, & les garder de regimber? Il les faut accabler de subsides, & les faire succomber sous le faix. Mais non, voulez vous mieux faire, fondez y moy bien & beau vne nouuelle colonie de vos bons Espagnols naturels, à qui vous ferez espouser les filles heritieres, pour en faire un peuple tout neuf, comme vous avez fait par tout. Plantez y l'Inquisition forte & roidde, c'est le vray moien de s'en defaire en peu de temps, & voila comment il y faut proceder pour les amener à la raison. Maladuisé certes pour de si prudets & sages mōdains, lesquels deueroiēt auoir un autre esgard enuers les natiōs de deçà d'un naturel doux & paisible, bien affectionnez de tout temps enuers leurs Princes legitimes, s'ils ne les ont voulus trop mastiner, mais au reste d'un frâc vouloir, & qui ne veulēt pas estre gourmādez en esclaves: & autre de celles de delà, d'un costé trop seruiles & idolatres de leurs seigneurs, & de l'autre, gēs dangereux, legiers, inconstās, où il n'y a pas beaucoup d'asseurance de foy, religion, & de loyau-

té ; parquoy il leur faut tenir la bridde plus roidde, tout y estant parsemé de Mo- res, Renegats, Iuifs, Marranes, Retaillats, & autres telles manieres de gens, com- bien qu'à la verité si on veut insister à la propriété des vocables, on pourroit aus- si alleguer qu'il n'y a lieu en tout le mon- de où il y ait plus de retailats, qu'en ces miserables desolez pais-bas ; car ie ne pense pas qu'il y eust iamais gens plus taillez & retaillez qu'eux (bel exemple certes pour leurs voisins qui sont si friands de la seruile domination Espa- gnolle) gens plus deplorablement op- pressez de toutes les plus cruelles & ty- ranniques vexations qui furent onques en nul autre endroit de la terre, spe- cialement sous le Duc d'Albe & les siens, car le gouuernement des Italiens a esté sans comparaison plus modeste. Je laisse à part l'indigne & tant inhu- maine execution des Comtes d'Aiguc- mont & de Horne, car cela est trop dete- stable à l'ouïr racôpter seulemēt, mesme à nous, encore que nous n'aions perdu en ces deux tresualeureux cheualiers, que deux tres-redoutables aduersaires, prin-

cipalement en celui d'Aiguemôrt, qui leur
 acquit par sa prouësse (il faut icy aduouer
 quelque chose de noz defaictres , parce
 que la verité nous semôd de ce faire) les
 deux plus signalez succez d'armes qu'ils
 obtindrét onques sur nous , apres la rou-
 te de Pauie , celui assauoir de S. Quentin
 1557. & de Dunquerque l'an ensuiuant. Si
 donques ces ingrats là n'ont peu com-
 porter la vertu, les merites, les grands de-
 uoirs & seruices si signalez des leurs pro-
 pres , quels traitemens en deuroient at-
 tendre , s'ils auoient la teste bien faicte,
 ceux qu'ils ont tousiours tenus & tien-
 dront pour leurs plus mortels ennemis?
 Mais c'est Dieu qui leur cigne ainsi les
 yeux, & leur oste l'entendement. Quant
 aux concussions, pilleries, rançonnemēs,
 meurtres, volleries, assassins, forcemēs
 de femmes, violemens de filles , & autres
 telles malheurtez perpetrees sous le ma-
 niement du Duc d'Albe, & par son fils le
 grand prieur, la pluspart à son veu & sceu,
 le proces qui leur en fut depuis fait en
 Espagne, bien que palliatiuement, & par
 forme d'acquit, comme on a peu veoir,
 pour penser par là rapaiser le peuple , &

amortir enuers les nations estrangeres la mauuaife odeur dont estoient leurs detestables & iniques comportemens, aux plus barbares mescreans mesmes, n'en fait-il pas assez de foy ? Je n'allegueray point au reste des autheurs icy qui leur peussent estre suspects & reprochables, mais les leurs propres, & ceux là encore qui ont le plus auantageusement escrit leurs affaires, Francisco Ouiedo de Baldez, Piero Martyr Milanois, Lopez de Gomara, Vloa, & autres, tous lesquels vnanimement tesmoignent, que lors que les Espagnols s'emparerent de l'isle de *Hai-thy*, depuis ditte d'eux l'Isabelle, & l'Espagnolle, y aians trouué plus de seize cens mille ames, ils les traitterét de telle sorte qu'en moins de deux ans ils les eurent du tout reduits à neant par leurs immoderez trauaux, si que non en vain luy auroit esté attribué ce nō de *Harthy*, qui en langue Hebraique signifie I E F V S, & en la naturelle du pais, *dur & aspre*, denotant le dur traictement qu'elle deuoit vn iour receuoir de ce tant rigoureux fleau de toutes les nations de la terre, dont le faict ne consiste qu'à exterminer

D iij

tous les anciens habitans des lieux où ils peuvent mettre le pied. Cuident-ils donques en estre quiètes à si bõ marché, & que le sang de tant de pauvres infortunez, qui crie incessamment vengeance à Dieu, de ceste enorme bourrellerie, s'en voise esconduit en fin de leurs iustes querimonies? Mais à quel propos tout cecy (pourra lon dire) qu'auons nous que faire des desolations & ruines de ces sauuages, qui aussi bien ne valent pas mieux que bestes brutes, & dont la pluspart se mangent l'un l'autre, sans aucune cognoissance de Dieu ny de religion, n'aians rien de l'homme que la figure, & encore hideuse & espouuanteable? Ny aussi peu de ces pais-bas qui nous ont tousiours guerroié, & esté si contraires & mal-vueillans, comme subiects de nos plus mortels & inucterez aduersaires, dont il leur faut suiure les commandemens? Car on ne les appelle pas vassaux du Roy d'Espagne, non plus que les Neapolitains, Siciliás, Milanois, &c. Mais les serfs & esclaves de ces Iurados hidalgues. Ne vaudroit-il pas mieux prédre garde à no⁹, & en deplorât

nos maux & miseres, tascher, de nous en demesler ? Il est bien vray : Et de fait tout cela ne nous touche en rien que d'une commiseration Chrestienne, de voisin mesmement à autre ; ce qui nous deburoit servir d'instruction, si nous n'estiōs si aueuglez. Aussi ne l'auons nous atteint que pour faire veoir, que ceste l'une des plus belles & riches portions de leur heritage estant ainsi non tant seulement reduitte au chap. des non valleurs, ains d'abondant de tels frais & cousts inutiles pour la conseruer, cōme aussi la plus part du reste, on trouuera que tout leur faict n'est qu'une vaine & pure iactāce, de promesses en l'air, pleine de vent, à guise de ces petites bulles qui se procreent sur l'eau quand il pleut, aussi tost esuanouies que nees. On ne les sçauroit mieux accōparer qu'à la statuë que songeale Roy Nabuchodonosor ; dont la teste estoit d'or (ce sont leurs entrees) & les pieds, assauoir les effects & issues de leursdictes promesses, de fer ; & de terre cuitte. De fer, pour les ruines & desolations qu'ils apportēt par tout où ils peuuent s'introduire, & mettre le pied : & la terre cuitte

denote que leurs piperies , leur cōuoitise demesuree & insatiable ambitioⁿ detestable deuant Dieu , & deuant les hommes, accompagnee de fraudes, deceptions & desloyautez, s'en iront aisement dissipees, & brisees en menues pieces comme tests de pot.

Mais pour passer oultre à ce subiect de leurs vanitez & peu de moiens, qui ne consistent qu'en vanteries & abusions, le Royaume de Naples , avec toutes ses appartenances & dependences , vne aultre tresbelle & ample piece dont se tire plus de deux millions cinq cens mille escus tous les ans , y compris le don gratuit de douze cēs mille octroié depuis quelques ans , qu'ils ont fait passer en reuenu ordinaire : tant s'en faut que toutes charges deduittes il leur en puisse reuenir rien de bon pour s'en preualoir aultre part , qu'à leur compte mesme , la mise passe la recepte de plus de quarante ou cinquante mille escus tous les ans. Le semblable de la Sicile, Sardaigne , Maiorque , & Minorque , & telles autres Coronas Royales de la veille des Roys ; tiltres piaffeux , enflez & superbes , propres

à decorer & escarteller des blasons d'armoiries ; parer des cottes d'armes ; qualifier les Heraults de tiltres specieux , pour les faire resonner en Ethiopie , Calicut, au Iapon , & en la Chine : Il ne resteroit plus que trois belles grand's fleurs de Lys d'or en champ celeste , si elles s'y pouuoient comparer. La Sicile doncques eualuee à quelques six cens mille escus par an ; adioustez y en hardiment cent mille de plus pour la conservation d'icelle , non moins contre les anciens habitans, qui secoueroient volontiers leur dur ioug, (car toutes leurs dominations sont forcees , violentes & tyranniques) que pour se defendre des infidelles & Mores de la Barbarie , qui ne leur deuroient pas faire si mortelle guerre, attêdu leur proximité de lignage. Autant pour la Sardaigne , qui est de soixante mille ; & Maiorque , & Minorque de cinquante mille ; s'ils estoient payez ; ce qu'ils ne sont pas, ains tout cela mis au chap. des deniers comptez non receuz ; encore que tous ces Royaumes & Seigneuries soient par

eux mises comme au pressouer pour en tirer mesme le marc; principalement depuis qu'il leur est venu en la fantaisie d'acheter ce Royaume des Predicateurs, & des Seize; si qu'il n'ya nul depuis le grand iusqu'au petit, qui ne deteste, mauldisse & execre ceste mal'heureuse & funeste entreprise, cause de leur finale ruine; & tous ceux qui en furent onques les premiers autheurs, sans nuls excepter: car il y a plus de cinq ou six ans q tous les Terzes qu'ils y tiennent (ils appellent ainsi leurs regiments) n'ont touché vn seul maruedis de leur solde; ny les officiers nomplus: Ils vivent comme s'il n'ya uoit point d'argent au monde, de la picoree sur le bon-homme, au moins mal qu'ils peuvent; ou à emprunter à payer à la monstre des Calendes Grecques. Le Duché de Milan, pource qu'il est en lieu plus paisible, & hors des coups; que personne aussi n'y est payé; leur seroit vn peu plus fructueux, s'il n'estoit tout aliené par engagements, de façon qu'il leur est à plus de trois cents mille escus tous les ans de surcharge. Quât au Roiaume de Portugal qu'ils ont avec de si longues traisnees de

pratiques du perfide Kuy-gomez à son Roy & à sa patrie, & autres ses cōplices de la mesme farine, dont ils ont monsté l'exēple aux Nostres; finablement empietté, sauf à le demordre l'un de ces iours, & peult estre ainsi que les esponges qu'on a abreuvees de quelque liqueur; y compris l'Algerbe, les Indes Orientales qui en dependent; les daces des espiceries & autres marchandises en prouenans; Cefala, Mosambique, la Mine, les Isles S. Thomas, de Capeverd, Zenzer, & le reste; Tout cela à leur compte souloit mōter à trois millions, six cens soixante mille escus par an: Surquoy il faut defalquer l'entretienement des garnisons de ces quartiers là ainsi esloignez, & suspects; & autres forces pour resister aux infidelles: les péfions des Euesques, & autres Ecclesiastiques; l'estat des viceRois, & leur suite, & semblables gros frais & despences ordinaires & extraordinaires qui suruiēnt au iour la iournee; mesme en Cefala, Mosambique, & la Mine, avec les isles d'alētour, où il est besoin de tenir continuellement beaucoup de soldats, avec des relaiemens de vaisseaux pour

reffreschir ceux qui vont & viennent en
 ce long perilleux voyage , dont ils n'ef-
 chapperoient iamais bagues sauues , s'ils
 n'auoiét où faire quelques icalles & pau-
 fades par les chemins : pour les naufrs
 qu'on enuoye au deuant les soulager &
 recueillir. Plus en Afrique pour les con-
 trees deTanger , Scuta, & Maragnano.
 Et finablement dás le Royaume pour l'é-
 tretienement d'iceluy, le train du Roy , &
 de sa cour, on sçait assez cōbien cela im-
 porte en tous Estats , & à quels frais il
 peult monter : si que non sans cause il
 est dit , que c'est vne honeste paureté
 que d'un pauvre Royaume. Et vn Royau-
 me qui rend neuf ou dix millions de li-
 ures par an se peut il appeller pauvre? l'E-
 spagne ne les vault pas. Ouy selō les char-
 ges qui y peuuent estre , comme en tou-
 tes autres cheuances, où le foing ne vault
 pas les fauchailles: & mesmement en cel-
 luy-la à ceste heure plus que iamais, pour
 les Espagnols qui le tiennent de force &
 cōtraincte. Certes si ce n'eust esté le bon
 mesnage des Roys de Portugal , avec
 leur trafficq & espargne , & leur par-
 simonie à pair de marchans presque, &

personnes priuees , nonobstant tout ce beau & grand reuenue , à peine eussent ils peu gagner le bout de l'an : de maniere que de cest endroit il n'a pas guere pleu dans leur escuelle. Il leur doit suffire pour l'éfiler avec leurs autres Royaultez. Venōs maintenāt aux Indes Occidentales , la plus belle rose de leur chapeau vn temps fut, lors que tant de lingots d'or & d'argent leur en prouenoient tous les ans comme par despit, & à l'enuy les vns des autres , de ces incomparables thresors qu'ils y trouuerent en leurs premiers descouuremens amassez là de longue main, sans en auoir esté onques transportez dehors , car ces Sauvages ne s'en seruoient que pour le cult & veneration de leurs faulx demons, friands de ces pernicieux metaux, comme d'vn des principaulx instrumens , & plus propres amorces pour seduire & perdre le monde, si que certes on peut bien dire que ces descouuertes ont esté comme vne ouuerture d'vne autre bouëtte de Pandore, dont vindrent à sortir toutes especes de mal'heurtez ; &

delà s'espandre par l'vniuers ; fraudes, trahisons , tromperies , machinations, desloyautez , enuies , gourmandises , luxures, excez, violéces, oppreffions, meurtres , maladies , noïses , débats ; & semblables pestes & ruines du genre humain; *-quid non mortalia pectora cogis - auri sacra fames?* Certes ceste mauldite conuoitise d'or & d'argent induiroit les hommes d'assaffiner leur propre pere. Il n'y a rien qu'on n'entreprist pour en auoir. Il n'ya trauail, mesaise, danger où lon ne s'expose : *vsque adeo solus ferrum mortemque timere - auri nescit amor!* Rien qui en puisse destourner les personnes ; iusqu'à non seulement trahir son Roy, mais le massacrer, & vendre sa patrie aux estrangers, voire capitaux ennemis : Ses foyers & autels domestiques, sa femme & enfans; sa liberté, & s'il y a rien encore de plus precieux, de plus sacré, saint & inuiolable enuers les personnes.

Vendidit hic auro patriam ; dominumque potentem

Imposuit; fixit leges pretio , atque refixit.
Et en somme peruertir & deprauer tout le monde , comme ont esté ces beaux ostentateurs

ostentateurs de leurs richesses tous les premiers, qui s'en sont rédus si insolents, & en sont deuenus si fiers & superbes, & incompatibles qu'on ne sçauroit plus durer à eux, ny eux demeurer en leur propre peau. Ils en veulēt acheter tout, mais sans rien paier ; à propos de cest aduocat qui enfourna ainsi son plaidoyer, *Messieurs ie suis pour vn qui vend tout , & ne reçoit rien : Contre vn qui achete tout , & ne paie rien.*

O utinam tunc cū Lacedemona classe petebat,

Obrutus infans effret adulter aquis!

ſ'exclame la Nymphé OEnone sur le voyage que fait Paris à Lacedemone, d'où il en enleua Helene, qui fut cause de la perdition de luy & de tous les siens : mais le semblable pourroit-on bien dire des nauigations de Christofle Coulomb, Fernand Cortez , Francisque Piçarre, & autres tels escumeurs de ce nouveau monde d'abas. Pleust à Dieu qu'ils eussent esté bien endormis du sommeil d'Endymion , lors qu'ils s'adventurerent à de si hazardeuses entreprises, pour aller en queste non d'vn siecle

E

mais d'un monde doré. C'est ceste riche toison dont ils ont despouillé non Colchos, mais toutes les plus esloignées terre-fermes, & isles incogneuës iadis aux anciens, & en ont tondu ce nouveau Hemisphree, que la diuine prouidence nous auoit si longuement celé, nō sans cause, preuoiant le mal qui nous en pouuoit arriuer, ne fust-ce que de l'orde & infecte contagion dont cestuy-cy s'est infecté. Mais ils y ont planté la Foy Chrestienne (pourra lon dire) vn bon œuure certes, & recommandable sur tous les autres, s'il n'y auoit rien en leurs faux desirs & intentions que ce pieux & deuot zele, d'amener à la voye de saluation tant de pauures ames qui perissoient possedees de l'enemy du genre humain, pour estre priuees de la cognoissance de l'Euangile. Mais on sçait assez, & mesme leurs propres relations le tesmoignent à tous propos, que leurs extortions plus que tyranniques, & leurs auaricieux traitemens en ont fait perir d'une mort miserable & anticipée plus de millions, d'excessifs trauaux & mesaises, vsans d'eux

inhumainement pis que d'ânes & de cheuaux , qu'à tout le moins on espar-
gne & craint on de perdre pource que
ils coustent de l'argent ; qu'ils n'en ont
conuertý , catechisé , & baptisé de de-
my-douzaines. Ce respect dehors, dont
ils se preualent al'endroit de ceux qu'ils
ont icy charmez & enforcelez de leurs
fausses illusions & prestiges , ces grands
montioies de richesses où consistent
toutes leurs pratiques pour mesler le
ciel avec la terre , que nous peuuent
elles auoir apporté que tout luxe &
deprauation , & vn ramollissement de
ceste ancienne generosité de courage,
pour n'y introduire en sa place que
routes sortes de voluptez & faitne-
antises , dont sont procedees nos di-
uisions , nos diuorsés & partialitez
domestiques , & consequemment la
ruine presque de cest Estat ? ce qui n'a-
uoit point accoustumé d'arriuer en la
frugale simplicité de nos ancestres ; tout
de mesme qu'en l'ancienne Rome , où
leurs affaires allerent tousiours prospe-
rans pendant que du manche de la
charrue on appelloit des capitaines à la

E ij

conduitte de leurs par tout victorieuses
armees, ne sçachans encore que c'estoit
d'or ny d'argent, dont ils se vindrent à
desbaucher quād ils se furent laissez aller
apres la cōuoitise de s'enrichir outre me-
sure, qui fut cause d'enuoier à la parfin
pieds contremont ce tant bel & puissant
Empire acquis par leur parsimonie & so-
brieté, dont la ruine commença par leurs
dissentions intestines, qui procederēt de
l'auarice & ambitieux desir d'auoir plus
l'vn que l'autre : comme l'a fort elegam-
ment touché Petronius arbiter en ses Sa-
tyres, vraye prophetie des Espagnols qui
y sont depeints.

*Orbem iam totum victor Romanus habebat,
Quà mare, quà terra, quà sydus currit utrū-
que:*

*Nec satiatuſ erat, grauidis freta pulsa ca-
rinis*

*Iam peragrabantur, si quis sinus abditus
ultra,*

*Si qua foret tellus quæ fuluum mitteret au-
rum,*

*— Hostis erat, fatisque in tristia bella para-
tis*

Querebantur opes, &c.

Voulons nous ouir d'abondant ce qu'en touche Pline au commencement de son liure 31 ? *A la mienne volonté que l'or se peust exterminer de tous poinçts , vne tresmauvaise & execrable connoitise , diffame d'iniures & opprobres de tous les preud'hommes , comme ayant esté trouué pour la ruine & desolation de la vie humaine ! Combien plus heureux estoit doncq le siecle lors que les choses s'eschangeoient entr'elles , comme , s'il en faut croire Homere , se souloit faire deuant Troye ; car par ce moien furent inuentees , à mon aduis , les compagnies & associations des personnes , afin de pouuoir viure par les commoditez les vns des autres. Les Onirocritiques ou interpreteurs de songes expoent les perles qui s'y representent , pour ducil , lamentations , pleurs & larmes , dont aussi elles en ont aucunement la ressemblance : & l'or pour l'angoisse , ennuy , facherie ; & melancholie , à cause que le fiel , qui est l'amertume propre est de couleur d'or ; & en langage Espagnol le iaune-passe s'appelle *amarillo* , qui vient d'amertume. Mais plus authentiquement le Zohar , qui met que toutes couleurs sont*

de bon & heureux presage en songe, fors le rouge, & le iaune doré, prenant ordinairement l'or en mauuaise part, cōme estant de la partie du Septentrion, selon Iob mesme au 37. chap. *Ab Aquilonea urum venit* ; non qu'il vucille entendre que l'or se procree és regions Septentrionales froiddes ; au contraire il ne s'y en engendre point du tout, ains és chaudes leuantines, & meridionales ; mais pource que le Septentrion selon les Cabalistes est le lieu du DIN, rigueur & scuerité de iustice, & de chastiment, où il n'y a point de misericorde ; il veut dire que l'or estant cause de la pluspart des offenses que nous commettons, il bannist de nous la clemence & benignité diuine : aussi l'appelle le mesme Zohar, la honte & immodicité de Satan. Et voila les deux beaux ioyaux que nous ont apporté les Indes, & dont ces gens-cy se prisent tant, qu'ils en pensent suborner tout le monde, comme à la verité ils feroient en danger de faire s'ils n'en estoient si cours ; car tout leur faict n'est estably que sur l'ombre & songe d'iceux, & en de vaines & friuoles

promesses & esperances , dont ils leur-
rent les mal-aduisez : leur or desor-
mais estant reduict non au Septentrion,
ains au couchant ; car l'or appellé par
les philosophes Chymiques , *Soleil* , &
l'Espagne située à l'Occident & fin de
la terre, cela denote que leur or est là
au declin , comme est le Soleil quand
il est prest de se coucher. Ioinct que le
saphran , rouge en son exterior comme
est leur liuree, destrempé avec du blanc,
qui est la nostre , produit vne couleur
iaulne doree ; comme si cela vouloit
dire en belles lettres Hieroglyphiques,
que les François les ont desniaisez,
mouchez , scroquez de l'or que pour
les tromper ils y auoient voulu trop in-
considerement employer, & esprendre ; &
que luy & eux s'en sont allez au saphran ;
car ce sōt les plus grands saphraniers & bā
queroutiers de la terre. Que si ce qu'ō dit
communement est veritable, que qui a le
dernier escu vient à bout de la guerre, ils
se peuuent infailiblement promettre de
l'estre de ceste-cy , puis qu'ils y ont , ou
pour mieux parler, qu'ils en sōt au dernier
escu , quelque bonne mine qu'ils facent.

E iiii

Car c'est tout ainsi que d'un cerf malmené, & prest à rendre les abbois, qui a lors accoustumé de retraire sa langue, comme s'il n'auoit point couru, & au relancer bondir un grand sault, tel qu'il fait au partir de la reposee, pour monstrier d'estre frais encore, & vigoureux; tous indices neantmoins qu'il est desconfit, & n'en peut plus: ou ainsi qu'une lampe ou chandelle, qui sur son declin bruit, petille, & estincelle force petites flammesches: Tout de mesme ces messieurs-cy tonnent, esclairent & fouldroient; & incitent contre nous à nous fulminer le Saint Siege, pour nous faire perir avec eux en ce dernier effort qu'ils monstrent.

M A I S pour retourner à leurs Indes, l'Estat que par cōmune estimation autrefois ils en souloiēt faire, pouuoit mōter bō an mal an à quelques deux milliōs d'or pour le quint du Prince, & maintenāt on peut biē dire avec le 8. de Genese, *arefacta est terra*; tout, ou la plus grand' part y est frit, tary, mis à sec. Drach tres-valeureux marinier Anglois, l'un de leurs principaux facteurs, thresoriers, &

receueurs generaux de ces quartiers là puis quelques années, en sçauroit mieux parler au vray que nul aultre; car il en a tenu fort exacte cōpte, bien est vray quil leur est demeuré reliquataire de quelque sommes de deniers, dont ils ont decerné vne prinse de corps contre luy, il ne reste que de la faire mettre à execution; & cependant ils l'ont fait adiourner à trois briefs iours, & pour vn besoin y procederont par cēsures Ecclesiastiques, mais il ne s'ē dōne pas de grād peine. No^r lairrōs cest article donc en souffrance, pour venir finablement à l'Espagne leur ancien patrimoine, depuis que les François le leur eurent retiré de la main des Mores. Elle vault au Roy à tout rompre quelques quinze ou seize cēts mille escus par an; y compris encore les quatre commāderies Maieures, S. Iacques, Leon, Calatraue, & Alcantara, qui en font plus de la moiētiē. Mais *quid hac inter tantos*? Comment est-ce que cela peult fournir à l'entretènement d'un si grand & puissant Monarque; à vne telle & si splendide cour que la sienne; & à de si extremes despen- ces qu'il fait la Duché seule de Norman-

die le vault biẽ, ou fouloit valoir. De maniere que s'ils hẽnissent & halletent d'un si grand desir & effort apres ce bel heritage, s'ils y ont tant pris de peine, & tant dẽpendu, ce n'est pas de merueille; on se passionneroit bien pour moins.

ἔγνεμισσι τρῶας ἃ εὐκνήμιδας ἀκαίῃς
πιῇ δ' ἀμφὶ γυναικὶ πολλῷ κρόνον ἄλγιστα πάχιν.

Ditle bon Homere, parlant de la beauté d'Helaine. Que ce n'estoit point chose blasmable & reprehensible, que les Troyans & les Grecs eussent souffert tant de maux & de pertes durant les dix ans que leur guerre dura, pour vn si excellent chef d'œuvre de nature.

DIDIVS IVLIANVS Aduocat Milanois eut bien le courage d'achepter l'Empire Romain quatre millions d'or, des soldats Pretoriẽs: Braue marchẽ certes, & biẽ hardy pour vn hõme de sa qualitẽ; mais à tout le moins iouit il aussi quelques mois du tiltre & salutation d'Empereur; & si ne hazarda point son argent qu'à bonnes enseignes; car c'estoit la garde du corps, ainsi que les Iẽnissaires du Turc, dix mille en nombre, qui se dispoient de de mettre & creer les Empe-

reurs à leur poste. Trop plus aduétureuse & prodigue a esté l'emplette de ces gens cy: que si lon s'en veult rapporter aux doleances du Duc de Ferie, ils en ont desia desbourcé sept ou huit millions, pour l'achapt d'une simple parcelle de ceste grosse masse de Monarchie, dont à peine toute la Gaule en son entier ne faisoit pas la vingtiesme portion: & si qui pis est, ils n'en ont pas encore esté enfaînez d'un seul poulce de terre; n'y de tiltre & enseignement qui leur peust valoir à l'instance du petitoire où ils sont fondez, sauf leur recours contre qui il appartiendra; fors du breuet que messieurs les SEIZE de la ville de Paris leur en despecherent l'an 1592. Duquel de peur que la memoire ne se perde d'un si authentique & signalé acte, la teneur ensuit, extraicte de la pâcharte qu'en emporta avec soy le reuerend pere Matthieu de l'ordre S. François, à sa Majesté Catholique: *Nous pouuons asseurer vostre Royale Maiesté Catholique, que les vœux & souhaits de tous les bons & zelex Catholicans de ce Royaume, sont de ueoir vostre dicte Royale Catholique Maiesté seoir au throne, & tenir le Sceptre de ceste Couronne; qu'au nom d'eux tous*

Nous vous deferons, & supplions de l'accepter, & regner sur nous, comme nous nous ietons tres-volontiers entre ses Royaumes Catholiques bras, ainsi que de nostre bon pere & Seigneur souuerain : Ou bien qu'elle y en establisse quelqu'un de son heureuse posterité ; lequel avec toutes les meilleures affections ; toute la deuotion, obeissance & fidelité qu'y peult apporter un bon & fidelle peuple, nous receurons pour Roy, & luy obeirons de cœur, d'ame, de volonté, de corps, & de biens. Ainsi signé ; Vos tres-humbles, tres-obeissans, tresfidelles & tres-obliges seruiteurs, & subiects futurs, les gens tenans le conseil des Seize quartiers de la ville de Paris, se faisans forts pour le reste du Royaume.

VOYLA comment ces benoists & benis doublons d'Espagne peuuent rendre doubles telles manieres de gés; que pour la diuersité dont ils sont composez, & de toutes pieces, on pourroit accompagner à vne salade, dicte en Italien *mescolanza* pesse-meslee de toutes herbes.

IUPITER iadis en semblance d'une pluye d'or accoincta la belle Danaë fille du Roy Acrisius ; laquelle Mythologie à tout le moins garde l'ordre de la nature, ou les choses pesantes, comme l'or & l'ar-

gent, tendent de soy tousiours contre-
bas : Mais ceux cy tout au rebours font
sans fin ne borne , nombre ne mesure,
monter lè leur iusques au plus hault de
l'Olympe, en fumee neantmoins , com-
me vn holocauste; & l'achepteroient vo-
lontiers, si on le leur vouloit vendre, ain-
si que Simon Magus prochassoit , pour-
ueu que toutes les estoilles fussent dou-
blons & portugaises, pour le paier de son
fonds propre, selon que le portét les let-
tres du Legat Segha au Duc de Parme: ils
en desnicheroient Dieu mesme pour s'y
introduire en son throne, à l'exemple de
ce superbe mescognoissant, qui se vult
egaller à son Createur : Telle est leur am-
bition, leur orgueil, vaine-gloire, & pi-
re encore; *To el Rey*, moy qui suis le Roy:
n'est-ce pas vn tiltre par trop enflé, com-
me si par vne antonomasie & preference
de qualité, il vouloit dire, Je suis le Roy
des Roys; ce qui n'appartient qu'à Dieu
seul. *Je mōteray là hault au ciel, & là esleueray
mon throne par dessus les estoilles de Dieu : Je
monteray par dessus la haulteur des nues, & me
rendray egal au Souuerain.* Mais il en aduiē-
dra aussi ce qui suit apres. *Ton orgueil est ti-*

ré en bas aux enfers : Ton corps mort, pourry, infect est tresbuché. Toy Lucifer qui au matin te leuois si clair & luisât, cômēt es tu ainsi tresbuché du ciel? Toy qui bleissois toutes sortes de gens; les trauaillois & molestois, tu es en fin versé par terre; Tu seras attiré iusques en enfer, au profonds du lac. Ceux qui te verront, se retournerōt deuers toy, & en te regardant dirōt; N'est-ce pas cest arrogant ambitieux qui partroubloit toute la terre, & a oppressé tant de Royaumes; qui a mis le monde en desert, & a destruit tant de villes & de citez? Tous les autres Roys gisent endormis en paix & repos, en leur gloire chacun chez soy; mais tu es reiecté arriere au loing de ton sepulchre, souillé & enuélé avec ceux qui sont passez par le fil de l'espee, & descenduz au fonds du lac comme vne puante charoigne. Tu n'auras point de compagnie, & ne seras enseuely avec eux, parce que tu as desole la terre, & meurtry les peuples. A qui pourroit mieus cela conuenir? Et il leur aduiendra sans doubte. *Pluet super eos laqueos ignis, & sulphur; & spiritus procellarum pars calicis eorum.* Car Dieu est iuste, & aime la iustice; son oeil voit ceux qui aiment equité.

M A I S pour reprendre le propos de leurs cassades & menteries , on sçait assez que des le commencement de l'an mil cinq cens nonante trois, lors que ces pseud'Estats s'assembloient à Paris , & qu'il y debuoit pleuvoir des millions ; l'ordre estoit desia tout donné, ce disoient-ils , & ces miserables enforcellez le croioient ; l'estat dressé, les assignations depeschées , & la plupart des deniers ja touchez , pour dépendre de là en auant tous les mois dixhuiët cens mille escus pour le faict de la Ligue ; dont les deux cens mille estoient destineez pour l'Italie, à appoin-ter le Saint siege , & faire d'autres brigues & menees pour la tenir en bride, moitié figues moitié raisins. Deux cens mille pour leurs partisans en ce Royaume , & les pensionnaires : aultant pour la conseruation de leurs pays bas ; & douze cens mille pour employer à la guerre de France. Mais ô archimenteurs impudens , sçait on pas bien que les deux cens mille escus qui furent lors cahin caha succez , arrachez , tenaillez

du fonds des moüelles & des entrailles de la pauvre desolee Flandres prouindrēt partie des denrees qui y furent prises à perte de finance ; & partie des bagues & ioyaux des fēmes , & de la vaiscelle d'argent qu'ils peruent raurir des particuliers ; le tout enleué a l'accoustumée de viue force & violence , avec vne telle tare & decheēt, qu'au rapport mesme de leurs facteurs , ceste somme ne leur reuint pas six vingts mille escus dans Paris ou leurs garnisons de plus de vingt payes qui leur estoient deues, à peine en toucherēt cinq ou six dalles pour homme ; tant il y a de menus fraiz qui precedent leurs gens de guerre, qu'ils meinent toute par pratiques ; si que ces pauvres langoureux y seroient morts de malle-rage de faim il y a long temps , sans la picoree que lon leur permettoit ; & les volleries & destrouffemens que sans cesse iour & nuict ils exerceoient trois ou quatre lieux à la ronde. Et puis ce n'est, direz-vous, que le zele de la religion qui les meine. Serez vo' dōcq si mal aduisez de le croire ainsi ; & d'aller à bras estendus audeuāt de la ruine qu'ils vous pourchassent, & vous en-

ferrer

ferrer de vous-mêmes en leurs machinations & aguets, leurs fraudes & deceptions plus que Punique; clacquans les mains de la ioye que vous en auez, non d'autre sorte que le peuple Romain autrefois dans l'amphitheatre de Curion, cent mille ames & plus qu'ils estoient, dont la vie ne tenoit qu'à vne cheuille, si elle se fust tant soit peu desmanchée; & sans qu'ils s'apperceussent de ce danger: *Periculo suo plaudunt*, dit fort bien Pline, se mocquant de ceste leur inconsiderée sottise, comme on doit faire de la vostre. Quel pretexte pouuez vous auoir désormais, aians vn si bon, si Chrestien & Catholique Roy, & si valeureux, de persuerer en vos seditions & tumultes? quels gabions, quels mantelets pouuez vous plus rouller deuant vous pour vous seruir de couuerture à faire vos approches, & venir à la zappe & demolition de ce tant beau iadis & florissant Royaume, auquel vous auez, & à vos legitimes Princes successeurs d'icelui d'une suite immemorale, iuré, voué & promis des l'heure de vostre naissance, vne fidelité permanente & inuiolable? Vous

F

departants donques de toutes ces considerations & deuoirs, voudriez vous arracher le diademe de dessus la teste de vostre Roy pour le transferer à vn autre, lequel s'il venoit à bout de son entreprise (il le vous faut ainsi presupposer) ne faudroit de vous traiter de la sorte que vostre aueugle perfidie & desloyauté le meritent? Car cuidez-vous qu'il voulust iamais aduouer ny souffrir pour subiects ceux qui auroient ainsi malmené leurs vrais & debõnaires Princes? Et qu'en deuroit-il à plus forte raison esperer moins, luy à qui vous n'estes tenus d'aucune recognoissance & deuoir, sinon entant que vous y seriez reduits & cõtraints le couteau à la gorge? mais il sçait bien que rien ne vous y meut que la friandise de l'argët dõt il vous apastelle, vous vendant à luy à beaux deniers cõptans, avec vostre liberté ancienne, & la fidelité que vous deuez à vostre Roy, vostre patrie, & voz autels, & tout ce que vous deuez auoir de plus saint & recommandable. Car ce n'est pas pour vne bonne, pure & sincere affection que vous luy portez; ny pour occasion legitime nom plus qu'on vous ait

donnee de vous soubfleuer de la sorte , ains d'une , ie ne sçay comment l'appeller pour l'honneur de la nation ; parquoy il en attendroit autant de vous à la moindre mousche qui vous picqueroit.

REVEENEZ d'ôques à vous recognoistre , si vous ne vo⁹ voulez acheuer de perdre. Et vous , iouissez à la bonne heure avec vostre posterité d'une perpetuelle recommandation & louange , car certes vous en estes dignes ; quiconque vous aiez esté les premiers de tous les trois ordres à vous r'aduifer & reduire à vostre deuoir , pour à vostre exemple induire les autres à se recognoistre , & par ce moien r'amener ce Royaume à son ancienne splendeur , & accoustumee pacification & repos. Le sommeil vient à estre plus doux & souef apres quelque fort accez de colique ou de goutte : & les nautonniers se remettent à faire plus gaye & ioyeuse chere s'estans demeslez de quelque perilleuse tormentte , qu'auparauant quand ils navigoient à plein-souhait la mer leur estât bonace & propice ; & tout plaisir trauersé d'énuy se rauigore : le ciel

F ij

recommence desormais à se resclaircir,
le Soleil à luire, la marine à se r'acquiescer,
les vents s'abatre, & les flots se calmer:
il ne reste plus que de poursuiure & para-
cheuer ceste heureuse route pour aller
surgir au port de salut.

C'EST vne chose presque incroyable
de la patience qu'à eu nostre tresbõ, tres-
Chrestien & valeureux Roy, & de la de-
bonnaireté & douceur à attendre la res-
piscence de ses subiects, & encore apres
en auoir receu tant d'indignitez, qu'il a
toutes donnees & remises d'une incom-
parable magnanimité de courage & cle-
mence au salut & conseruation de son
peuple; & a, comme dit le prophete, ietté
toutes leurs offences en son endroit, der-
riere son dos, pour iamaïs ne s'en souue-
nir. Mais ce n'est pas la voye d'auoir les
grands, & mesme ses superieurs souue-
rains, qui ont de soy le cœur genereux &
noble, que de les delchirer d'iniures, op-
probres & conuices; ce seroit plustost les
desesperer à tout perdre, & iouer à quitte
ou à double, que de se laisser ainsi gour-
mander de ceux qui leur doiuent toute
humilité & respect, tout honneur &

obcissance; là où par leur temeraire indiscretion ils les aigrissent & exasperent à se venger d'eux, s'ils ne sont plus que patients, ce qui n'aduient gueres. Quand bien donques il n'y auroit autre chose en ce nostre, & vostre malgré que vous en aiez, clement & debonnaire Roy, mais vous n'en estes pas dignes, que sa benignté & douceur, assistee d'une telle vertu & prouesse, dont cest Estat auoit bon besoin pour le garétir de la ruine que nos cōmuns ennemis portez de vous (ie le dis à mon grand regret) y auoient de l'ogerman conpiree; ores que ce royaume fust electif, ce qu'il n'est pas, ains pur successif & hereditaire, si vous deuroit neâtmoins tout ce que dessus plus mouuoir à le nōmer à la Corone, ioint qu'il est naturel François, & de la race du bon Roy saint Loys, que d'en aller chercher au loing, de ceux mesmement qui n'y eurent onques, ny n'auront Dieu aidant que veoir & pretendre; là où on ne peut reuoquer en doute qu'il n'en soit le droit heritier. Dont il faut rendre graces à Dieu, que par sa prouidence infailible il nous a finalement pourueus d'un tel bouclier

pour parer aux coups de noz coniquez aduersaires; & par mesme moien d'une si roidde & tranchante espee pour les rembarrier : Car nul ne pouuoit par raison mieux succeder à la Corone , que celui qui par sa debonnaire patience, ses sages & aduisez temporisemens, & son inuincible effort, (Fabius & Marcel ioints ensemble) a sceu si biē reboucher ceste violente impetuosité & furie de l'effrence multitude , qui vouloit sans sçauoir pourquoy ny comment, supplanter l'Estat Monarchique pour y introduire le populaire ; lequel ne pourroit iamais non plus compatir avec les Princes, & la noblesse , vrayes bases & soustenemens de cest imperissable Estat , que le feu avec l'eau , le tout à la suscitation des prescheurs, qui alleguoient à tous propos en plaine chaire, que le maniement & superintendance des affaires leur apartenoit, à l'exēple des septante Sāhedrin ou Senateurs de la synagogue, qui gouernoient au Iudaïsme le tēporel & le spirituel. Ainsi nous auions bō besoin d'un tel chef; & sur tout pour chasser l'estranger dehors, qui sur ces entrefaites s'estant venu mettre à la trauerse avec ses pratiques accoustu-

mees, n'eust sceu rencontrer vn plus suffisant contresquarre, ny nous vn plus digne & capable restaurateur des troubles & alteratiōs de ce Royaume, esbauchees de longue main par nos mauuais & pernicieux citoiens; & desia en vn tel auācement & progres, qu'on ne s'attendoit pas d'en veoir de la vie d'un homme le parfait reſtablissement. Aussi est-ce Dieu qui à ceste heure coopere avec luy; de maniere que les gēs de biē, & ceux q ont quelques reliquats encore des fleurs de lys empreintes en leurs cœurs, viennent tous par les menus à le recognoistre, ſelō qu'ō dit cōmunemēt, que les plus courtes folies ſōt les meilleures, ou pour mieux dire les moins mauuaises; ſi qu'ils parœurōt le fruit de leur reſipiſcēce au repos & cōtētemēt de leur eſprit; qui ne pouuoit eſtre à ſon aiſe pendāt qu'ils s'eſtoiēt ainſi deſuoiez, nō plus qu'un bras ou vne iābe q ſe ſeroiēt deſnouez hors de leurs iointures, & alienez de leur chef, dont ils acqueront autant de gloire & honneur aux ſiecles aduenir, où on les pourra remarquer & trier d'avec les opiniaſtres rebelles, & obſtinez ſeditieux, à qui

F iij

Dieu ne fera pas ceste grace de se r'aduiser & fleschir à leur deuoir, plustost acheuera-il de les aueugler du tout, & de plus en plus r'endurcir & contumacer leurs felons courages, sur lesquels le diamant mesme ne mordroit pas, tant ils sont rebours; si qu'il faut necessairemēt qu'eux s'accomplisse ce que le SAVVEUR reprochoit aux Iuifs, *Et in peccato vestro moriemini*; pour laisser au temps aduenir la memoire de leur perfidie & desloyauté, engrauee en de belles tables de porphyre ou de serpentín, pour estre plus perdurables: & par vn signalé exemple de la desastreuse & tragique fin qui les attend, sans qu'ils la puissēt euitier, deterrer les autres de suiure de semblables vestiges: parquoy ce seroit perdre temps, battre l'eau, semer le riuage, & respendre ses propos aux vents qui les emporteroiēt avec eux, que de leur cuider remonstrier leur salut. Certes i'ay à me plaindre de ma vie, & la regrette d'auoir si lóguement duré, q̃ i'aye veu cōtaminer le nō Frāçois de si execrables malheurtez; Frāçois nō, ils ne le sōt pas, cela ne peut estre, ny hōmes mesmes, ains vrayes Erynnés, furies infernales,

& Alastores incarnez; race & engeâce de
viperes qui ont tronçonné la teste de leur
pere au massacre de leur feu Roy: & rongé,
rompu, deschiré le ventre de leur chere
pitoiable mere, la France, qui les auoit
si tendrement esleuez & nourris : & si ils
n'ont point de honte d'aduouër ce beau
coup du ciel , comme ils le qualifient,
s'en vanter & glorifier, & voudroient vo-
lontiers y recidiuer. Mais cela ne suc-
cede pas tous les iours : -- δεινὸν δὲ γένος
βασιλῆϊον ἐστὶ - κτήνη; dit le bon Homere;
que c'est vne chose bié malaisée de met-
tre à mort le sang Royal. Les Princes cir-
cōuoisins de l'isle d'Itaque presupposans
qu'Vlysses fust dés pieca pery en la mer
au retour de Troye, cōplotterent de faire
mourir son fils Telemaque, pour iouyr
plus en seureté de son Royaume , l'vn
d'entr'eux espousant sa mere Penelope;
& s'y estoient desia tous condescendus,
fors vn seul Antinome, le moins peruert
& le plus clairvoyant d'eux tous, qui leur
alla dire ; Vous vous abusez Messieurs,
vous comptez sans l'hoste; car c'est vne
chose trop griefue & trop difficile de
mettre à mort le sang Royal; mais sachōs

premierement quel sera le vouloir des dieux là dessus. Si le grand Iuppiter l'approuue , i'y mettray aussi la main des premiers ; mais si les dieux ne le consentent, ie suis d'aduis que nous nous en deportions aussi. Ce qui nous apprend que les Roys sont en plus particuliere recommandation enuers la sauuegarde diuine que non pas les personnes priuees. Ceste chaste Penelope au reste gardât ainsi cōstamment sa foy enuers son legitime espouz , nous represente la France , & les vrais naturels Frâçois, qui se sont retenus en l'obeissance deuë & requise à de bons & fidelles subiects; & ceux encore qui s'estâs en fin desceiglé les yeux du sommeil où ils auoient esté endormis par les charmes de ces forciers , retourneront à leur accoustumé debuoir. Vlysse est le Roy, qui a eu beaucoup d'ennuys & de trauerses par ceux qui donnans à entendre qu'il estoit pery , prochassoient d'espouser sa femme ; mais par sa prudence (c'est la Minerue, dont il est assisté à la conduite de ses affaires) avec sa valeur bellique; car ceste Deesse preside à l'vn & à l'autre; il exterminera en fin tous ces maudits

mal'heureux Proques, suborneurs & sol-
 liciteurs de sa chere espouse ; & dissipateurs de son bien. Et certes on ne me
 scauroit faire accroire, que telles machi-
 nations clandestines peussent entrer non
 qu'en vn Royal cœur, mais en nul autre
 qui eust tant soit peu de generosité & no-
 blesse: C'est vn infallible tesmoignage de
 lascheté, d'attenter par de telles voyes à
 la personne de leur pareil, & de la mesme
 dignité, laquelle ils donneroient occa-
 sion de violer, & auoir à mespris le res-
 pect qu'on y doit porter: Ne de proceder
 autrement enuers eux sinon selon que le
 droict & debvoir de la guerre le requiert,
 & le peult souffrir, nompas par des assassi-
 nats cōtre ceux dont on redoubte la va-
 leur. C'est le mestier de ce vieillard de la
 mōtaine, d'escript par Marco Polo Ve-
 nitien en ses narratiōs de la Tartarie ; qui
 apres auoir quelque temps fait des sien-
 nes conformement à celles cy, eut en fin
 vne issuë correspondante à ses meurtres
 & villaqueries. Alexandre de Macedoi-
 ne, qui pour ses beaux-faiets obtint le
 surnom de grand, aiant pris Porus Roy
 des Indes en vn gros conflict, luy demā-

da comme il vouloit qu'il le traictast? **E** **N**
R o y, respondit-il, parce que ce seul mot
cōprenoit toutes les courtoisies & hon-
nestetez, dont il le pourroit particuliere-
ment requerir. Et le Roy Pyrrhus aiant
gagné deux ou trois grosses batailles cō-
tre les Romains dans l'Italie, son Medec-
cin leur enuoya offrir de l'empoison-
ner; mais tant s'en fault qu'ils y voulus-
sent prester l'aureille, qu'au contraire
tout soudain ils l'en aduertirēt, affin qu'il
s'en donnast de garde; luy mandans de
plus, qu'ils n'auoient point accoustumé
de vaincre par de telles meschancetez,
ny venir à bout de leurs ennemis, fors
que par leur seule vertu & effort d'armes;
ce qui le reconcilia à eux. Et le Dictateur
Camillus ne r'enuoya il pas pieds &
poings liez aux Phaliskues, ce desloyal
Maistre d'eschole qui luy estoit venu li-
urer les enfans des meilleures maisons,
soubz couleur de les mener prendre l'air;
pour aultant d'ostages, ce disoit-il, d'a-
uoir ceste ville qu'il tenoit assiegee? Dōt
les autres voians ceste si grande preu-
d'homie & genereuse integrité, se ren-
dirēt à luy volontairement. De ces trai-

stresses chippoteries du tout indignes de gens d'honneur, Thucydide en touche vn beau traict au 4. de ses histoires. La fraude estant en tout & par tout une chose vituperable, elle est encore plus maljeante & odieuse es personnes de qualité, & bien plus honteuse & blasmable, que la force & la violence; laquelle s'aidant du pouuoir que la fortune luy octroie, fait son effort à descouuert; là où la fraude y procede en trahison & d'emblee par des machinations illicites, d'une inique & peruerse entente.

VOILA en fin ce que c'est de la trahison, & des traistres, qui pourront bien plaire pour quelque temps, mais apres qu'on en aura tiré ce qu'on pretéd, ils seront toujours detestables aux traistres mesmes, selon que naturellement on abhorre vn vice dont on est entaché, en d'autres que loy, & mesmement la trahison, bien qu'on s'en serue (*odi proditorem, prodicionem amo*): Si que ceux là mesmes qui vous ont induits à commettre ces meschancetez, vous iadis François, & maintenant reprouuez vallets & esclaves Espagnolisez, nonobstant qu'on les puisse dire les plus corrompus de tous

autres ; si ne laissent ils pas toutefois de vo^r auoir en telle abominati^on & horreur, que vous voyans parmy les ruës ils tournēt la teste de l'autre costē, de peur de s'infecter de vostre puāte empoisonēe haleine, & crachent en terre de despit & hōte qu'ils ont d'estre cōtraints de cōuerser avec de si mal'heureuses desloialles canailles ; se mocquans au reste de vostre bestise & aueuglemēt qui vous laissez ainsi piper a ieu descouuert. Car ils ne battent plus sur le faict de la religion, comme ils souloient faire ; Il n'est desormais question que d'annexer ceste Corone (mais elle tient trop) à leur pretenduē Monarchie : & ne l'ayant peu faire par la voye directe des efforts-d'armes, ils ont eu recours à la trahison, qui seule a peu renuerſer les plus grands Empires. Mais laissons ce si ennuieux propos ; chacun n'a-il pas peu veoir & oyr les protestations & menaces que par vne par trop impudente & superbe arrogance effrontee fit le Comte d'Oliuarez, & depuis bien plus oultrageusement encore le Duc de Sesse à sa Saintētē, & à tout le S. ſiege ? En voicy la forme & teneur. *En premier lieu qu'ils se-*

ront mourir de faim Rome s'ils admettent la conuersion du Roy de Nauarre, en ne permettant d'y venir aucuns bleds de la Sicile, Pouilhe & Calabre. De faire faire vn Schisme en Espagne, bien plus dangereux que celuy qu'on pourroit attendre de France. De moiennner vne diuision parmy les Cardinaux, qui sera d'vn grand prejudice à sa Sainteté. Susciter & induire l'Empereur à repeter Rome, & autres villes, comme estans de l'Empire, & mal donnees aux Papes par l'Empereur Constantin : & se constitueront les executeurs de ceste Demande ; & en tous cas luy feront guerre ouuerte ; comme l'Empereur Charles fit au Pape Paule Farnese. Feront intimer vn Concile general contre le Pape mesme : & par le moyen de l'Empereur, au nōdes Princes d'Allemagne, & autres Potentats, luy feront la guerre iusques dans Rome. Qu'ils se declareront ennemis Capitaux de ses nepueux & de toute leur race. E T au contraire, que par l'e-
 uersion & ruine du Royaume de France, les Prouinces & villes d'iceluy se trouuans partialisees & affoiblies par la guerre ; rendront au Pape plus de submission & obeissance qu'auparauant ce dissipement. Que les Parlements, qui luy souloient si fort contredire, & s'opposer à son authorité absolue, viendront peu à peu à

cesser du tout , le Clergé a se desmembrer ; & la
 Sorbone sera esteinte ; ses trois plus grands obsta-
 cles & contrescarres , lesquels ioincts & unis
 ensemble ont souuēt corrigé , modifié , retranché
 les pouuoirs & facultez des Legats ; & conser-
 ué les droicts , priuileges , franchises , & im-
 munitex de l'Eglise Gallicane ; s'opposans aux
 decrets des Papes. Parinsi la Royauté sera abba-
 tue , & les Estats s'en iront en fumee , qui ne
 font que ce qu'il leur plait à l'obeissance de sa
 Saincteté. DE vouloir rien glosier ny para-
 phraiser là dessus , ce seroit faire tort au
 texte , qui n'est qu'assez clair & intelligen-
 ble de soy. Mais quelle obeissance filiale
 (ie vous supplie) quel zele , pieté & deu-
 tion Catholique ! quelle bonne & sincere
 affection au bien vniuersel de la Chre-
 stienté ! ou plustost , quel orgueil , quelle
 impudente & ambitieuse brauade ! Est-ce
 vn langage de Chrestien ? Est-ce parler
 en modestes & obeissans enfans de l'E-
 glise , tels qu'ils veullent qu'on les tiennne
 estre par dessus tous aultres ? Est-ce le re-
 spect qu'on doit porter au Sainct siege , &
 au sacre-sainct Vicaire de Dieu en terre ;
 successeur de Sainct Pierre , & chef de
 l'Eglise militante ? que sçauroient faire

ne

ne dire de plus arrogant & insupportable, vn grand Cham de Catai ; vn Roy de la Chine , vn Turc , vn Sophi , & semblables tyrans infidelles ? Et puis il n'y a point de bõs & vrais Catholiques qu'eux ; Tous les autres sont mescreans , Ethniques, Payens , Atheistes, Heretiques, Anathematisez ; & par consequant tous les Empires , tous les Royaumes & Seigneuries de la terre leur sont acquises & confisquées. Dont en eux se pratique fort bien ce qui est escrit en de S. Matthieu. II. cha. *Regnum calorum vim patitur; & violenti rapiunt illud* : car ils le veulent auoir de force , & emporter par violence : Mais c'est sous pretexte du royaume des cieux, celui de France, qui le leur voudroit consentir. Car pour cest effect n'ont-ils pas remué le ciel & la terre depuis quelques ans ? remply tout de troubles & combustions ? qu'ont ils oublié d'effroyables criaileries , intimidemens & menaces pour estonner & diuertir Monseigneur le Duc de Neuers , Prince hors de toute exception , & d'une telle & si singuliere, de tout temps cogneuë & esprouuée pieté , deuotion, integrité, & zele à la reli-

G

gion Catholique que chacun sçait ; d'aller à Rome où il s'estoit acheminé pour y rendre l'obeissance au S. Siege de la part de sa Maiesté tres-Chrestienne. Quelles ont esté d'autrepart les requisitions & instances tout à descouvert, sans plus rien feindre ne desguiser, du Duc de Ferie à Paris ; & les deportemens de leur stipendiaire Legat (i'ay honte d'alleguer les nostres du mesme chapeau , c'est tousiours d'autant descrier la nation, & ceste sainte dignité) le Legat , non dis-je de celuy qui pour raison du lieu qu'il tient en terre se deburoit egallement monstrier pere commun , sans plus balancer d'un costé que d'autre ; mais des Espagnols, & de leur ligue seditieuse, comme en voicy de tresbonnes marques & enseignes en la lettre du feu Duc de Parme à sa Maiesté Catholique , de l'an 1592.

Vostre Royale Maiesté entendra s'il luy plait, que i'ay trouué l'Euesque de Plaisance si bien instruit des affaires de pardeça , & si prompt & affectionné au Royal seruice d'icelle, que ie n'ay peu moins que d'escrire au Duc de Sesse, de tenir la main enuers sa Saincteté de le promouvoir au cardinalat ; ce que nous esperons d'obte-

nir, & par mesme moyen la Legation pour luy-mesme ; qui feroit le plus grand coup d'Estat qu'on scauroit frapper pour paruenir au gaing de nostre cause. Et ce qui fuit de ce propos. Mais bien plus à la desbandee ce bon Legat audit Duc de Parme. : Si nous n'auions affaire à des gens engagez desia si auant, qu'ils croient aussi bien aux promesses cōme aux effets, ie me trouuerois bien plus empesché, & n'aurois pas si bonne esperance du succez de nos pretentions. Vray est que ce peu d'argent enuoyé puis vostre passage a fait merueilles. Nostre garnison a temporisé iusqu'icy entre beaucoup de difficultez. Vostre Altezze se souuiendra de ce que ie luy ay autresfois souuent dit des anciens Ministres & officiers de cest Estat : dont il conuient se descharger comment que ce soit, parce qu'ils ruinent les affaires de sa Maiesté. Cependant i'espere faire en sorte, que ce bruiet d'accord qu'on fait courir de tous costez, aura autre effect qu'on ne pense, pourueu que vostre Altezze n'oublie de son costé les belles promesses, dont le temps nous pourra deliurer à bon prix. Le zele & affection extreme que i'ay au seruice de sa Royale Maiesté; & encore particulièrement à vostre Altezze, qui peut & doit esperer vne grãd gloire & aduātage d'une

d'une si haultaine entreprise; laquelle au pis aller ne scauroit auoir moindre effect ; que de ruiner les plus d'agereux ennemis de sa Maieſte, meſait redoubler ceſt aduis. C'eſt parlé , celà: c'eſt fort bien & ſincerement ſ'acquitter du debuoir de celuy qui repreſente la perſonne du grand & ſouuerain Paſteur icy bas ; le Vicaire de Dieu en terre ; qui ne doit auoir en plus particuliere recommandation l'un de ſes enfans que les autres : qui ne doit taſcher qu'à les maintenir en bonne paix , amitié & accord enſemble. Et parlà on peut veoir de quel eſprit ceſt tant bons & zelez Catholiques ſont meus & pouſſez ; dont les ſecretes intentions ſe ſont encore mieux deſcouuertes , par la depeſche que fit ce meſme Legat à ſa Saincteté , peu apres les trefues accordees au mois d'Aouſt mil cinq cens quatre vingts treze , pour rompre laquelle ils offrirent cent mille eſcus à mōſieur de Mayenne, & dix mille pour les eſpingles de Madame. Par ceſte depeſche il diſcouroit fort par le menu de tout ce qui ſ'eſtoit paſſé en ceſt endroit ; & entre autres choſes qu'ils auoient eſté contraincts aux Eſtats de Paris, ſe voians

debouttez de l'Archiduc Ernest , & de l'Infante , de mettre en auant le mariage d'elle & du Duc de Guise ; non pour intèrion d'entretenir leurs promesses, mais esperans par ce moyen diuertir la conuersion du Roy : & que quand ledit Archiduc seroit descendu es pays bas avec la puissante armee qu'on en attendoit, ils feroient accorder par force ce qu'ils n'auoient peu obtenir de bonne volonté. Est-il possible que ce pauvre peuple se soit ainsi laissé enforceller & seduire si à descouuert ? Certes on peut dire qu'il s'est monstré merueilleusement desbauché. le voulons nous veoir depaint au vif de ses couleurs , & si naïfvement representé qu'il ne seroit pas possible de plus, en ceste mal conseillée adultere descripte par le Prophete Osee au 2. chap. *Elle n'est pas ma femme , ny ie ne suis point son mary ; parquoy ie n'auray aucune pitié de ses enfans , d'autant qu'ils ont esté procreez de fornication , & leur mere est vne putain , qui est demeuree toute honteuse & confuse de les auoir enfantez ; & a dit ; Je quitteray là mon mary , & m'en iray apres mes Rufians , qui m'ont donné du pain , & à boire ; ma laine & mon*

lin , & mon huile. Mais qu'est-ce que dit le mary là dessus ? Je luy fermeray bien le chemin , & luy estouperay la voye d'une forte haye d'espines , & d'une muraille si bien maçonnée, qu'elle ne pourra point trouver d'issue pour passer oultre. En vain elle poursuiura ses putiers, car elle ne les atteindra pas : Elle les cherchera , & si ne les pourra trouver : Dont elle viendra à dire ; Je m'en retourneray à mon premier mary , où il m'estoit trop mieux qu'à ceste heure. Et voicy qu'il luy respondra : Je reviendray , & reprendray mon bled , & mon vin que ie luy soulois donner ; ma laine & mon lin dont elle couvroit sa charneure ; & reueleray son ordure aux yeux de ses ennemis, qui la poursuiuoient ; & personne ne la deliurera de mes mains. J'aboliray toute sa ioye , & feray cesser ses plaisirs. Je gasteray sa vigne avec ses figuiers , dont il luy est eschappé de dire ; ce sont icy mes salaires & payemens que mes amoureux m'ont donné pour m'estre à eux habandonnée ; mais ie reduiray le tout en friche , en landes & pastis, que le bestial des champs broutera. Est-il possible de veoir rien de plus conformément exprimé , ne qui peust mieux conuenir à ceste Ligue , que ce qui nous en est icy remis deuant les yeux,

par ceste parabole ? Il semble certes que le Prophete ne visast qu'à nous remarquer ceste inconstante perfidie & desloyaulté par l'exemple d'une pailarde qui se prostitue à qui plus luy donne. Et à ce propos il se lit dans noz Annalles, que les Geneuoys ayans enuoyé leurs deputez vers le Roy Loys douziésme pour se rendre à luy; surce qu'ils luy dirent, SIRE les Geneuoys se donnent à vous. Et ie les donne à tous les diables, alla il respondre; cognoissant assez leur legereté & bizarrerie, & abhorrant ceux qui estoient, ainsi que sont les nostres, proditeurs d'eux-mesmes, & de leur ancienne liberté & franchise, pour se soubsmettre en la subiection d'autrui. De sorte que ie ne puis bonnement comprendre comme vn si grand & puissant Monarque; qui a tant de Royaumes à gouverner; tant de Provinces & regions soubz son obeissance, espendues en diuers endroits de la terre; & par consequant tant de peine à les conseruer; tant de soulcy à les defendre: qui a tant de coronas à porter, & tant de Sceptres à empoigner, qu'il luy

G iiij

fauldroit le chef d'un autre Atlas qui soutint le ciel ; & les cent bras de Briareus, encore ne luy pourroient-ils pas suffire ; voulust se charger de ces gens là , qui meslez avec ses bons & loyaux subiects, ne feroiēt que les desbaucher , depraver & corrompre ; comme firent iadis les Saxons , ceux avec qui Charlemagne les voulut habituer : C'est de mesme que si on broüilloit du poison avec quelque bonne viande. Mais on s'en sçaura bien defaire , pourront ils dire ; & repeuplera lon le pays de nouveaux habitās , de leur nation Catholique , comme ils sont coustumiers de faire par tout : ie le crois bien , & que telle fust leur entente. Mais est-il possible qu'une telle demesuree ambition ; vne conuoitise si insatiable de dominer & s'accroistre oultre toute mesure , puisse auoir lieu en vn cœur ia tout enlangoré , & fenné-festry de vieillesse ; ratiédy , comme il deburoit estre , des accidents qu'elle charrie ; mesmement n'ayant point d'hoirs massés , s'il se fault arrester à ce commun dire , *que qui n'en a qu'un n'en a point* ; & encore où il y a si peu d'attente ? Celà pourroit estre plus tol-

lerable en vn ieune Prince, ardēt & con-
 uoiteux de gloire, & en ses premiers
 bouillons de ieunesse; pauvre au reste &
 necessiteux selon son degré. Mais qu'un
 si riche & opulent monarque; vn si grand
 Roy qui a fait son temps, & iouy en paix
 du repos à luy acquis par les sueurs & ex-
 ploits-d'armes de sō feu pere; chose dou-
 ce à la verité entre toutes autres, & mise
 entre les plus grandes bien-heuretez tē-
 porelles, cela est estrange, & de le veoir
 en ce profond eage tout enuveloppé
 de sommeil & oisiveté; & à qui la fortune
 deormais lasse & ennuyee de faire vn
 si long seiour en vn mesme endroit, incō-
 stante & volage qu'elle est, commence à
 se desgouster de luy rire comme elle sou-
 loit; tellement que de le veoir ainsi mu-
 guetter ceste corone, cela feroit resou-
 uenir de la comedie des estourdis, où ie
 ne sçay quel vicil touffeur cracheur de
 Pantalons s'estant amouraché d'une belle
 ieune bourgeoise, cōsulte avec son cour-
 retier Zany de la maniere qu'il doit tenir
 pour se faire bien vouloir d'elle; & ce for-
 tante, qui luy tire la lāgue en derriere, luy
 conseille de se descrasser, sauonner, par-

fumer; sur quoy ce bel amoureux luy dōne vn carolus pour luy aller acheter de la ciuette & du sauon muscat. *Spectatum admissi risum teneatis amici?* Ne se vouldra-il pas aussi en fin faire Pape ? comme à la verité il y aspire , nonobstant que plus que Quadrigame , afin de se rendre absolu Monarque , tant au spirituel , qu'au temporel , comme furent iadis les Caliphes : & qu'en luy se|practique ce dire du Poete , *Rex Anyus, rex idem hominum, phœbique Sacerdos*. Or c'est vne fort belle conqueſte, de biē conseruer ce qu'on a de peur de tōbeten l'incōueniēt de ce chien d'Esope; lequel emporant vne bribbe, de chair, cōme il vint à passer vne eau , où il en apperceut l'ombre dedans , d'ardeur qu'il eut de l'empoigner , lascha celle qu'il tenoit aux dents , & par ce moien fut frustré de l'vne & de l'autre. Tout de mesme sera-il de ceste vaine & temeraire entreprise d'empietter ce Royaume; aussi tost viendroient-ils à bout de boire l'Ebre , à en puiser encore l'eau avec la paulme de la main. Ce peuple qui à peine peut durer avec soy-mesme, comment pourroit-il compatir avec vn E-

spagnol, le pire hôte & compersonnier de tous autres ? ce dient ceux qui en ont tasté. Tant de magnanimes & courageux Princes, avec vne si nombreuse noblesse, lairront-ils leur ancienne & accoustumee liberté Françoise, pour s'aller atteler & soubsmettre au dur ioug de la seruitude dont ils voient de si clairs & recents exemples deuant leurs yeux ? Abandonneront-ils laschement leur droict & legitime Roy en la fleur de son eage ; si preux & vaillant, si benin, courtois, gracieux, debonnaire, si priué & si familier, qui leur rit indifferemment à toute heure, les accolle, carresse, embrasse ; se donne à eux, & tout tant qu'il a : qui se rend leur pair & compaignon és faicts-d'armes les plus hazardoux & penibles, le premier à la charge, & le dernier à la retraite, autant braue & hardy soldat, que sage & experimenté capitaine ; vn vray exemplaire & patron de toute generosité & vertu ? Voudroient-ils donques l'eschanger estant tel, pour vn estranger vieil & caducq, dont le naturel solitaire &

la viellesse si aduancee ne permettent pas d'en veoir l'ombre que tres-rarement? commuer leur tant beau, tant clair & serrein soleil leuant, que tous peuples & nations reuerent plus volontiers (ce disoit Pompee à Sylla) que le couchant; à vn morne sombre & melancholique prest à se coucher, ia saisy & enueloppé de tenebres, & plongé bien-auant dans l'ombre de la terre? Ceste belle aurore Françoise reuestue de son aulbe blanche & resplendissante, annōciatrice du iour où toutes choses se r'allegrent, comme au symbole de la vie; pour vn soir terne & liuide, precursor de la chagrine & ennuyeuse nuit, où se rengregent toutes douleurs, ennuys, fascheries; marque au reste & portecornette de la mort? Contaminer ceste belle, vierge, pure & immaculee liuree blanche, d'un sanglant rouge tout souillé de meurtres & effusion de sang, de desolations & ruines, de pleurs & gémissemens lamentables? Car le blâc correspond à la lumiere, & à la vie: & le rouge aux tenebres, & à celle qui aneantist toutes choses, la mort: aussi les phenoménistes approprient le blanc au matin; & le

rouge au soir, qui se rapporte à l'Occidēt où est située l'Espagne, & la fin de la terre habitée; dont pourroit estre venu le proverbe, *rouge soir & blanc matin*. Mais qu'est ce qui en est dit au Pseaume 29.

Ad vesperum demorabitur fletus, & ad matutinum tempus latitia. En la lune la blancheur denote la serenité; & la rougeur le mauuais temps de tourbillons, pluyes, orages & tempestes qui troublent l'air, rauagent la mer & la terre, & y dissipent toutes choses. Certes ce seroit bien faire vn pire eschange; & vne plus dommageable permutation, que celle que fait Glaucus dans le 6. de l'Iliade, de ses riches armes dorees qui valloient cent bœufs, avec celles de Diomedee, qui n'estoient que d'airain, & à peine eualuees à dix.

Ne vucillōs penser au surplus que ces deux maisons les plus puissantes de l'Europe, France & Espagne, emulatrices de longuemain l'une de l'autre, comme furent iadis les Romains & Carthaginois, qui ne cesserent de se quereller tant que l'un des deux eust donné du nez à terre; aient temerairement & à la volée chargé ces deux liures blanche & rouge; ny

leurs ordres & deuises nomplus, de S. Michel, & la toison d'or; cela vient de plus haut que parauanture on ne cuideroit; car rien ne se fait sur la terre, aumoins d'importance, qui ne soit meu, & comme ia esbauché du ciel. La couleur blanche a autant d'auantage, de superiorité & preeminence par dessus la rouge, que la lumiere sur les tenebres, le iour sur la nuict, l'esté sur l'hyuer, la ieunesse sur la vielleffe, la santé sur la maladie, la paix sur la guerre, le repos sur le trauail, l'amitié, concorde & vnion, sur l'inimitié, discorde & diuision, la vie sur la mort; & finalement le blanc Iacob, enfant de benediction, sur le reprouué Esau, autrement Edom, qui signifie rouge. A ce mesme propos; *meliora sunt ubera tua vino*, là le laiët qui est blanc, & pour ceste occasion les Latins ont tiré ce mot de *albedo* blancheur, ou *album*, blanc, de l'Hebrieu *alb*, qui signifie laiët, denoté par les mammellés; est preferé au vin presupposé estre rouge, suiuant ce que le Philosophe Callisthenes en voulant destourner Alexandre du vin, l'ap-

pelloit le sang de la terre : & en l'E-
 scripture Saincte il est pris allegorique-
 ment pour la ruze & sagesse mondaine,
 qui deçoit la pluspart du temps ceux qui
 s'y arrestét: là où le laiët represente la co-
 gnoissance des choses diuines; de quoy il
 est dit en l'Ecclesia. deuxiesme est. *J'ay propo-
 sé en mon cœur de retirer ma chair du vin , à
 fin de m'addonner à la sapience ;* le laiët est
 le premier nourrissement de la creatu-
 re, la plus douce substance de toutes,
 & qui a le plus d'affinité & consentement
 avec la nature. Là où le vin enyure &
 depraue les personnes. Le sang d'autre
 part est ordinairement interpreté pour
 la cruauté, meurtres , saccagemens, &
 mort aduancee , violente & hastiue,
 qu'Homere appelle mort empourpree,
 pour le sang qui y est respandu de cou-
 leur de pourpre: & au 4. de Genese: *la
 voix du sang de ton frere crie de la terre apres
 moy ;* assauoir l'homicide perpetré en
 Abel par Cain. Et au 27. de saint Mat-
 thieu; *son sang* (la mort du Sauueur) *soit
 sur nous , & sur nos enfans* (disoient
 les Iuifs à Pilate.) Et luy à eulx;

Je suis inculpable du sang de ce iuste. Telle est la signifiante du sang ; & par consequent de la couleur rouge ; qui en la secrete theologie Hebraique denote tousiours ghebura on rigueur & seuerité ; & la blancheur ghedulah, misericorde & clemence. Les vestemens de IESVS CHRIST en sa transfiguration deuindrent blancs comme la neige. Et au 6. de l'Apocalypse parlant de ces benoists martyrisez pour la foy Chrestienne ; Jusques à quand Seigneur ne vengeras-tu nostre sang ? Et leur fut donnee à chacun vne aube blanche : Aiant mis vn peu auparauint, que l'Ange à qui fut donnee la victoire, & la coroné estoit monté sur vn cheual blanc ; & à celui qui estoit monté sur le rouge, le pouuoir d'oster la paix de la terre, avec vn grãd coutelas au poing, afin qu'on se massacraist l'vn l'autre. Mais au premier d'Isaie bié plus manifestemēt : Quand bien vos pechez seroient aussi rouges que sine escarlatté, si seront-ils blanchis comme neige : & ores qu'ils fussent plus rouges que vermillion, ils deuindront blancs comme laine. là ou on peut veoir comme le rouge est pris tout à trac en mauuaise part pour l'iniquité & deprauation : & le blanc en la
bonne,

bonne, pour l'innocence & integrité. La lumiere primitiue & naturelle est blanche, dit le Zohar; assauoir celle du Soleil, dont toutes choses sont resioüies, maintenues & viuifiées : & la rouge est celle du commun destructeur, le feu d'icy bas, qui ruine, deuore & reduit à neant tout ce qu'il peut apprehender, & où il peut mordre; de sorte que c'est vn tres-mauuais hoste; lequel ne logeant iamais chez soy, ains chez autruy, ne cesse qu'il n'ait du tout exterminé ce qui l'heberge, & le nourrist; comme font les Espagnols: & telle est la propriété du feu rouge ardent, bruslant, & consumant tout; là où le feu blanc est le feu de chaleur generatiue & nutritiue; le feu de dilection, charité & amour: Et en fin l'interpretation du laiët & du vin (de la France & de l'Espagne) & la precellence de l'vn sur l'autre; & par consequât de ceux qui en sont designez: Mais de les vouloir ioindre & mesler ensemble, ce seroit bien encore pis. L'espoux semble de s'en plaindre dans le 5. des Cantiques : *J'ay mangé* (dit-il) *mon rayon avec mon miel, & ben mon vin avec mon laiët*; lesquels estans

H

chacun aparsoy sont de bõ goust, & d'un
nourrissement salubre; s'ils sont confon-
dus & brouilhez, cela les corrompt &
gaste: par le vin, comme a esté dit, estant
denotee l'astuce & malice; & par le laiçt
la prud'homme & bonney. Par le vin
l'arbre de science de bien & de mal, assa-
voir la vaine curiosité des choses terrien-
nes: Et par le laiçt, l'arbre de vie, dont
Adam fut priué pour auoir à l'instigation
du serpent voulu gouter de cest autre là,
qui estoit la sagesse mondaine; & se trou-
ua nud & destitué de la cognoissance des
choses diuines, que Dieu auoit aupara-
uant introduitte en luy. Oyons ce qu'en
touchent les meditatiues contéplations
du Zohar. *Deuant qu'Adam eust transgressé,*
il estoit fait participant de la sapience de la lu-
miere superieure, ne s'estant point encore separé
de l'arbre de vie; mais quand il se voulut de-
stourner de là pour se transporter apres la no-
tice des choses basses, & des caultelles du serpēt,
ceste curiosité ne cessa tant qu'elle l'eust du tout
despouilhé du fruiçt de vie, pour l'incorporer à
la mort. C'est pourquoy le mot Hebieu
harom, non sans cause signifie tāt nud q̃ ru-
zé; cōme si cela vouloit dire que ceux qui

par leurs finesſſes à eux venues en partage des Africains, taſchent à ſupplâter & circonuenir tous les autres ; & ſ'emparer frauduleuſement de ce où ils n'ont que veoir, ſe trouueront à la parfin (car Dieu qui eſt tout equitable , le permettra ainſi par ſon infallible iuſtice) deſnuez du leur propre. Meſſer doncq le laiët avec le vain , le blanc & le rouge enſemble, n'eſt autre choſe,

*Qu'eſtre François de nation,
Et Eſpagnol d'affection.*

Le meſme que de vouloir labourer avec le bœuf & l'aſne attellez à vne charruë: Semer d'autres ſemées dans ſa vigne: & ſe veſtir d'un accouſtrement tiſſu de laine & de lin ; Toutes choſes defendues en la loy diuine: d'auoir le pied en deux eſcarpins ; vouloir humer & ſouffler tout enſemble: ou bien eſtre tiedde, ne froid , ne chauld, en danger d'eſtre reiecté: ce ſeroit de vray vne race meſtifue, telle q̃ des Hippocentaures, que Pindare dit n'auoir pleu aux dieux ny aux hommes; cōme pour le iourd'huy aux Indes, où les Eſpagnols ſe ſont entez deſſus les naturelles du pais : de meſme que firent iadis les Mores ſur

H ij

les femmes Espagnolles dont l'engiance en persiste encore. Les vrais & naturels François ne sçauroient souffrir ny admettre de tels meslanges, ny se bigarrer & escarteler de blanc & de rouge; qui mixtionnez, cōme on peut veoir en de la craye blanche, & du vermeillon; ou du saphran destrempé en eau, viēnent à procreer vn iaulne de couleur de fiel, marque d'ennuy, & d'amertume, de maladie & priuation de vie, ainsi que ja a esté dit de *l'Amarillo*. Parquoy il vault mieux de se retenir chacun à par-soy, que de se mesler l'vn avec l'autre; car ce brouillement ne sçauroit seruir qu'à souilher ceste belle naïfue blancheur, qui ne desire point d'estre alteree, comme elle seroit si la moindre tache de ce sanglant rouge estranger s'y venoit à ioindre & mesler, dont elle resteroit contaminee. Pour le moindre mal s'en procreeroit ceste incarnatin que les Hebrieux appellent *techelech*, & l'attribuent à là seconde iournee de la creation, priuee de la benediction des autres cinq, en toutes lesquelles il estoit dit, *que Dieu vit que tout ce qu'il auoit fait estoit beau & bon*: Et en

ceste seconde iournee point du tout. Si
 que le Zohar fait ce second incarnatin,
 (l'Espagne assauoir posterieure en loyau-
 té, prud'homnie & integrité à toutes au-
 tres nations, qui en ce cas la precedent)
 inferieur de beaucoup à la couleur blan-
 che: pource qu'il se transchange facile-
 mēt en diuers degrez d'incarnats, les vns
 plus chargez ou deschargez que les au-
 tres; là où la blancheur n'admet point de
 varieté, ains demeure tousiours la mesme
 en sa pureté & splendeur, qui ne s'alterēt
 aucunement, si on ne la veult cōtaminer:
 Aussi denote elle, comme a esté dit, la lu-
 miere superieure; Iaacob ou Israel, ce
 met-il là encore; & le rouge Esau ou E-
 dom, dont vindrent les Idumeâs proge-
 niteurs des Mores; qui s'annicherent es
 Espagnes; & planterent là leur posterité.
 Mais cherchons encore quelque chose
 qui se puisse rapporter aux liurees de ces
 deux puissantes maisons. Riē n'y sçauroit
 mieux conuenir, ce me semble, que les
 deux plus riches & precieuses pierreries
 de toutes autres, le diamant & le rubis.
 Le diamant brille & esclatte vne clair-
 gaye lumiere blāche, qui resioūt l'œil. Et

H iij

le rubis darde à la veuë ie ne sçay quels rayons enflâbez, qui offensent plus qu'ils ne plaisent. Rien ne mord sur le diamant que le diamant propre: aussi ne pouuions no' estre ainsi trauaillez, formenez & endōmagez que par nous-mesmes, ou pour le moins que nous n'y eussions tenu la main. Le diamant est indomptable sous les marteaux & les enclumes, & à toute autre chose; *Maximum in rebus humanis non solum inter gemmas pretium habet adamas, incudibus ita respuens ictum, ut ferrum utrinque dissiptet, incudisque ipsæ dissiliant: duritia innarrabilis, simulque ignium victrix natura; Et numquam incallescens.* Mais il entre bien dans le rubis, qui est subiect à se casser; le penetrer, tailler, briser, & y imprime ce qu'on veut, cōme nous ferons Dieu aydant aux Espagnols; dont le Roy il y a quelques vingt-six ou vingt-sept ans fit par vne vaine obstentation, grauer par le graueur du Bourg à Rome, excellēt maître, en vn diamāt de vingt mille escus, le blason de ses armoiries, fort malaisées pour tant de quartiers qu'il y a; Et ce, disoient lors quelques vns de leurs partisans, pour monstrier ainsi que par quel-

ques lettres hieroglyphiques, que tout de mesme l'Espagne mordroit & anchreroit sur la France; car deslors ils y proie&toiét leurs coups avec nos trahistres : Mais d'autres moins passionnez, & plus clairvoyans l'interpreterent tout au rebours à vn mauuais presage pour l'Espagne; car cela sembloit prognostiquer, qu'elle seroit vn iour en la puissance & domination des François; à quoy eux aians voulu preuenir, ils n'ont parauenture fait autre chose, que de haster leur destince, comme font la plus-part du temps ceux qui la cudent euitier. Et pourtant disoit fort bien Zoroastre, *Non urgendum esse fatum.*

VENONS maintenant aux deux croix, la nostre conforme à celle du Redempteur, a quatre angles droicts, entr'eux semblables & egaux, dont il n'y a rien de plus ferme & moins variable : Et la leur oblique & de biez, a angles camus & aigus, qui peuuēt estre d'infinies sortes selō qu'ils s'aprochent plus ou s'esloignēt de l'angle droit : Estant au reste attribue à S. André, & d'aultant inferieure par consequant à la croix Nostre. **Q V A N T** aux

H iij

ordres , qui ne sont pas nom plus sans de grands mysteres ; quelle comparaison y peult-il auoir de ceste vieilhe tantouilhee vermolue pelisse qu'on appelle la toison d'or , prouenue du bellier Ammon , ou Ammonino , genie tutelaire des Egyptiens , dont il souloit estre anciennement idolatré es sablons & desers de Libye (l'Euangile l'appelle Mammone d'iniquité , mot Syriaque) la richesse mondaine , & le contr'oppose à Dieu ? car ne pensez pas que ce soit la despouille de ce mouton qui porta Phryxus en Colchos , d'où Iason l'enleua depuis avec l'échanteresse Medee ; Il ya bien d'autres secrets cachez là deffoubs. Cōment donques se pourroit mesurer , ny à quel tiltre , ce Cacodemon prefect de l'Egypte , dit en Hebrieu *Misrahim* ou angoisse , avec Nostre benoist Archange Michel , superintendant de la France ? ce *Sarhapanim* Prince des Faces , qui sont les ministres & executeurs des commandemens du grād Dieu : estably au reste soubs l'autorité du Messie gardiā de toutes les ames raisonnables ; comme l'Ammonino son aduersaire l'est sur la chair & sur le sang , de-

notez par la couleur incarnate qui vient de chair, cōme qui diroit incarnée ou acharnée apres l'effusiō de sang? C'est le cōnestable de toute la milice celeste, craint & reueré de tous les potentats de la terre, & des soubf anges qui leur assistent: celui qui tient suppedité sous les pieds l'ancien de tout temps ennemy du genre humain, le draghon, avec tous les adherans & complices. Aussi est-il bien raisonnable que ceste puissance tertienne, qui la premiere de toutes autres est venue à la cognoissance du fils de Dieu, eust pour son intelligence assistente, pour son patrō & protecteur ce souuerain ministre sien; car on ne fait point de doute que chaque Royaume, comme a esté dit, chaque prouince, & cité, voire les personnes particulieres n'ayent des Anges gardians, tant ordinaires que permissifs, dont il faut par necessité qu'il y en ayt vn qui preside aux autres; & par consequēt que le Potentat terrien à qui il aura esté attribué, soit le premier de tous en degré, & les precede. Voulōs nous veoir ce qu'en met le liure d'*Abahir* ou de la splendeur, allegué fort souuent au Zohar?

Tout ce qui est icy bas en terre , est de la propre sorte & maniere que la haut au ciel : & n'y a si petite chose elementaire qui ne depende d'une superieure , qui luy est ordonnee pour sa regente & conduëtrice , dont elle est menee & excitee à toutes ses actions & progres. Car toutes choses sont comme enchainees les unes aux autres. Mais pour en apporter vne autorité plus pregnante & speciale, Sainct Clement au 2. liure de ses recognitions à Sainct Iaques , introduit S. Pierre , qui en parle en ces propres termes. Il y a un Ange constitué sur chasque peuple , auquel est commis de Dieu le gouvernement & direction d'icelui. Car Dieu le tres-haut , le sublime, le souuerain de tout , qui a seul la puissance absolue de toutes choses , a departy toutes les nations de la terre en soixante douze portions, ausquelles il a estably des anges pour princes & gouverneurs , à l'un desquels, le plus grand de tous les Archanges , a esté attribuee la superintendance & protection de ceux qui les premiers de tous les autres auront receu la veneration & recognoissance du vray Dieu d'enhault. Ce qui denote apertement la precedance de ceste Corone , pour raison de son an-

cienne priorité à la susception du Christianisme, sur tous les autres potentats. Et se confirme encore bien clerement par ce lieu cy du traicté du regne de l'Antechrist, attribué à Sainct Augustin, mais aumoins est-il d'Alcuinus precepteur de Charlemagne, il y a plus de huißt censans, par où se veoit l'inséparable connexion qu'il y a eu de tout temps, & aura iusqu'à la consôlation du siecle, entre le Sainct Siege Apostolique, & ceste dite tres-Chrestienne Corone. Voicy les mots au Latin propre.

Ait Apostolus 2. Thessal. 2. QVONIAM NISI VENERIT DISCESSIO PRIMVM, &c. Hoc autem tempus nondum aduenit, quia licet videmus Romanũ Imp. maxima ex parte destructum, tamen quandiu reges Francorum durauerint, qui Romanum Imperium tenere debent, Romana dignitas ex toto non peribit, quia in regibus suis stabit. Quidam verò doctores nostri dicunt, quòd unus ex Regibus Francorum Romanum Imperium ex integro tenebit, qui nouissimo tempore erit maximus, & omnium regum ultimus: qui postquam regnum suum fœliciter gubernauerit, ad vltimum Hierosolymã veniet,

& in monte Oliueto sceptrum & coranam suā
 deponet. Hic erit finis, & consummatio Ro-
 manorum Christianūmque Imperij : statimque
 secundū prædictam sententiā Apostoli Pau-
 li Antichristum dicunt futurum. Et en ter-
 mes non moins expres encore dans ce li-
 ure intitulé *Mirabilis liber*, imprimé l'an
 1524. *Ex libro Catalogi finis, seu Cataldi finij*
undecimi capitis de Italia. C V M Roma vacce
 pinguis fœūdōs mugitus audire incœperit, &c.
 Tunc nascetur inter lilia Princeps pulcherrimus
 cui nomen noui inter reges erit, & animi nomi-
 nisque paritas æqua cum gente sua, & corporis
 eximia proceritas. Huic vniversus orbis pare-
 bit cū quercus elata ceciderit. Væ tibi Flandria
 sanguinea : scisma inceptum delebitur cū
 quercus gloria infœlici decidet. Et vn peu a-
 pres. Surget Rex natione illustrissimi lilij, ha-
 bens frontem longam, supercilia alta, oculos
 longos, nasum aquilinum : & congregabit
 exercitum magnum, & omnes tyrannos regni
 sui destruet, & morte percutiet eos, fugientes in
 mōtibz, & cauernis, abscondētes se a facie eius.
 avec tout plein d'autres choses sēblables,
 cōformes à ce que dessus d'Alcuinus. Sur
 quoy tres-sainct Pere vostre Saincteté
 pelsra vn peu s'il luy plaist, ces mots de

L'Apostle, Nisi venerit discessio primum. En l'honneur de Dieu, & de la viſcerale misericorde, que ceste discession, desmembrement & diuorce ne vienne point de vostre part, à l'instigation de noz coniuerez aduersaires, ausquels leur vaine & inconsiderée ambition de s'impatroniser de ce Royaume, ne ſçauroit nom plus succeder, qu'il leur seroit possible d'espuiser la mer dans vn crible. De iour à autre ils en peuvent veoir les indices plus que manifestes, qui leur deuroient faire quitter ceste folle & trop temeraire entreprise, & cognoistre en fin qu'apres que nous nous serons bien entrequerellez, ce sera le mesme que de ces deux courageux leuriers d'attache, qui s'estas harpez & bien houspillez, soudain qu'ils virent passer vn loup se despartirēt d'eux mesmes pour aller d'vn accord apres. De nous au reste ne prouiendra pas ceste distraction : Ia Dieu ne plaie que le tres-Chrestien aîné fils de l'Eglise Catholique Apostolique & Romaine se departe luy ny les siés de ceste principale tige pour s'abádōner aux rameaux, ils ne le feroient iamais pour quelque occasion qu'on leur en dô-

naft. Et certes il fe peut dire de verité que depuis Clouis iufqu'à noſtre tres-bõ tres-Chreſtien & valeureux Roy, on n'a point veu rendre plus de reſpect, plus de reuerce & hõneurs, plus d'obeyſſance, ny ſe cõporter plus patiẽmẽt enuers le S. Siege, qu'õ a faiẽt de freſche memoire, cõme voſtre S. l'a peu veoir. Quãtes fois pour beaucoup de moindres & plus legieres occaſions, nos Roys baffouerẽt-ils eſtrãgement les Legats, qui ſe vouloient vn peu trop auant emãciper hors des bornes de leur deuoir? Ils n'ont pas laiſſẽ pour cela d'eſtre mis au rãg des bõs fils de l'Egliſe. Au cõtraire de quelle gracieuſetẽ & douceur s'eſt cõportẽ noſtre Roy preſẽt à l'endroit de ce Seghapretẽ du legat de voſtre Sainctetẽ, qui n'aura pas beaucoup d'hõneur de l'aduouer, attendu ſes comportements tenãs plus d'vn ours ou d'vn tygre, que de l'hõme, ie ne diray point Chreſtiẽ, & moins encore Cardinal du S. ſiege, reſeñtant la perſonne du Pere Sainct. Voſtre Sainctetẽ y penſera donques plus à loilir, & cependant ſelon que nous en adonneſte noſtre S A V V E V R, nous poſſederons nos ames en patience, c'eſt à

dire que nous attendrons qu'elle soit mieux informee de toutes choses , & que ceste nuee de feintes palliations & men-songes qu'on vous espend deuât les yeux, pour vous empescher de veoir clairés affaires de cest Estat , soit dissipée par les rais de ce clair Soleil de verité , qu'il faut bon gré malgré qu'en ait la malignité & enuie de nos aduersaires , qu'elle paroisse telle qu'elle est , tost ou tard : laquelle nous ne dirons point avec les Ethniques estre fille du temps, ains plustost de Dieu , *qui dispose tous ses iugemens selon elle : & contre laquelle tous les efforts des humains ne peuuent rien.* Parquoy selon que le cōclud le philosophe au premier de sa Metaphysique , il vaut bien mieux s'y arrester, que nō pas à l'opinion des personnes.

MAIS pour venir au point & neud principal de l'occasion de ces derniers troubles, nostre precedance est ce qui a mis le feu aux estoupes, & esté cause que Ruy Gomez, Dom diego Hurtado de Médorce , Vargas , & autres semeurs de zizanies, enragez apres, ont par toutes voyes, iusque mesme aux pl⁹ illicites & dānables,

tasché de nous suborner & distraire ceste puissante intelligence Archangelique, nostre protectrice ; ne failans scrupule d'y employer les euocatiōs dont souloient vser les Anciens Romains au Paganisme alendroict des deitez tutelaires des lieux dont ils se vouloient emparer ; comme on peut veoir au 5. de Tite Liue, de Camillus enuers la deesse Iunon gardienne de Veies : La formule en est toute expresse és Saturnales de Macrobe liu. 3. chap. 9. Mais ils n'en ont sceu venir à bout ; à cause que selon que met le Zohar sur le Leuitique, vn Ange ne se peult desplacer que par vn plus fort, ny vn Demon que par vn bon Ange, ou vn autre demon de plus haut degré & puissance. Mais auant que sortir de cest ordre de la toison, l'allusion ne fait à oublier, qui est entre ces deux vocables *Vellus* & *Villus* ; dont pour ce qu'Esau estoit velu, il fut aussi appellé *sheir* qui le signifie : ce qui denote que ceste Toison concerne proprement les Idumeans descendus d'icelui *sheir*, & les Espagnols venus d'eux.

Av regard de nos fleurs delys, on ne peult nier qu'elles ne soient venues du ciel,

ciel; & pourtāt quelle correspondance y peult il auoir des armoiries d'Espagne, & de tous leurs si bigarrez blasons, avec ces excellentes & diuines marques, qui ont fait autrefois trembler les plus esloignez bouts de la terre? Ce seroit vne trop effrontee impudence d'en vouloir faire cōparaison. Je laisse à part que le Liz excelle entre toutes autres fleurs; car cela n'est qu'assez commun; mais combien est-il celebré en l'escriture sainte? *Ego flos campi*, & *liliū conualliū*, dit l'espoux au 2. des Cantiques en la personne du futur MESSIE; Si que toutes autres fleurs cōparees avec luy ne paroistroient que chardons, ronces & espines, *sicut liliū inter spinas*, *ita amica mea inter filias*, parlant de son Eglise. Surquoy les Docteurs cōtemplatifs remarquēt trois choses de ceste belle & celeste fleur; sa pureté & blancheur; son odeur souefue; & sa propriété cōtre les brusleures. Et par les espines, les impietez, idolatries, & heresies, ou la pure doctrine reluira tousiours. C'est la fleur du champ, c'est à dire de l'Eglise de Dieu, parfume & remplye de la bonne odeur de ce Lys, & resioüye de sa net-

teté ; lequel ne s'aime point es montai-
 gnes & lieux pierreux , c'est à dire en l'ar-
 rogance & endurcissement de cœur , mais
 en vne benigne, humble & simple de bō-
 nairté , agreable à Dieu , comme le de-
 note ce qui suit apres: *Dilectus meus pasci-*
tur inter lilia ; demonstrent tout aper-
 tement ; que le principal appuy & sup-
 port de l'Eglise Catholique Apostolique
 & Romaine, & du Saint Siege , seront
 tousiours, comme ils ont esté iusqu'icy,
 en ces fleurs de Lys tres-Chrestiennes; &
 que l'un ne scauroit rien souffrir que l'au-
 tre ne se sente de son desastre. Ce qui est
 encore resumé au 6. chap. *Dilectus meus*
veniat in hortum suum, ut pascatur, & lilia
colligat. C'est le langage que tient l'Eglise
 à son cher espoux I E S U S- C H R I S T, l'in-
 vitant de venir en son iardin, & là se re-
 paître parmy les Lys, assauloir la France,
 la premiere de toutes les nations Payen-
 nes qui le receut & recogneut ; dont luy
 a esté acquise la precedence: Si qu'à bon
 droit elle peult dire, *Ego dilecto meo, &*
dilectus meus mihi, qui pascitur inter lilia. Car
 on ne luy scauroit oster son droit, ny les
 separer l'un de l'autre; & eust tout le mō-

de conspiré alencôtre. *Duo ubera tua sicut hinnuli capreae gemelli, qui pascuntur in liliis donec aspiet dies, & inclinentur umbræ.* Si que iusques à la fin du siecle ceste precdence perdurera en la tres-Chrestienne Couronne avec le S. Siege; lequel cependant demeurera fermement remparé de ces fleurs de Lis, contre tous les assaults de ses aduersaires: *Venter tuus sicut aceruus tritici vallatus liliis.* Et qui doute que par le ventre ne soit entendue l'Eglise, & par le froment la pure & syncere doctrine? En S. Luc 3. *Congregabit triticum in horreum, palas autem comburet igni inextinguibili.* Et en Hosee quatoriesme. *Ero quasi ros, Israel germinabit ut lilium;* Tous les Docteurs interpretans par là sans varier, la transmigration de l'Eglise Israelitique aux Gentils en la foy Chrestienne, & son renouvellement en la France, qui pour ceste occasiõ y a tousiours obtenu le premier & principal lieu. Mais de ce beau gråd Candelabre d'or à sept brâches denotant le ciel, & les sept planetes, au 25. d'Exode, toutes les poinctes & extremités ne se terminoiét elles pas en fleur de Lis? comme aussi les chapiteaux des colõnes

du temple de Salomon ; donnans à entendre que le chef temporel de la Religion Chrestienne seroit estably en ces Françoises fleurs de Lys : Surquoy les Rabbins meditent infinis beaux & rares mysteres:& aussi en l'inscription Hebraïque du 44. Pseaume, où il ya, *Ad victoriam liliis*. Finablement ce sont ces Lys dont le S A V V E U R dit au 6. de S. Marthieu, & au 12. de S. Luc, *qu'ils ne travaillent ny ne fissent* ; c'est à dire qu'ils ne tombent point en quenouille.

I E M'ESTENS icy tant plus volontiers en ces belles allegations Hebraïques ; qu'outre ce qu'elles y viennent fort à propos , & sont trespregnantes pour faire veoir la precellence de ceste tres-Chrestienne Coronne par dessus ceux qui d'enuie & de ialousie qui leur rongent le cœur , nous troublent ainsi par les Nostres propres, l'Espagne a de tout tēps abondé grandement de Juifs; dont il y en a eu à la verité de tres-excellens personages en toutes sortes de doctrines ; comme aussi de Mahumettans Arabes qui y ont si lōguement dominé ; parquoy cecy leur deburoit estre plus

probable, puis q̄ c'est de leur proro creu
 qu'on le leur apporte, si ceste aueuglee
 ambition ne leur auoit offusqué l'esprit
 de sorte, que nonobstant toutes les rai-
 sons qu'on leur sçauroit alleguer, ils veu-
 lent en quelque façon que ce soit, non
 seulement supplanter nostre precedence,
 mais raurir par mesme moyen la Couron-
 ne, & renuerfer la loy Salique fonda-
 mentale de c'est Estat, pour l'annexer à
 leurs quenoilhes; Enquoy nos Roys ont
 esté si religieux, que postposans toute
 dilection paternelle, la plus tendre de
 toutes autres, au bien & maintenant
 d'iceluy, ils ont mieux aimé (avec quel-
 le douleur & regret ç'a deu estre, cela se
 peult mieux penser que dire) veoir pri-
 uer leurs sang, leur chair, leur cheres en-
 trailles, d'un si beau & grand heritage,
 que d'auoir iamais attenté de rien re-
 muer alencontre, ny d'une sorte ny d'u-
 ne autre ; si que la plus-part du temps
 leurs filles, s'ils n'ont point eu d'hoirs
 masles, n'ont pas mesmes esté pourueues
 à ceulx qui leur ont succédé à la Couron-
 ne, où ils ont veu que se deuoit introdui-
 re apres leurs decez, vn qui ne leur appar-

tenoit que de loing. Combien moins doncq le deburont souffrir les Princesses membres d'icelle , tant de noblesse , tant de genereux & vaillans gentils-hommes , qui n'ont point iamais flechy le genouil deuant l'idole de Baal, & à ses doublons ; & ne se sont alienez de l'obeissance & fidelité qu'ils doibuent à leur vray-legitime Prince , & à leur patrie ? ne laissant pour cela, (dont leurs ennemis propres s'ils estoient tels qu'ils deburoient estre , leur en deburoient sçauoir tant meilleur gré , & les en estimer d'auantage) d'estre bons & feruens Catholiques ; mais François, & non adulterins Espagnolisez ? Ils sont prests , dis-ie d'espandre leur sang en ceste si iuste & digne querelle, mourir de dix mille morts , s'ils en pouuoient autant souffrir , & y finer autât de vies en martyres & en tourments, car ils ne les sçauroient mieux employer ; *εις οὐρανὸς ἀριστος ἀμύνεσθαι περὶ πάντων* , respond Hector à Polydamas ; plustost que de se lascher à rien d'indigne d'eux & de leur ancienne valeur. Ausurplus comment pourroient iamais compatir ces diuines fleurs de Liz nostres avec leur

marqueterie d'armoiries ainſi tauellées, papillotées, riollepillées, eſcartellées, mouchetées, & maddrées cōme eſt leur foy & loyauté, à guiſe d'un Chameleon qui ſe varie en toutes ſortes de couleurs, fors que le blanc, où il ne ſe peult tranſchanger: cōme auſſi l'ardeur prouenāt de la reflexiō des raiz du Soleil dans le centre d'un mirouër cōcaue, mordre ſur l'eſtoffe blanche? Toutes lettres hieroglyphiques, & d'une grande ſignifiante, denotant la vanité de leur entrepriſe.

C'EST doncq à vous ô tres-Sainct Pere, de vous remettre deuant les yeux, qu'aucuns de vos predeceſſeurs auſſi ſiége, ont eu le bruiēt, d'auoir ainſi que par forme d'entree de table, perdu aſſez incoſiderement à l'inſtigation de ces gens cy l'Allemaigne; dont les Royaumes de Dannemarc, Norduege & Suede, avec la Hanſe Tenthonique, & vne fort grand'eſtendue des regions adiacentes, ont ſuiuy les erres. Leurs ſucceſſeurs pour le ſecōd mets, n'en voulurent pas faire moins de l'Angleterre, que l'Eſcoſſe à depuis imitée. Ne vueillez au nō de Dieu eſtre cauſe que la Frāce, bien malgré elle, & à ſon tref-grand

I iij

contre-cœur & regret ne soit contrainte à leur exemple pour la desserte, non de se detraquer de la religion Catholique, cela n'aduiendra iamais si Dieu plaist; ny ne se departira de ceste plus que filiale obediencia qu'elle a tousiours renduë au S. siege où vous estes constitué; ils sont trop bien liez ensemble; mais d'apprester occasion qu'on ne die au tēps aduenir, & que les histoires n'en soiēt ionchees, que Clement viij. Florentin de nation pour s'estre mōstré par trop partial pour la factiō Espagnolle, qui sous vn faulx masque de la manutētiō de la religiō Catholique aspiroit à empieter la Courōne de France; Et pour cest effect y auoit suscitē de mauuaise foy tous ces troubles & cōbustions, taschās par tous moyens à eulx possibles de nous mettre en mauuais mesnage avec vostre Saincteté, & brouiller par mesme moyen l'vnion & repos de l'Eglise; a luy mesme tēdu les bras à vn Scisme le plus dāgereux qui fut onques, pour des friuoles esperances ambitieuses qui ne leur pouuoient iamais succeder. Ramētez vo^r q̃ ce royaume tousiours treshrestie; & auquel on ne scauroit oster ce

~~& de doubler~~ en moins d'un mois ou
 tiltre acquis si legitimemēt, & avec de si
 grāds deuoirs & merites, est la pierre angu
 laire de la Chrestieté, qui esbrālee de son
 affiette, tout le reste de l'edifice menace
 vne manifeste ruine. Nous ne nous par
 forçāmes onques, quelques grosses guer
 res & hostilitiez que nous aions eues les
 vns contre les autres, de les brouilher ma
 lignement, & mettre en diuorce avec le
 Sainct Siege. Nous n'auons point subor
 né les Cardinaux à force d'argent & de
 menaces : nous ne proeurāmes iamais
 Scisme ainsi qu'ils vous intimident de
 vouloir faire ; Ny de vous oster les villes
 & terres de vostre ancien patrimoine, cō
 ferees à l'Eglise par l'Empereur Constan
 tin le grand, & depuis confirmees enco
 res plus validement, & accreues par les
 successeurs de Charlemaigne nos Roys :
 ny de faire la guerre aux saincts peres, & à
 leur parenté, les depossedant de leur bié,
 s'ils ne se partialisoiet contre tout droict
 & raison pour nous contre ceux, à qui
 naians iamais en rien forfait, nous vou
 drions à tort & sans cause raur leur anciē
 heritage. Nous n'auons iamais aspiré de
 faire reuolter leurs subiects, brouilhé leur

Clergé, corrompu leurs predicateurs, donné argēt à leurs docteurs pour faire soubſ-leuer leurs peuples : ny tasché à renuerſer leurs cours ſouueraines, pour eſteindre du tout la Juſtice, & reduire leurs dominations en vn chaos de brigandages & aſſassinats. Nous ne leur auōs finalement enuié, ny ne nous ſommes parforcez de leur ſupplâter le rāg qu'ils deuoient par raiſon tenir entre les Potētats Chreſtiens, & pour ceſt effect remué le ciel & la terre quarāte ans durāt. De nous alterer ainſi avec les Saincts-peres, & le Sainct Siege, comme ſi nous eſtions vrais Artheiſtes, ce n'eſt pas œuvre de Chreſtiens, tels qu'ils veulent qu'on les tienne eſtre par deſſus tous autres. Ils vous ont donné à entendre ce qu'ils ont voulu, & vous y auez vn peu bien facilement preſté l'oreille. Voſtre S. nous pardonnera ſ'il luy plaift, car nous luy parlons d'icy à genails proſternez à ſes benoiſts pieds, en telle reuerence & humilité qui ſe doit. Ce ſont ces impudēts ambitieux, inſatiables & desbordez, qui vous eſblouiſſent & troublēt, qui par leurs outrageuſes menaces vous intimidēt & eſpouuantent, & vous veulent mettre le pied ſur la gorge :

& au lieu de pourchasser le repos & tranquillité de la Chrestienté, appliquas plustost leur entente à regarder comme ils pourrôt bié & seurement s'establiſſir & fortifier cōtre ceſte perilleuſe tormēte q̄ eſt ſi pres de ſ'eſclatter ſur leur flotte (*Ollis cærule⁹ ſupra caput aſſitit imber, noſt' ē hyemēm que ferēs* diroit le Poete) eſcartee ainſi que elle eſt, quād leur Palinure viēdra à ſe rēuerſer dās les ondes, dōt il ne garde l'heure que d'ēploier tout ce peu de moiēs qui leur reſtēt à irriter cōtre eux tout le mōde. Ces ambitieux deſreiglez veu-x-ie dire, & inſupportables conuoiteux du bien d'autrui, qui abuſēt de l'authorité & pouuoir de voſtre beatitude, & de l'obeiſſance qu'on luy veut rendre; par le moiē de quoy ſoubs leur faux donner à entendre ils ſe propoſent de pouuoir venir à bout de reduite ceſt eſtat ſoubs leur ſeruitude, faiſans leur compte que pour acheuer d'eſquarrir leur pré, & ſe rendre abſoluts Monarques de tout l'Occident, il ne leur reſte plus que ce gros morceau, qu'il ne leur eſt nomplus poſſible de tranſgloutir, que nous d'aualer d'vn ſeul traiēt ceſtant de Royaumes qu'ils poſſedēt tāt reel lemēt qu'ē imaginatiō & Idee. Mais quel-

les derisions ie vous prie, quelles huées, sifflemens, & clacquemens de mains doit on attendre de toutes les nations de la terre apres ces gens-cy ? Ne sont-ce pas (deura-lon dire) ces beaux Monarques de Lantriguet, ces conquereurs de l'autre monde; ces gentils crocheteurs de Royaumes, qu'ils peschent ainsi qu'à la ligne avec leurs hameçons dorez, couuers pour amorce de la peau de la religion Catholique, qu'ils ont escorchee peut-on bien dire? Ils auoient gobbé Portugal comme vne pillule, mais ils se sont estranglez de celui de France. Ouit-on iamais parler d'une telle & si soudaine metamorphose? Les voila aujourd'huy maistres absolument de Paris, ils y commandent à baguette; tout est à eux deçà & delà l'eau: Peuple Chrestien, vrais Catholiques, plustost mourir de dix mille morts que iamais recognoistre le Biarnois, & se departir de l'alliance & fidelité par vous iurée à cetant bon, tant deuot, & si grand Monarque le Roy Catholique: mais vous n'en ferez pas là, Dieu aidât; voicy le brave & magnanime Archiduc Erneste, vostre Roy futur, & gendre de sa Majesté, la terre toute couuerte de gens de guerre, & de doublons: en moins d'un mois ou

six semaines vous voila deliurez de tous
poincts. On s'en va coucher là dessus: les
prescheurs minuent leur sermon à l'ac-
coustumee pour le lendemain; mais dès
l'aube du iour la chance se trouue bien
tournee; alarme, à l'aide, au meurtre, voila
les ennemis dedans; ils y sont sans doute:
il y est luy mesme en personne tout des
premiers, & desia sur le pont nostre-da-
me; tout est remply d'escharpes blâches.
Et là dessus Moÿse & Aaron d'arriuer au
Louure: Sire en l'honneur de Dieu s'il
vous plaist, selon ceste bonté & clemen-
ce vostre; ceste generosité de courage
dont vous estes par tout renommé, don-
nez nous de grace la vie: nous n'auons
fait que ce que nos maistres nous ont cō-
mandé, comme vostre Maiesté voudroit
que les vostres vous obeissent. Allez, non
la vie tant seulement, mais tout le vostre,
encores que vous l'aiez pillé sur mō peup-
le, mal conseillé de vous auoir appelez
& receus. Sus, qu'on me les conduise ius-
ques en lieu de seureté; qu'il ne leur soit
fait mal ny desplaisir en chemin, ny tort
d'un seul fer d'esguillette. O le bon Prin-
ce, deuoient-ils dire, quel braue & ma-

gnanime Royal courage, tout autre certes qu'on ne nous le depeignoit ! Il est digne de commander à toute l'Europe. C'est comme les choses passerét le 22. de Mars, vn Mardy matin, iour & mois dediéz au Dieu des batailles, & dont nous gardons encore les noms vſitez anciennement au Paganisme, pour monſtrer combien ce Prince noſtre eſt belliqueux.

C'EST donques à voſtre prudence & debuoir paternel, tres-sainct Pere; pere commun debuez-vous eſtre de tous vos fideles & obeiffans enfans, que vous ne debuez plus cherir & fauoriſer l'un que l'autre; de ietter de l'eau ſur vn ſi dâgereux embrasement excit   par nos aduerſaires, afin de l'eſteindre, & nompas de l'huile pour l'enflammer de plus en plus. Il n'eſt pas touſiours queſtion d'inſiſter ſi eſtroitement ſur de menues formalitez, le temps n'y eſt point    ceſte heure; les affaires ne le requierent pas. Pour trop eſtraiendre la courroye, elle eſt en d  ger de ſe rompre. Quelquefois il arriue qu'en vne torm  te pour ſe garantir de naufrage, on iette bi   dans la mer iuſques aux plus precieufes beſongnes pour ſauuer le reſte. Il faut par

fois oublier, de petites fautes, si fautes y a, pour en euitier de plus grandes, principalement en cas de Roys, & de Princes; les bronchemens desquels il faut aucunesmēt supporter pour paruenir à vn repos; car ils ne se veulent pas auoir par force & rigueur; ioint que la cōposition du Prince, & de ses actions est vn indice manifeste du secret iugement de Dieu vers son peuple, pour la punitiō duquel il permet ceux qui le dominant chanceler hors de leur debuoir. Et cela est la vraye cause du mal à la rechercher & sonder iusqu'au fonds; non le Prince, si qu'il ne leur faut pas tenir vne si exacte rigueur qu'aux particuliers & personnes priuees. La charité Chrestienne nous semond, voire oblige d'vser de doulces & fraternelles remōstrāces à ceux qui se detraquēt de leur droicte alleure; mesmemēt aux grāds de la terre, qui ne peuuent pas endurer d'estre gourmandez, ny ramenez à leur debuoir à coups de baston, ainsi qu'esclaves ou valetaile; c'est plustost les aigrir, irriter & desesperer; ny plus ny moins qu'un courageux cheual, & les rendre plus cōtumaces & rebours cōtre l'espērō,

& prendre le frein à belles dents , pour se transporter hors la carrière de la raison ; qu'il faut venir en fin à ceste maxime de les auoir par douceur & modestie , mesmement nostre Roy regnant à present, Prince d'un cœur genereux, franc, & magnanime , & qui biẽ enuis endureroit nō q̃ ses subiects, mais nō pas mesmes les plus grands Monarques volussent entreprendre de le brauer; si iamais on veult paruenir à la paix & repos de ce Royaume , ce que les Espagnols ne desirent pas, si malmené par leurs menées , que sans la particuliere prouidence de Dieu , & la valeur de ce prudent & courageux guerrier, tout couroit vne grand fortune de s'en aller à vauderoute , en la proye des estrangers. On vseroit bien d'enhortemens à vn brigand, vn ioueur, vn larron, putanier, yurgne, ou autrement mal conditionné, pour le ramener à vne meilleure & plus louable vie. L'Escripture sainte ne nous remet autre chose deuant les yeux , que ceste charité de la douce & temperee correction fraternele , deuant que scandaliser son prochain: à plus forte raison combien doit-on aller sobre & retenu en tel cas

cas enuers son Roy , & naturel Seigneur
 souuerain? Le Sauueur ne dit-il pas, qu'il
 y a douze heures au iour pour conuertir
 le pecheur; & qu'il faut plustost desirer &
 chercher son amendement & recognois-
 sance , que sa condamnation? Auant que
 de deposseder vn Prince souuerain de
 son droit qui luy est acquis , ny que ses
 subiects se puissent reuolter contre luy; se
 substraire de son obeissance, & se desmê-
 tir de la fidelité qu'ils luy doiuent, il y faut
 bien aduiser plus que d'une fois , pour ne
 s'embarquer point trop legerement en
 ces perfides desloyautez & tumultes, d'ot
 s'en ensuiuet tant de destructions & rui-
 nes : la patience y est requise , pour at-
 tendre les finals effects de ses actions &
 comportemēs; d'autant qu'on peult fail-
 lir par fragilité & inaduertance. D'alle-
 guer que ce Royaume soit electif, c'est v-
 ne faulseté trop impudente ; Il y a trop
 long temps que nos Roys sont en posses-
 sion & saisine de la successiō ; & n'est que
 pour brouilher les cartes à la suggestion
 de nos capitaux ennemis , qui n'aspirent
 qu'à l'euerlion de cest Estat; & sous pre-
 texte d'un pieux zele au maintenant

K

de la religion Catholique, ont seduit ce pauvre maladeuſé peuple à ſe bander cōtre leurs vrais & legitimes Roys, & mettre tout en combuſtion pour ſecouer la Royauté, & introduire vne anarchie, (car tel ſe peult bien appeller leur gouuernement puis ces derniers troubles) exterminer au demeurāt la Nobleſſe, avec les Princes & Seigneurs, les vrais nerfs & oſſemens de c'eſt imperiſſable eſtat: mais ſoubs quelle couleur & pretexte? pource qu'ils ſe ſont trauaillez & trauaillent ſelō le debuoir qui les y'oblige, à ſouſtenir, garder & defendre l'honneur le droict & la dignité de leur Roy.

A QV'EL PROPOS doncques esbranler ainſi toute la Chreſtienté, y ſemer tāt de troubles & confuſiōs, ſuſciter tāt de maux, de ruines & calamitez; eſtre cauſe d'aduancer miſerablement les iours à tāt de pauvres innocentes ames par infinies ſortes de cruelles morts; forcer femmes, violer filles, piller Eglifeſ, ſaccager vn ſi beau & fleuriffant Royaume, ſi bien meritē de la foy Catholique, & des Potentats chreſtiens; & y perpetrer innombrables aultres telles inhumanitez qu'ont

accoustumé d'apporter tels embrasemens domestiques , où le fils s'arme contre le pere, le pere cõtre ses enfans; le frere cõtre le frere ? Ce sont les fruiçts de leur sainte Ligue, à bon droiçt ainsi appelée du mot Grec λαιγὸς exterminatiõ & ruine. Qu'en pretendoiet doncq à la fin ces ambitieux ? Le maintenemēt de la religiõ Catholique; empescher q̃ la nacelle de S. Pierre agitee de ces tourbillõs ne courust fortune de faire naufrage : s'ils n'y eussēt tenu la main , tout estoit en danger de s'en aller sen dessus dessous. O les bons & expets , soigneux , surueillans; pilotes ! onques Christofle Coulomb , ny Pero Melandez n'y firent ceuvre. O gens zelez, gēs deuõts, & feruens archicatholiques ! Mais il ne se fault pas esmerueiller s'ils le font ainsi au double & triple des autres, c'est en recompēce & pour l'interest d'auoir estē si longuement Iuifs, Sarrazins, Mores, Arriens, & si rien se peult alleguer de plus peruertry & alienē de l'orthodoxe foy Chrestienne, dont ils embrassent à ceste heure l'obseruatiõ de mesme queles Chameaux boiuet, pour la soif passēe.

pour la presente , & pour l'aduenir. De quelle sincere affection , & où cela tend, Dieu le sçait , qui voit au fonds de leurs pensées ; tesmoins leurs interins , & les libertez de conscience qu'ils ont plus que liberalement octroïé en leurs pays-bas , pourueu qu'ils se voulussent contenir en obeissance , & ne se remuer contre leur tyrannie. De quelle sorte blasmeroyent ils cela es aultres ? Mais tout leur est permis ; ils en ont dispense. Ils voïët bien vn festu en l'œil du prochain, & au leur ils ne peuuent pas discerner vn cheuron. Beaucoup de dispenses, a escript Innocent III. s'octroïent en terre, qui ne sont pas emologuees au ciel.

Vous donques Messieurs les Potentats d'Italie; d'Allemagne aussi, mais vous n'estes pas si proches de l'embrasement; que pësez vous faire; ny que cuidez vous deuenir? Attendez vous que nous soions du tout mis au bas (cela se peult faire malaiseement) quel proffit vous peult il venir de nostre ruine? Estimez vous d'en auoir meilleur marché à la longue? *Nam tua res agitur paries dū proximus ardet.* Vous estes tous il y a des-là bonne piece, à vo-

estre souhait en aise & repos ; Dieu vous y maintienne. Tous comblez d'or & d'argent , richesses & commoditez ; à la bonne heure. Vos subiects plus gras & refaits qu'ils ne furent onques : vos terres plus opulentes que iamais : Vous ne sçavez plus que c'est de guerre & hostilité : Puis qu'ainsi est (nous direz vous) & à quoy faire prendre les armes à vostre appetit : nous oster de gayeté de cœur hors de nostre tranquillité & aisance pour le fait d'aultruy ? Nous serions bien simples & maladuisez : la paix vault mieux en toutes sortes , qui fait que tout y fleurist & prospere abondamment ; que nompas de dissiper à son escient son argent , vuidier ses coffres , euacuer ses thresors entassez de si longuemain , par tant d'espargnes & de labeurs. Vous ne dites pas mal , & auriez raison s'il se pouuoit faire ; ce seroit bien à la verité le meilleur , si les choses du monde persistoient tousiours en vn mesme estat , ou pour le moins l'aage d'un homme ; mais on n'est iamais plus pres du mal que lors qu'on en cuide estre le plus esloigné : les desastres nous surprennent à l'impourueu , comme vn larron

K iij

qui viét d'aguet. Souuenez vous que rien ne perdit Croësus, que ses grâd's richesses, & son long repos. Mirez vous sur nous; prenez y exéple: Ce vous doibt estre vne belle leçon que de nostre faict. De nos ruines & descombres se prepare vn beau pied-montant pour arriuer à ceste bresche qu'on vous brasse de'longuemain. La traisnee esprise en nostre mine, viendra consecutiuelement à donner feu à celle qu'on vous a cauee, sans que vous vous en foyez apperceus pour pouuoir aller au deuant, & l'esuenter. Ils conspirent de loing cōtre vos aises & delices, vostre repos & vos facultez: En nous il n'y a plus rien à gagner que des coups; Il fait fort mauuais s'adresser à ces gens qui n'ont q̃ perdre, & qui thesaurisent de fer & d'acier, en lieu d'or, d'argēt, & de pierreries. Nous cuidans ruiner seulement, & nous pas conquerir comme ils pretendent de vous faire, ils nous ont procuré le plus grand bien que nous eussions deu desirer; de nous desnuer de ce qu'aussi bien ne nous seruoit que de desbauchement & de prauation, à nous enneruer, & ramollir la valeur ancienne, dont non

seulement la Noblesse , & ceux qui faisoient profession de porter les armes, mais tout le peuple en general s'est raguerri , & rendurcy à toutes sortes de mesaises & de trauaux militaires ; si que nous nous iecterons l'vn de ces iours dans leurs pays plus dommageablement qu'ils n'ont fait dans les nostres , trop angustes dorefnauant pour porter la ferocité indomptable de tât de belliqueux courages : & irons là iouer à nostre tour sur leur eschaffault la catastrophe de la tragedie qu'ils auoient cuiddé commencer sur le nostre. Car les troubles & diuisions dont ils nous ont voulu exercer ; les conspirations & reuoltes qu'ils nous ont esmeues , les ruines qu'ils nous ont brassees , nous ont en moins de quatre ou cinq ans soubs ce valeureux chef dont nous n'en eussions sçeu souhaitter de plus propre , armé plus de milliers de braues & valeureux soldats, que n'eust sçeu faire de douzaines le calme de vingt cinq ou trente du passé. C'est le bié qu'on nous a en fin apporté, au lieu de la destruction qu'on nous pourchassoit. C'est la recompence que ces desloy-

K iiij

aux ingrats nous rendent de tant de biens-faicts , de bons offices, courtoisies & honnestetez qu'ils ont infinies fois receu de ceste Couronne : de tant de secours , faueurs , soulagemens & supports qu'on leur fit iadis. Nous les deliurasmés de la captiuité des Mores, qui par de si longues reuolutions de siècles leur auoient tenu le pied sur la gorge ; s'estoient emparez de tous leurs pays ; les auoient subiuguez , & rendus esclaués. Nous leur restablismes la foy Chrestienne qui y estoit du tout esteinte , les aydasmes & secourusmes de toutes choses necessaires pour se refaire des ruines & desolations qu'vne si longue seruitude leur pouuoit auoir apportees. Nous auons souuent reintegré leurs Roys en leur throne , dont ils auoient esté depossédez par les soubfleuements & reuoltes de leurs subiects: appaisé infinies fois leurs tumultes : Donné passage à l'Empereur Charles le Quint à trauers ce Royaume , avec tant de bons traictemens , & de si gros frais, pour aller pacifier ses pays-bas, en danger lors d'estre perdus du tout pour luy

s'il n'y eust remedié promptement ; ce qu'il ne pouuoit faire par autre voye : les auons ordinairement secourus de viures ; & aultres leurs necessitez , à leurs grands besoins , iusqu'à nous en discommoder ; avec autres telles & semblables charitez qui se doibuent de Chrestien à autre , mesmement entre de si proches voisins , dont nous leur auons tousiours fait vn tref-bon & fidelle office : & s'en sont aultrefois sentis si tort obligez & tenus à nous ; qu'ainsi qu'on peut veoir és histoires des vns & des aultres ; vne perpetuelle alliance , amitié & confederation y fut contractee & iuree solennellement , que quicōque tascheroit iamaïs de troubler leur paix & repos , ne d'y mettre rancune & discord , seroit tenu comme pour vn execrable anatheme pire qu'excommunié : ce que la malignité & enuie de leurs successeurs d'apresent , & leur insupportable ambition a du tout renuersé de leur part depuis. Ne nous ont-ils pas fait du pis qu'ils ont peu ? Le laisse là les guerres ouuertes , car cela ne se peult reprendre , sinon entant que selon leur coustume ils y ont procedé desloialement par

leurs trames & menées couuertes. N'ont-ils pas suscité tous ceux qu'ils ont peu contre nous, & les nostres mesmes, depuis quarante ou cinquante ans, qu'ils ont tâché de nous supplanter ceste précédence, que l'ancienneté de la foy Chrestienne en la Religion Catholique, avec la pieté & deuotion d'une si longue suite de nos Roys, leur auoit acquise, par tant de passages oultre mer, & tant de voiajes & entreprises en leur propre personne en la terre Sainte, pour la recouurer sur les infideles; en la Barbarie, Egypte, & Surie: leurs anciens & continuels merites enuers le Sainct Siege; la reintegration & maintenant des Saincts Pontifes en icelui, si souuent reestablis en leur chaire Pontificale? Nont-ils pas d'une tres-grande perfidie contre la foy promise & iuree au dernier traicté de la paix generale de l'an 1559. practiqué, suborné, suscité les principales villes de ce Royaume à se reuolter: gaigné & corrompu le peuple à se departir de l'obeissance & fidelité deue à leur Patrie, & à leurs Roys, se soubfleuer contre eux, & les meurtrir proditoirement? qu'elles ont esté

les brigues & menees, les distributions clandestines pour practiquer tous ceux qui se sont voulus laisser aller, & fleschir à se forfaire de leur debuoir ? Il ne seroit pas possible de parcourir icy la millesime partie de leurs fraudes & mauuaistiez :

Non mihi si linguæ centum sint, oraque centum,

Ferrea vox, omnes scelerum, comprehendere formas,

Omnia perfidiæ percurrere nomina possim.

Indignes certes de toutes maiestez Royales, qui se doibuent bien garder d'apprester de là occasion qu'on prophane le respect qu'on leur doibt porter; puis qu'il plaist à Dieu les constituer en ce hault degré de ses lieutenâs generaulx icy bas, pour regir les peuples qu'il leur soubmet. S'ils sont bons, sages & equitables, nous luy en debuons rendre graces; sinõ, estimons que c'est pour nos offences & demerites qu'ils nous sont donnez, pour nous chastier & punir; car le peuple communement porte sur soy les fautes & iniquitez, les follies & desbauchemens de leurs Princes; *Quicquid delirant*

Reges, pleſtūtur Achini. Au dernier cha. du ſecōd liure des Roys, pour l'arrogāce de Daud qui voulut ſçauoir le nōbre de ſes ſubieſts, ſoixante-dix mille qui n'en pouuoient mais, en moururēt frappez de peſte par l'Ange en deux ou trois iours. Quand Dieu ſe veult venger de ſes creatures, & les punir de leurs meſfaits, c'eſt bien ſouuent en leur dōnant de mauuais Magiſtrats. *Je vous donneray vn Roy en ma fureur*, dit-il en Hoſee i. Et au lieu prealleguē de Daud : *La fureur du Seigneur de rechef ſ'exaſpera contre Iſrael, & eſment Daud contr'eux*, diſant à Ioab, *va, & nombre Iſrael & Indah* : monſtrant par là que la faulte que fit Daud ne tendoit qu'à la punition du peuple. Parquoy c'eſt autant que de reſiſter à Dieu; (*car c'eſt par luy que les Roys regnent, dont il les faut reſpecter & craindre*) que de contredire & s'oppoſer aux puiffances qu'il commet ſur nous; ſelon que le portent fort par expres les admonneſtemens que nous en fait l'Apoſtre aux Rom. 13. *Toute perſonne ſoit ſubieſte aux puiffances ſuperieures, car il n'y en a point que de la part de Dieu qui les ordonne & conſtitue* : parquoy quiconque leur reſiſte, c'eſt au-

tant que de resister à la propre ordonnance de Dieu. En l'ancienne Milice Romaine les Centeniers portoient ordinairement vn sarment de vigne, dont ils chastioiēt leurs soldats: que s'ils se iouoiēt de se rebequer, voire de l'empoigner seulemēt, pour empescher la discipline, ils estoient degradez des armes. Mais s'ils estoient si refractaires, fust à tort, fust à droict qu'on leur en dōnast, de le leur arracher des poings, c'estoit vn crime capital & irremissible. Il n'est pas seulement loisible de murmurer entre ses dēts, ny de parler mal de son Prince, tant s'en fault qu'on se doibue soubstraire de sa subiection & obeyssance, ny se departir aucunement de ceste fidelité qu'on luy doibt: moins encore de le maudire & detester, non que de paroles iniurieuses, comme fait Semei Dauid au 2. des Roys, 16. (*Tu ne maudiras point les Princes de ton peuple*) mais nompas seulement de pensee (en l'Ecclesiaste 10.) si grand est le respect & honneur qu'on leur doibt porter suiuant le commandement de Dieu, dont ils sont les oingts icy bas, où ils en representent la personne, & en portent doublement l'image; l'vne entāt

qu'hommes comme les autres, formez à sa semblance, qui est le diuin caractere de l'ame raisonnable empraint en nous : & l'autre, à cause qu'ils sont icy constituez sur nous pour executeurs de ses ordonnances; car tout ce qu'ils font de bien ou de mal vient de Dieu; le bien, directement de sa grace & bonté, selon qu'il est dit en S. Iaques premier : *Tout bien descend du pere des lumieres* : Et le mal, par sa permission (car il n'est pas autheur du mal) pour nous punir de noz mesfaits, & nous ramener à vne meilleure vie : aucunesfois pour vn plus grand bien (*Si erit malum in ciuitate quod non fecerit Dominus*, en Amos 3.) au moien-dequoy il nous fault prendre & receuoir les durs traictemens des fascheux & rigoureux Princes, comme fort sagement nous en instruit Cor. Tacitus au 14. de ses Annales, selon qu'il plaist à la diuine prouidēce nous les enuoier; & les cōporter ruddes, vicieux, deprauēz, dissolus, desbauchez & prodigues, aussi biē que les bōs, vertueux, benins, sages, & bons meſnagiers; tout de meſme qu'il fault prendre en gré les mauuaises, steriles, & infructueuses an-

nees, les pluies excessives, les seichereſſes, & ſemblables incommoditez, auſſi bien que les bonnes & les fertiles, qui nous ſont donnees par interualles en recompence de celles dont nous aurions occaſion de nous plaindre. *Les vices* (dit-il là) *ſeront tant qu'il y aura des hommes au monde: mais ce n'eſt pas un mal continuel, ains cela ſe compenſe moiennant les biens qui entretiennent parmy.* Le vice rehaulſe la vertu, & la met mieux en euidence; tout ainſi que les renfondremēs des couleurs brunes & mates obſcures reieētent & eſſancent hors d'œuvre les claires & reſplandiſſantes: la nuit donne luſtre au iour; la maladie eſgaie la ſanté; & la faim fait trouver ſaveur és plus rudes & groſſieres viandes (*Dulcia non meruit, qui non guſtauit amara*) ainſi font les puſillanimes & faitneans Princes mieux paroître la valeur de leurs immediates ſucceſſeurs; & au rebours, les laſches & depravez ſucceſſeurs, regretter ceux qui les ont precedé. Tout procede d'une prouidence infaillible qui fait pour le mieux toutes choſes. Et c'eſt la voye qu'il faut tenir, non pas tempeſter, tumultuer

& séditionner à tous propos ; & faire des cheuaux eschapper à la moindre occasiō qui suruient. Car voilà ce qui suit apres au lieu cy dessus allegué du 13. d'Hosee, *Je vous donneray vn Roy en ma fureur* : Il ne dit pas conséquemment, qu'on s'en defa-
ce, qu'on le tue, qu'on le bannisse, qu'on le chasse quand on en aura receu de mau-
uais traitemēts; mais, *je l'osteray en mon in-
dignation*, lors que i'en verray estre temps;
ce qu'il faut remettre à sa prouidence, &
cependant patienter, en le requérant par
deuotes prieres de le ramener à la droicte
voye, & l'inspirer à traicter plus humai-
nement ceux qui luy ont esté conſignez
en charge. *car le cœur du Roy est en la main
de Dieu*, qui le tourne comme il luy plaist.
& cela peult bien plus seruir que d'y aller
par voye de faict; à cause que Dieu ne re-
iette pas volontiers les requestes raison-
nables qu'on luy adresse : & ne laisse
fouler vn peuple, s'il n'a plus que deme-
rité, iusques au dernier desespoir, quand
on se retourne à luy de bon cœur; & qu'on
reconoist que les durs traitemens des
Princes viennent en partie des mauuai-
stiez de leurs subiects. A propos dequoy
dit

dit fort bien S. Gregoire; que pour la qualite du troupeau, les actions & maintenemens des pasteurs se disposent. Et souuēt arrive, qu'un pasteur autrement debonnaire & preud'homme, se depraucera pour raison des malignitez de sa bergerie. Par où nous sommes esclarcis qu'on ne nous admoneste pas en vain de prier ordinairement pour les Princes, qui ne sçauroient si peu broncher, que cela ne nous face donner du nez à terre. De cela le Prophete Ieremie & Sainct Paul nous en dressent ce formulaire; qu'en premier lieu ce qu'on doit requerrir à Dieu pour eux, & en leur faueur; c'est qu'ils puissent cognoistre d'eulx mesmes, & non par les yeux, ny par les oreilles de leurs ministres, ce qui sera vtile & salutaire pour leurs subiects. En apres, qu'ils y puissent estre assiste & secourus des fidelles remonstrances de leur conceil. Tiercement que Dieu les inspire de les vouloir croire. Et finalement qu'il luy plaise en benir & fauoriser les euenemens. C'est vn grand preiudice pour le public, que le Prince vienc à perdre quelque grosse bataille où sa personne fust en danger; mais trop plus grād inconueniēt

L

ce seroit, s'il se laissoit surmonter à ses vices & voluptez : & le plus dangereux de tout, s'il adhère aux mauuais conseils qu'on luy donne. De cecy il y en a trois ou quatre vers fort celebres dans Hesiodé : *ὁ τὸς μὲν πᾶσι πρὸς ὅς αὐτῷ πάντα νοεῖσι, &c.* *Celui excelle dessus tous, - qui bien se conseille soy mesme. - l'autre d'apres, qui obeit à ceux qui bon conseil luy donnent. - Mais qui l'un ou l'autre ne fait, - c'est un homme tout inutile.* Ce qui ne s'esloigne pas fort de ce que dit le Sage au 10. de l'Ecclesiaste. *Malheur à toy terre ou Royaume, dont le Roy est enfant : c'est à dire ignorant ; car ce n'est pas luy qui commande & gouerne, ains est luy mesme gouerné, & la pluspart du temps par mauuais Conseil.* Parquoy ce fut sagement aduisé à Salomon, quand dès l'entree de son regne Dieu le mit au choix de luy requerrir tout ce qu'il voudroit ; & il ne luy demanda qu'un cœur docile, qui peust discerner entre le bien & le mal, pour pouuoir droictement gouerner son peuple ; à quoy seruent de beaucoup les prieres. Certes fort bien auroit dit quelqu'un, que ceux qui ne sçauent tolerer vn mai-

stre & seigneur difficile & fascheux, ne sont pas dignes d'en rencontrer de doux & benins : Car pour en parler à la verité, gueres de mutations de Princes n'arriuent sans de grâds troubles & mouuemens, comme on peult veoir dans les hystoires ; si que ceux là mesmes qui se sont ingerez d'y mettre la main, voire aux tyrâs, n'ont gueres eschappé vne fin malheureuse. Y en eut-il onques dont on se peust plus licitemēt, legitimemēt & impunemēt defaire que de Saul ? Car en premier lieu il estoit reprouué de Dieu, demis du Royaume, degradé de son Sacre & onctiō, & rayé du liure de vie, vn aultre aiāt esté esleu en sa place : en apres, quelles grâdes occasiōs auoit-il donné à Daud, de le hair mortellemēt, & tascher vne fois pour toutes de se véger de tāt d'algarades qu'il luy auoit faites, de tant de peines & traux, d'ēnuys, traueses & fascheries qu'il luy auoit brassées tout le lōg de sō regne : de tāt de torts, indignitez & outrages qu'il en auoit receu, le tout prouenant d'vne grād'felōnie & ingratitude apres en auoir tiré tant de bōs seruices ? Ne l'auoit-il pas banny, chassé & persecuté iusqu'au bout ?

L ij

pourfuiuy sans cefse par tout où il fe cu-
 doit receller & enfuir deuât son indigna-
 tion & furie ? Dressé tant de machina-
 tions & aguects à fa vie , desloyaulment
 contre fa foy & ses promesses ? & neant-
 moins que dit Daud à celui qui à la re-
 quefte mefme dudit Saul luy auoit aidé
 à finer ses iours ; de peur encore qu'il ne
 tombast vif és mains de ses ennemis, dōt
 il eust receu mille opprobres apres fa
 mort ? *Pourquoy n'as-tu craint de mettre la*
main pour tuer l'oinct du Seigneur ? Et là des-
 fus le fit mettre à mort sur le champ. Ce-
 sar fit executer les meurtriers de Pompee
 en Egypte , nonobstant qu'il fust son ca-
 pital & plus redoubtable aduerfaire. Do-
 mitian, vn tresmauuais Prince au reste, &
 des plus iniques , fit mourir Epaphrody-
 tus , pour auoir aidé à Neron à se don-
 ner le coup de la mort , combien que par
 le decret du Senat, & du peuple Romain
 il eust esté déclaré ennemy de la chose
 publique ; & pour tel proscrip̃t & aban-
 donné au premier venu de le massacrer.
 Il y en a assez d'autres exemples , & mef-
 mes en l'escripture Sainte, où il nous est
 expressement defendu de nous bander

contre nos superieurs, & nos maistres. Et plus encore de se reuolter, & prendre les armes cōtre nos Princes souuerains pour quelque occasion que ce soit; ores qu'ils fussent infidelles, & d'aulture religion que la nostre. Car il est asses notoire comme Ieroboam Roy de Samarie auoit delaissé la creance & adoration du vray Dieu, pour se detraquer apres les faulx-dieux, toutefois il ne se trouue point qu'aucun Prophete preschast ny induist le peuple à luy faire la guerre. Il n'y a point d'exception de leur obeir, sinon en cas qu'ils nous voulussent contraindre de quitter nostre religion; car en cest endroit, *il vaut mieux obeir à Dieu qu'aux hommes.* En tout le reste il fault fieschir, & leur estre loyaux & paisibles subiects; & prier pour eux & pour leur conseruation & salut. Nabuchodonosor Ethnique idolatre aiant pris Ierusalē, la raza iusqu'aux fondemēs, desmolit le tēple de Dieu, & le saccagea; renuersa l'autel, pilla les sacrez vaisseaux, & le reste des ornemēs: emmena le Roy Iechonias prisonnier, & les principaux de la synagogue; avec la plus grand'partie du peuple; dont il en contraignit plusieurs.

L iij

d'adorer l'idole qu'il auoit fait dresser: mais tant s'en faut qu'on conspirast pour tout cela contre luy, que Baruch secretaire de Ieremie escriuât au nom des captifs à ceux qui estoient restez en Ierusalē, met cecy. *Priez pour la vie du Roy Nabuchodonosor de Babylone, & pour le Prince Baltazar son fils, afin que leurs iours soient sur la terre, comme les iours du ciel: & que le Seigneur nous donne vertu, & illumine nos yeux, afin que nous viuions sous l'ombre de Nabuchodonosor, Roy de Babylone, & sous l'ombre de Baltazar son fils, & que nous leur seruions plusieurs iours, & trouuions grace deuant eulx.* Le Roy Achab à la persuation de sa femme Iesabel fille du Roy des Sidoniens, payenne, qui luy auoit fait quitter la vraye religiō, cōmit de grandes impietez, fit abattre les saincts Autels, & en dresser d'autres, persecuta mortellemēt les Prophetes & gēs de bien, cōtraints de s'en aller çà & là recellans dās les cauernes & lieux deuoiez où ils ne vīuoient que de quelques racines & morceaux de pain bis cuit sous la cendre, avec vn peu d'eau telle qu'ils la pouuoient auoir biē escharcemēt: fit mourir Naboth pour auoir sa vigne: & pour tout ce-

la, Helie le plus grād & authorisé prophete d'alors, le plus roidde & feruent zeleur de l'hōneur de Dieu, ny pas vn des aultres, exciterēt-ils iamais persōne à sedition ny reuolte contre de si detestables Princes? Irriterent-ils le peuple à leur faire la guerre, ny prendre les armes pour se soubstraire de leur obeissance & fidelité: pour les meurtrir & massacrer, ny rien attenter cōtre leur personne, ou autorité? Y eut-il onques vne plus sceleree & detestable creature que la Iezabel susdite? ce neantmoins qu'en est-il escript. au 4. liure des Rois, 9. Apres sa mort ayant par iuste iugement de Dieu esté mangée des chiens presque toute, Iehu neantmoins commande d'en enseuelir les demeureas, pource, dit là l'escripture, qu'elle estoit fille de Roy: & d'un Roy encore qui estoit Payen idolatre. Tāt doibt estre la dignité royale tousiours par tout, soit à bis, soit à blanc, & de tous respectee. On se cōtenoit de s'enfuir és lieux destornez, pour se garétir de leurs tyrāniques persecutions, & sauuer leurs vies, remettāt la punitiō & vengeance de telles impietez & forfaits à la iuste iustice de Dieu, sans prendre les

L iijj

armes, ny esmouuoir les autres à se rebel-
 ler en faueur d'eux, sous pretexte de de-
 fendre la cause de Dieu, & de maintenir
 la religiō. Isaie fut lié par le milieu, de l'or-
 donnance du Roy Manasses: Ieremie de-
 tenu en trefrigoureuse prison sous Sede-
 chias, par les gouuerneurs de la terre de
 Benjamin. Les trois enfans iettez en la
 fournaise ardēte par le cōmandement du
 Roy Nabuchodonosor: Daniel par deux
 fois en la fosse aux lyons; sous des Roys
 payés; & on ne voit pas qu'ōcques ils aïēt
 nō que maudit & detesté les Princes, Iu-
 ges & Magistrats qui les tormentoiēt de
 la sorte; mais nompas seulemēt mesdit &
 detracté d'eulx. Si donques il n'est point
 loisible de mal parler de son Prince, ny de
 luy souhaitter que tout bien, mesme en sa
 pensee; cōbiē moins le doit-il estre d'at-
 tenter cōtre sa personne? le S A V V E V R
 nous en monstre vn fort bel exēple en S.
 Luc 9. où il rabbroue le souhait de S. Ia-
 ques, & de S. Iehan; & les tãse de ce qu'ils
 demãdoiēt que le feu descēdist du ciel sur
 la ville de Samarie, pour leur y auoir refu-
 sé l'ētree, leur disant, qu'ils ignoroient de
 quel esprit ils estoïēt cōduits. A-il iamais
 presché de s'esleuer contre Cesar & les

Romains , bien qu'idolâtres , qui à tort & sans y auoir aucun droict s'estoient emparez par force d'armes de la Palestine , & tenoient en subiection les Israelites, les priuans de la liberté que Dieu leur auoit conferee sur tous les autres, comme à son peuple privilégié ? Au contraire estant enquis si on debuoit rendre le tribut à l'Empereur , il fit responce ; *Rendez à Cesar ce qui est à Cesar ; & à Dieu ce qui appartient à Dieu.* : Assauoir toute obeissance temporelle aux Princes & Seigneurs terriens ; & à Dieu , ce qui depend de la conscience & de l'ame. Mais , dira quelqu'un , il repugne à ma conscience d'obeir, & de demeurer sous vn Prince d'autre religion que la mienne. Il vous donne cōseil là dessus : Si on vous moleste en vne ville , retirez vous en vne aultre. On ne lit pas qu'ils s'en soiēt iamais voulu garentir par la voye d'armes corporelles ; ny se formaliser & bander à force ouuerte, ny par machinations & pratiques contre les tyrans qui les poursuuoient. S. Paul à son disciple Timothee enseigne de faire prieres pour les Roys & autres Princes & Seigneurs terriens, nonobstant que ceux qui regnoient a-

lors fussent payens & idolatres, voire des plus depravez & cruels. S. Pierre de mesme ordonne aux Eglises d'honorer & respecter les Roys; recognoissât qu'ils sont establis de Dieu, qui veult & commande que toutes personnes soient subiectes aux puissances superieures ; & que quiconque leur resiste , contrevient à son expres commandement ; combien que celuy qui regnoit de son temps fust Neron, le plus sceleré de tous autres : Imitans ces saints personnages là l'exemple, & observans les enhortemens de leur maistre ; qui leur avoit dit seulement, qu'ils se debuoient estimer bienheureux lors qu'on les persecuteroit. S. Paul au vingtsixiesme des Actes appelle bien Agrippa Roy, combien que ce fust vn peruers tyran. Sedechias Roy de Iudah fut repris aigrement pour s'estre departy de l'obeissance du Roy des Chaldeens ; lequel nonobstant qu'idolatre & meschant, est appelé neantmoins le serviteur de Dieu, en Ieremie 25. Et le peuple pour avoir suiuy sa rebellion emmené captif ; là où les Israelites mieux aduisez n'auroient fait difficulté de luy

obeir. Les anciés Prophetes honoroient meſmes les mauuais Roys , trop bien les reprenoient-ils de leurs fautes ; comme Samuel fait Saul ; Nathan David ; Ahias Ieroboam ; Elie Achab. S'ils inuectiuoiét alencontre, c'eſtoit apres leur mort ; mais de leur viuant ils ne ſe ſont iamais ſouſſeuez contr'eux , ains leur ont ſeulement reſiſté par prieres, & en patience, & non par armes. Tertullian en ſon Apologetique ne preſche autre choſe, que de reuerer les Roys & Princes ſouuerains.

M A I S auant que de mettre fin à ce diſcours , veult on voir vn cornucopie des fruiets de ceſte abominable Ligue & cōſpiration ; les monſtres qu'elle a enfantez ; les vermines qu'elle a eſcloſes ; les calamiteuſes peſtes & ruines qui en ſont ſorties ainſi que d'vne autre bouette de Pádore, és principales villes de ce Royaume ; le tout ſi naiſuement exprimé qu'il ne ſeroit pas poſſible de plus , quand bien il auroit eſté ietté en vn meſme moule ? C'eſt vn cas eſtrange , & trop admirable, que tant de choſes ſi conformes les vnes aux autres , ſe ſoient venues rencontrer de plus de huiét cens lieues ,

& de si lōg tēps , comme de pres de deux mille ans. Il se lit , que Marc Antoine le Trium-vir aiant achepté pour iumeaux deux ieunes garçons , qui s'entreressembloient si fort qu'on ne les eust sçeu discerner l'un de l'autre, on luy fit entendre qu'on l'auoit deceu, parce que l'un estoit d'aupres de Millan , & l'autre d'Asie. Surquoy le vendeur appellé, sans s'en estonner autrement, va respōdre, que cela meritoit double prix , estant chose bien plus estrāge & admirable, de veoir deux creatures , ainsi esloignees se ressembler si fort , que si elles estoient sorties d'une mesme ventree. Mais à quel propos alleguer cecy, me pourra l'on dire ; Que pretendez vous de ce compte ? Pour monstrier à l'imitation de cela , qu'il n'est pas si malaisé de trouuer des exemples conformes de cas aduenus en vn mesme peuple, & de temps non plus esloignez , que de six ou sept vingts ans ; comme de les aller requerir de si loing. Certes quand ie considere ce que Thucydide a escrit , de pres de deux mille ans, d'une sedition qui s'estant'esprise à Corfou, s'espandit comme en moins de rien par toute la Grece,

à la bien remarquer de pres, & par le menu en toutes ses particularitez & rencô-
 tres, ie ne cuide pas que deux pieces frap-
 pees d'un mesme coing se peussent si biẽ
 ressembler; Ny vne fidelle glace de cry-
 stal de roche mieux & plus fidellement
 représenter les objets, que ceste descri-
 ption fait nos maux & miseres; Si qu'il
 ne semble pas que ce soit tant vne narra-
 tion de choses veritablement aduenues,
 qu'une prediçtion infallible de ce qui de-
 uoit vne fois aduenir, & si loing de là.
 Car que sçauroit on veoir de pl^r ferme &
 correspondât à nos animositez & querel-
 les; nos rancunes, felonies, & vindiçtes,
 ou plustost enuies & emulations; aux ma-
 chinations & aguets dressez des vns aux
 autres; (des pires aux meilleurs, faut entẽ-
 dre,) aux impostures & calomnies; meur-
 tres, tueries, massacres, assassins, brigand-
 ages & saccagemens; & infinies autres
 telles plus qu'inhumaines & desbordees
 cruautez barbaresques, dont on ne sçau-
 roit trouuer assez de termes propres pour
 les exprimer deuẽment? Il semble certes
 que tous les Alastores; toutes les Erinnes
 & furies infernales; tous les plus perni-

cieux & malins demons coniurez à l'vniuerselle extermination & ruine du genre humain, ayent esté en ces derniers troubles dechesnez, laschez, & hallez sur nous du fonds des enfers, à l'instigatiõ de noz trahistres & perfides seditieux : tous les vents d'Æolus esclargiz hors de leur caverne à la requeste de Iunon pour le naufrage d'Encas, ne firent onques de tels rauages sur la mer Tyrrhenienne. Il n'y aura donc point de mal d'apporter icy mot à mot le lieu susdict de Thucydide au 3. liure pour y confronter les maux & calamitez recentemente aduenues tant és villes qu'au plat pays de ce desolé Estat, selon que chacun de nous les a peu non tant seulement ouyr raconter, mais les voir à l'œil, & les sentir en sa personne, & en ses biens: chacun de nous, puis-ie bien dire, car peu s'en trouuera, des gens de bien, qui en aient esté du tout exemptez. Voycy ce qu'en met Thucydide, à quoy se conforme maistre Alain Charretier, fucil. 35. de la derniere impression.

La commune tenant le party des Atheniens, & les gens d'honneur & de marque, celui des Lacedemoniens ; la sedition s'alluma de sorte à

Corfou, qu'il n'y eut espece d'inhumanité espar-
 gnee, enuers mesmes les plus incouppables &
 exempts de leurs partialitez & factions. Mais
 leurs mutuelles animositez, & rancunes iouoy-
 ent là librement leur ieu, auoc des reciproques
 vengeances, sans aucun respect d'amitié ny de pa-
 rêtage, des plus forts enuers les plus foibles. Tou-
 tes vieilles querelles quelques assoupies qu'elles
 fussent, s'y resuscitoient de nouveau: les endebtez
 s'esuertuoient de s'acquitter tout à une fois alen-
 droit de leurs creanciers; les assassinant ou ils les
 pouuoient rencontrer; & les autres cherchoient
 d'autres occasions & pretextes de respendre in-
 humainement le sang de leurs propres concitoiës;
 le tout sous couleur, qu'on vouloit abolir l'estat
 & autorité populaire. Mais c'est le train &
 accoustumee façon de faire des conuoiteux de
 nouuelletez, de n'estimer pire condition que la
 leur presente, dont ils desirent l'aduenir; & ne
 cessent à ceste fin de brouiller les cartes, & tas-
 cher à renuerser cen dessus dessous toutes cho-
 ses, pour les amener de mutation en mutation
 iusqu'au dernier but. Vraye peste de tous estats
 que ceste maniere de gens; qui sont cause de plus
 de maux en un seul iour, par leurs partiali-
 tez intestines, que toutes les guerres estrange-
 res n'en scauroient apporter en vingt ans.

Et tant que l'engeance pernicieuse de ces turbulents durera, jamais aussi ne manqueront en nulle part de tels accidens que souffrit la Grece pour lors: lesquels ne se peuvent pas si bien introduire par un temps calme, où les hommes ont accoustumé d'auoir la teste mieux faicte, & le cerueau plus posé & rassis; que quand à guise d'une mer agitée de la tourmente, les vagues troublent tellement l'eau, qu'on n'y scauroit rien voir de net; les vagues assauoir esmeues par les soufflemens & deceptiues suscitacions des tempestatifs & mutins; qui sous un faux appast d'esperances vaines ensorcellent bien aysement le commun peuple, & l'attirent dedans les pieges qu'ils leur dressent sous l'apparence de leur donner plus d'autorité & credit au gouuernement des affaires, pour les diuiser qui d'une sorte, qui d'une autre; nommeement les necessiteux, qui preuaient tousiours en nombre sur les riches & gens d'honneur, ausquels naturellement ils portent enuie. Parquoy la guerre, dont le propre est (la guerre à tout le moins ciuile & seditieuse) de charier auecques soy toute confusion & desordre, est trop plus commode à leurs desseins, pour animer l'indigēt populace cōtre les grāds, & se ruer sur ceux qui ont de quoy, en leur suscitant haine & enuie par un soupçō qu'ils se portent

tent

rent mal enuers le Publicq, bien souvent iusques au dernier peril de leurs vies, & de leurs fortunes. Ce qu'on pouuoit donques entendre auoir esté praëtiqüé quelque part de felonnie & cruauté, il n'estoit pas seulement question de l'ensuiure, ains de le surpasser encore par quelque nouvelle inuention & accroissement de toutes sortes d'insolences, & excès extraordinaires, non auparauant praëtiquez, pour monstrier qu'ils en estoient meilleurs maistres, mieux zelez enuers le publicq, & plus soigneux & affectionnez au salut & conseruation de leur Patrie, combien qu'ils n'aspirassent à rien moins qu'à cela. Auoit-on emprisonné quelque part? ils massacroient sans temporiser d'auantage, voire pour le moindre & plus friuole soubsspeçon. Mis en sequestre les biens d'autrui? ils les confisquoient, pilloient, saccageoient sans aultre forme de proces, les appliquans à leur profit particulier, non au fisque, declarans le tout estre de bonne prise. Et tous les desordres qu'ils commettoient, ils se parforgeoient de les pallier & couurir par des mots plus doux, & nouvellement inuentez. Leur effreneete meraire audace, ils l'appelloient vne verte vigueur de courage, excitée de surcrez en eux pour le support & maintenement de la cause,

M

où lon ne se sçauroit par trop ardemment animer contre les machinations de leurs aduersaires, qui taschoient de les supplanter ; mais ces aduersaires estoient ceux qu'ils se propoisoient d'opprimer pour auoir leurs biens , ou qu'ils estimoient debuoir apporter quelque obstacle à leurs complots & monopoles. Au contraire la modestie & meure deliberation , de conseil, ils l'interpretoient pour quelque conspiration couuerte , ou pour vn refroidissement du Zele qu'o deuoit auoir sans aucun respect au party par eux embrassé , dont il falloit que chacun endroit soy sans fleschir prist en main le progres & aduancement. L'indignation , le courroux , felonnie, animosité & vengeance precipitee , ils nommoient cela vne genereuse magnanimité, telle que les braues hommes vrais amateurs de leur Patrie debuoiert porter engrancee au fonds de leurs ames. Estre chauld, bouillant & impetueux hors de toute raison & mesure , estoit vn signe euident d'une feruente affection au salut d'icelle : qui se fust ioué de monstrier en sorte quelconque , de vouloir contrarier tant soit peu au moindre poinct de leurs deliberations & conseils ; ou en diuertir l'exécution, celui là sans s'en enquerir plus auant estoit.

tenu pour tout aueré proditeur, dont il en fault faire sur le champ une punition exemplaire, pour en intimider les autres : ou pour toute grace, le bannir au loing, sans luy permettre de rien emporter de ses biens, de peur qu'il n'en secourust le party contraire ; ny de se retirer nulle part où ils eussent commandement, afin que sa communication & presence n'infectast ceux qui estoient encore entiers. Celui là à qui ces trahistresses desloialles machinations, & ses calomnies succedoient le mieux, estoit tenu pour habile homme, digne & capable d'estre employé aux plus grandes charges. Mais plus expert encore & plus suffisant estoit quiconque par sa dexterité & caultelle scauroit bien supplanter les aultres, fussent-ils mesme de sa faction : & appelloient ce, Iouer au faulx compaignon, & boutte-hors, & couper l'herbe sous le pied ; & prendre le gibbier dont les aultres auoient battu les buissons ; la vraye quint'essence des stratagemmes. Et qui eust voulu se tirer un peu à l'escart de ces forcenees fureurs populaires, c'estoit un trahistre dissimulé, un rieur, un politique, lequel nageoit entre deux eaus attendant le cours du marché : & au rebours, digne d'estre

M ij

extollé par dessus le ciel, qui eust peu descon-
 urir un de ces tieddes, neutres temporiseurs
 espians le succes des affaires, pour le deferer,
 tout respect laissé en arriere d'amitié, d'hospi-
 talité, & de parenté. Mais plus encore meri-
 toit-il s'il en attiroit d'autres à leur cordelle, &
 nommeement qui fussent frappez au mesme
 coing, pour se renforcer tousiours d'avantage:
 & pour cest effect s'assembloient à toutes heu-
 res de costé & d'autre, non pour conseruer
 l'autorité de leurs loix fondamentales établies
 pour le maintenement de l'Estat, mais induits
 & poussez d'avarice & ambition pour tirer
 à eux contre tout droit & equité ce qu'à tout
 euenement debuoit aller au soulagement du
 publ.cq. Que si par fois il aduenoit, bien que ra-
 rement, qu'en tel endroit ils s'entregardassent ie
 ne sçay quelle ombre de bonne-foy, ce n'estoit pas
 pour aucun respect de religion ny de conscience,
 ains pour se maintenir en ceste pestifere conta-
 gion de seditions, & y auoir plus de coadiu-
 teurs & complices, attendans à se soubdsi-
 uiser puis apres, & se redemander com-
 pte & raison des torts respectiuelement pre-
 tendus, quand ils seroient venus à bout de
 leurs contraires, ou plustost d'eux mesmes. Qui-
 conque eust fait la moindre demonstration ou

semblant de deplorer les presentes calamitez : si aucune parole luy fust eschappee tendant à la pacification de leurs troubles , cela n'en estoit pas receu comme prouenant de quelque charitable zele enuers sa Patrie , mais interpreté pour autant de desloyauté & conspiration alencontre, qui se couuoit sous cest hypocrite pretexte. Tout le reste alloit de mesme , s'il ne resultoit selon leurs passionnez desirs , ou au particulier remplissage & assoupissement de leurs bourses. Et auoient plus cher qu'on les outrageast , afin d'en pretendre quelque interest pour s'en reuanger au decuple , que de demeurer en paix & repos , exempts d'iniures & de riottes. De mauoir propos pour traicter d'accord , c'estoit un crime capital plus que de leze maiesté diuine & humaine. Et au reste quelque serment, quelques promesses solennelles qui se prestassent, cela n'auoit lieu que tant qu'ils vouloient, s'en dispensans à toutes heures qu'il leur plaisoit , car tous leurs desseins ne tendoient qu'à circonuentions & surprises ; & leur estoit plus agreable d'y proceder en trahison , & de guet à pends , s'ils s'apperceuoient qu'on se tinst moins soigneusement sur ses gardes sous la confiance de la foy donnee , que nō pas le droit-fil, & à ieu descouuert , tant pource qu'il leur sem-

bloit plus expedient , & moins dangereux d'y aller ainsi à l'emblee , que pour paroistre plus accorts , puis qu'ils estoient ainsi bons maistres de toute fraude & tromperie ; attendu qu'il est plus aisé aux malins , dont le nombre tousiours preuault , de decenoir³ , qu'aux gens de bien de se garder. Toutes lesquelles obliquitez ne dependoient que d'un desir desmesure d'empietter les biens d'autrui ; & de preceller en honneur , dignitez , & preeminences leurs concitoiens , plus dignes d'y estre aduancez qu'ils n'estoient ; qui fut la principale amorse d'y en attirer si grand nombre ; les chefs de party en leurs factions s'armans qui d'un pretexte , qui d'un aultre ; mais en apparence , comme ils le monstroient , non à aultre fin que pour mettre le gouuernement sous l'autorité populaire ; & en priuer les gens d'honneur & de qualité : tousiours prompts au reste de continuer leurs vindiçtes sur ceux qu'ils soubz-peçonnoient se debuoir opposer à leurs attentats , tant qu'ils les eussent defaits & exterminiez. Si grandes estoient leurs animositez & rancunes , qu'elles ne pouuoient estre briddees ne retenues d'aucune consideration ne respect , fust de religion , fust du lyen de la societé humaine ; ains qui conque les sçauoit violer plus impudemment ;

estoit tenu pour le plus braue & galland homme. Voila comment à l'occasion de ces partialitez & discords suruenus entre les habitans de Corfou, toute la Grece s'entacha en bien peu de iours de semblables combustions, ou la simplicité & candeur, dont les magnanimes courages participent tousiours plus que les desloyaux, estoient en derision à tous ; & rien ne se practiquoit en leurs deliberations & conceils, qu'une tricherie & cautelle, comme transcendantes toutes les aultres facultez de l'ame ; si que pour la defiance qu'ils s'entreportoient, craignans à tous propos d'estre surpris, comme s'ils n'eussent tasché qu'à surprendre, la plus part du temps les pl^s timides & grossiers l'éportoient par dessus les plus habiles & hazardeux : parce que reconnoissans leur default, & mesurans l'imbecille portee de leur esprit contre les ruzes & finesse de leurs opposez, ils auoient peur de se laisser endormir & enuelopper à leur babil & eloquence ; & pourtant se tenoient plus soigneusement sur leur gardes : là où les autres se rassourans trop sur leur preuoiance & cautelle, qui pourroient aiseement esuenter de loing les aguets qu'on leur dresseroit, & en cuidant les preuenir par une contre-ruze dressée alencontre, ne se donnoient garde qu'ils s'en alloient à eux clasengager dedās.

M iij

TOUTES ces choses, & plusieurs autres du même propos, parcourt Thucydide au lieu allegué; dōt il en reitere plusieurs fois vne même, les desguisant en diuerſes ſortes, pour touſiours no^r mieux imprimer & remettre deuant les yeux quelle eſpouuentable chimere, quel hideux monſtre ce nous doit eſtre qu'une contention domeſtique. Bel admonneſtement certes pour nous rendre ſages aux deſpens d'autrui, ou pluſtoſt aux noſtres; & mettre fin quelquefois à nos diuiſions & querelles; qui nous ont apporté iuſqu'icy tant de pauuretez & miſeres; pluſtoſt que de nous opiniaſtrer d'auantage à nous paracheuer du tout, ſans ſçauoir pourquoy; nous conformans en ceſt endroit au dire d'Horace, qui diſcours ainſi de ſemblables partialitez.

*Iam ſatis terris niuis, atque dira
Grandinis miſit pater; & rubente
Dextera ſacras iaculatus arceis
Terruit urbem.*

OR comme ſelon Polybe liure prem. il y ait deux voyes & moiens propoſez aux hommes, pour facilement ſ'amander, l'un par les calamitez & deſaſtres qui leur

aduiennent ; & le second par les exemples de ceux des autres ; le premier sans doute sera toujours plus preignant , & plus d'efficace, mais aussi non sans le detrimement de ceux qui le souffrent. Et l'autre, encore qu'il n'ait pas tant de force & vigueur, comme ne nous touchant pas de si pres, est neantmoins à preferer ; d'autant qu'il est exempt pour nostre regard , qui n'en sommes que spectateurs , de tout preiudice & dommage ; de maniere qu'il n'y a personne qui n'ayme mieux choisir ce dernier ; à cause que par le moyen d'iceluy , il est loysible à vn chacun de discerner ce qui luy duist , ou est contraire, sans courir pour cela fortune. Et pourtant à qui le voudra bien considerer, l'experience qui se tire du faict des autres, est l'exemplaire le plus propre que l'on se puisse proposer pour reigler ses actions & manieres de proceder : Car c'est cela seul qui sans perte aucune nous peut rendre iuges capables du vray chemin qu'on doit tenir.

DE CE QVIA esté amené cy dessus on peult voir, combien difforme & horrible est, non qu'à l'esprouer, mais à l'ouyr ra-

compter seulement, vne partialité intesti-
ne, le feu qui deuora interieurement Na-
dab, & Abiu , au 2. du Leuitique) que
Platon au premier des loix dit estre la pi-
re peste de toutes autres. Et au 5. de sa Re-
publique; *la dissention qui est entre les dome-
stiques & procheparens se doit appeller sedition,
& contre des ennemis estrangers, guerre* : mais
il n'y a point de parenté plus proche, ny
de plus estroitte alliance, que de mesmes
concitoyés, d'une mesme langue & pays,
uiués sous l'obeissance d'un mesme Prin-
ce, sous de mesmes loix & coustumes : Si
qu'à vray dire ce sont tous freres, ou pour
le moins le doyuent estre, comme enfans
qu'ils sont d'un mesme pere , qui est le
souuerain magistrat. *Trop inhumain & sans
iustice*, (dit Homere au 9. de l'Iliade,) *sans
feu sans lieu est celuy-là, --- qui ayme la guerre
intestine; vraye peste ruinant tout.* Mais le pis
encore est en ces partialitez domestiques
d'appeller vn tiers , redoutable à l'une &
l'autre des deux parties , s'il est plus fort.
Les Gaulois iadis sçeuient bien à quoy
s'en tenir, quand ils introduirent à la de-
cision de leurs querelles , les vns les Ro-
mains ; & les autres les Allemans ; ce

qui fut cause de leur subuersion & ruine. C'est l'Apologue qui se raconte du Loup, & du Renard ; lesquels ne se sentans pas assez forts pour forcer les soigneux, & vigilans corps de garde que faisoient iour & nuict les fides chens autour des troupeaux & estableries, s'aduiferent d'appeller à leur ayde & renfort l'once & le liepard, qui de vray vindrent bien tost à bout des chiens, mais ils n'espargnerent pas nom plus puis apres le Renard ny le Loup, dont les peaux leur demeurerent pour les gages; & si s'emparerent par mesme moyen de la proye où ils pretendoient.

O R laissons ces fables à part ; & reuenons à Thucydide, lequel nous propose vn autre exemple au 4. liure, dont il ne s'en sçauroit trouuer nulle part de plus conforme à ce propos de se preualoir d'vne ayde estrangere en ses diuisions intestines. Le feu (met-il là,) qui s'estoit allumé à Corfou, s'espādit non tant seulement en la Grece, mais passa la mer iusqu'en la Sicile, & en cest endroit de la terre ferme de l'Italie qu'on appelloit les Brutiés,

& la grand-Grece, maintenant la Pouille & Calabre; qui à l'imitation des autres s'estans bandez en deux partialitez & factions; la commune assauoir, souffreteuse pour la pluspart, cōtre les Nobles & opulents; ceux-cy appellerēt les Lacedemoniens à leur ayde, avec lesquels ils conuenoient mieux, par ce que l'Estat de Lacedemone estoit lors regy & administré sous vne forme de Monarchie: & le commun peuple suscitē des mutins & seditieux, fit venir les Atheniens, qui viuoient en Democratie & Republique populaire: mais ils ne tarderent gueres à s'appercevoir, combien c'est chose perilleuse de recourir aux Estrangers pour le support de ses querelles; & quels dangereux accidents cela a accoustumé d'apporter: ce que certain Syracusain homme eloquent, & de grand affaire, nommé Hermocrate, leur remonstre & fait voir à l'œil en ces termes. *IE NE SVIS PAS Seigneurs Siciliens, icy venu pour vous haranguer, comme estant d'une des moindres & plus foibles citez de ceste Isle; ne des plus trauaillees de la guerre; mais pour vous proposer ce que ie connoistray estre le plus propre pour le bien & sa-*

lut de tous. Au surplus combien c'est chose malaisée, & ennuyeuse quant & quant, de faire vne telle guerre, & quels griefs traux, & molestes elle a accoustumé d'apporter, qu'est-il besoin de s'y estendre plus auant, à l'endroit de ceux principalement qui le sçauent trop mieux que nuls autres? Attendu qu'il n'y a personne, qui par faute de cognoistre ce que c'en est, s'y vueille embarquer de force & contraincte; ny d'ailleurs que s'il y pense profiter s'en retire, de peur du mal qui luy en pourroit arriuer. Car on voit par experience que la pluspart du temps ceux qui l'entreprennent, en attendent plus de profit qu'ils n'y apperçoient d'incommodité & dommage: si qu'ils ayment mieux se soumettre au hazard des dangers futurs, que de demeurer exposez à la perte qu'ils s'en pourroient représenter pour l'heure. Or d'autant que les vns n'yles autres, ne procedent point comme ils doyent, ny en vne saison conuenable, neantmoins de les exhorter à vne reconciliation & concorde, ne leur peut sinon grandement profiter; & spécialement à ceste heure plus que iamais, où nous pourrons en effect cognoistre le bien qui nous prouiendra d'obtemperer à la raison. Car iusques icy on a pris les armes pour pouruoir chacun à ses particuliers affaires, & en tirer quelque emolument en priué; mais maintenant

que nous nous sommes embarquez (mal à propos certes) en ces altercations & débats, nous devons chercher de r'entrer en la paix & repos où nous sou lions estre: car tout à t'emps pourrons nous retourner cy apres à nous guerroyer, si lon se deut que chacun n'aye ce qui luy faut. Et devons entendre que si nous sommes bien conseillez, ceste assemblee ne sera pas faiçte pour y debattre chacun son droict; ny pour aduiser de pourueoir à nostre particulier interest, ains si nous pourrons, & comment, exempter la Sicile des machinatiōs & aguets des Atheniens; qui ne taschent que par le moyen de nos mutuelles discordes de nous subinguer & assubieçtir; de maniere qu'ils ont continuellement l'œil au guet pour espier ce que nous voudriōs deuenir. Dōt ils noas faut croire, qu'eux estā les plus puis sās de toute la Grece, sous pre texte de moyenner nostre reconciliation & accord, ou plustost de nous diuiser tousiours d'auantage, nous rendans les superieurs l'un de l'autre, combien que pas vn des deux ne soit le but où ils visent. Ils sont venus en ces quartiers avec vn petit nombre de vaisseaux pour obseruer les erreurs que nous commettrons: afin que sous le tiltre & apparence de bons & fidelles associez ils se declarent puis apres ennemis tout à descouuert contrel'vn & l'autre des deux partis, selon qu'ils

verront estre le plus à propos pour le profit de leurs affaires. Si donques nous sommes si mal aduisez, que de choisir plustost la guerre que la paix ; & d'appeller à nostre renfort & secours ces gens-là, qui d'eux mesmes sans les y semondre ne viennent que trop volontiers ; apres que nous nous serons bien entrebattus, affoiblis, & reduits au bas, il ne faut doubter qu'eux embrassans lors la commodité que nous mesmes leur en aurons apprestee, ne nous viennent donner à dos avec vne trop plus grosse puissance, pour nous reduire sous leur dur ioug : car ils n'ont rien deuant les yeux, ny plus à cœur & estroicte recommandation que l'aggrandissement de leur Estat, ou leur desmesuree ambition ne met point de bornes. Et certes si nous voyons clair, & qu'eussions la teste bien faite, il seroit plus expedient à chacun de nous de se r'allier & vnir, pour nous ietter sur les possessions des autres, que d'appeller des estrangers à l'adissipation des nostres ; & nous seconder à nous entreruiner & destruire, pour leur faire vne planche à venir empieter puis apres nostre ancien heritage. Il nous vaudroit donques mieux, veu-ie dire, nous soubsmettre à toutes les incommoditez, qui nous en pourroient menacer pour l'heure presente, & relascher chacun du nostre, que d'attendre subsequemment, vne finale

euerſion toute aperte, des vns & des autres, tât
 au general de l'Eſtat, qu'en nos fortunes particu-
 lieres; faiſant noſtre compte que ces ſeditions &
 partialitez domeſtiques embrasées ainſi parmy
 nous, ne ſont point ſeulement preiudiciables à ce-
 ſtuy-cy, ny celui-là, ains treſque pernicieuſes, &
 plus que mortelles à tout le corps vniuerſel de ce-
 ſte Iſle; dont les citez, villes & Prouinces ſont
 les membres & parties coſtitutiues, ſi que le tout
 bien peſé & conſideré, nous debuons au pluſtoſt
 nous reconcilier enſemble, à fin que d'un commun
 accord vnis & ralliez les vns aux autres, nous
 puiſſions deliurer la Sicile de l'euident peril où elle
 eſt reduitte; ſans auoir eſgard que les Doriens, dōt
 nos anceſtres ſont iſſus, ayent touſiours eſté enne-
 mis des Atheniens; ny que les Chalcidiens à cau-
 ſe de l'alliance & affinité qu'ils ont avec les Io-
 niens, leur ſoient bien affectionnez & fidelles.
 Car ce n'eſt pas ce qui nous doit tant mouuoir,
 qu'une autre conſideration plus pregnante; Que
 les Atheniens ne ſe bandent pas ainſi animeuſe-
 ment contre aucuns de nous pour les autres, tant
 en haine & deteſtation du party qu'ils tiennent,
 que pour la conuoitiſe qu'ils ont de s'emparer in-
 differemment des biens de tous les deux coſtez;
 ſelon que l'ont peu eſſrouuer ceux qui les ont vou-
 lu appeller à la deſſence & protection de leur
 cauſe,

cause ; lesquels n'en ont receu moins de dommage, que ceux contre qui en apparence ils estoient venus. Car n'aians onques auparauant eu aucune amitié, accointance ny confederation avec nous ; ny plus grande obligation aux vns qu'aux aultres ; ils nous ont de gayeté de cœur offert leur secours trop plus liberalement qu'on ne les en eust sceu requerir. Mais ie le leur pardonne, puis qu'ils n'ont autre but en leurs secretes intentions, que leur proffit particulier, où l'esguille de leur quadran est du tout tournée, sans se soucier aux despens de qui. Et ne blasme en eux le desir qu'ils ont de regner, & de commander sur les autres, ains plustost ceux qui sont si simples & mal-aduisez de les croire si aiseement ; & se ietter entre leurs bras, qui est à dire en bon langage se soubmettre à leur seruitude. Mais comme ce soit chose naturelle à chacun de vouloir dominer, sur ceux là mesmement qui de leur bon gré s'y presentent ; aussi est ce le propre de l'homme de se defendre & reuanger, pour se garentir des iniures qu'on luy voudroit faire. Et quiconque de nous cognoissant cela, ne iuge que ce que nous debuons auoir plus en affection est de pacifier au plustost, & esteindre ce qui nous seroit redoutable en cōmun à tous, se mescompte.

N

trop lourdement ; car si une fois nous sommes d'accord , nous serons quant & quant hors de ceste crainte , d'autant que les Atheniens ne nous enuahissent pas des forces ny des moiens qu'ils tirent de leur pais , mais des nostres propres , qui les aians appelez à nostre secours, leur administrons ce qu'il faut, non pour nous aider , mais ruiner. La guerre au'reste ne se pacifiera pas par la guerre , là où nos discords se pourront bien facilement terminer par une reconciliation & concorde : & ceux que nous auions de bonne foy appelez à nostre aide , pensans bien faire , pour s'y estre si malignement comportez seront contrainsts dans peu de iours de quicter la place , & vuidder tout à faiçt d'icy , s'en retornans avec leur courte honte , sans auoir peu rien obtenir de ce qu'ils pretendoient y faire. Cela certes entant que touche ces estrangiers , se trouuera auoir esté tresque-sagement aduisé , & fort à propos pour ceux qui auront le conseil salubre deuant les yeux pour la conseruation du publicq. Et pour le regard de la paix , que tous unanimement aduouent estre si necessaire & desirable , comment se pourroit-il faire qu'elle ne se deust moietenner entre nous ? faites vostre compte qu'à quiconque de

nous, soient que les choses aient heureusement succédé iusqu'icy, soit au rebours, & tout au contraire de leurs desirs & esperances, le repos & la paix neantmoins seront tousiours plus necessaires, que nompas la guerre; à ce que les uns & les autres posans les armes & leurs rancunes, nous puissions conseruer le nostre en une tranquillité asscuree, & ioir en seureté de nos biens, hors de toute crainte & danger, par le benefice de ceste paix; ensemble des honneurs, charges & administrations publiques, & de tous aultres tels aduantages consequemant qu'on vous scauroit représenter par un long eloquent narré; & parcourir à l'opposite les meschefs & inconueniens que nous deuons attendre de la guerre. Toutes lesquelles choses bien considerees, vous ne debuez pas mettre à nonchalloit ces remonstrances, ains plustost un chacun de vous endroit soy aduiser d'en pouuoir cueillir quelque fruit pour vostre salut & conseruation. Que si aucun se propose de tirer profit à tort ou à droit de ceste seditieuse hostilité, qu'il ne s'en assure pas tant toutefois, que par mesme moien il ne craigne d'estre frustré de ses attentes: car on scait assez estre aduenu à plusieurs, que pour se sentir appuiez de quelques forces & supports, s'estans

voulons tendre & roiddir à la vengeance , ou certaine conuoitise de s'aggrandir , & d'accroistre leurs moiens & leurs facultez , ny l'un ny l'autre ne leur est point heureusement succédé , ains tout le rebours ; si que les uns ont couru un tresgrand danger de leurs vies , & les autres perdu le leur propre. Car nonobstant que la vengeance qu'ils se proposoient fust aucunement raisonnable , pour auoir receu quelque oultrage , ce n'est pas à dire pourtant qu'elle doibue tousiours succeder : ny les forces où l'on s'attend ne sont pas nomplus une chose du tout si certaine , quelque apparence qu'il y ait , qu'on s'y doibue trop asseurer ; parce que la pluspart du temps l'incertitude y domine , & se monstre estre la maistresse ; laquelle encore que ce soit une des plus dangereuses & deceptiues choses de toutes autres , ne laisse pas neantmoins de nous estre par fois profitable : car quand le doubte vient à se mi-partir tant aux assaillans comme aux assaillies , cela les retient , & les admonneste d'aller plus discrettement en besongne , & avec moins de temerité & orgueil. Parquoy il est besoin de nous y confirmer , tant pour la crainte de l'aduenir qui nous est du tout incogneu , qu'à raison des Atheniens à nous

deormais par trop suspects & redoutables : si que faisans nostre compte que ce que chacun de nous s'attendoit d'obtenir en particulier, luy pourra estre entrerompue par ces deux empeschemens dessusdits , licentions à la bonne heure , & nous defaisons de cest ennemy pallié , que nous sentons si onereux à nos espaulles , & qui sous pretexte de nous secourir , n'aspire en ses interieures conceptions qu'à nous subinguer , & s'emparer de tout le nostre : contractans avant toutes choses une perpetuelle reconciliation entre nous; pour le moins arrestons des trefues pour un long temps , & remettons la reparation de nos torts , iniures & offenses reciproques, à une autre saison qui pourra estre plus oportune. Tenez au reste pour une chose indubitable , que si vous voulez adiouster foy à mes paroles , chacun de nous aura sa cité franche & libre , tellement qu'il sera en nostre pouuoir de rendre à ceux qui nous auront fait bien ou mal, la recompence de leurs dessertes. Que si vous ne me voulez croire , ains auez plus cher de vous ietter à corps perdu entre les bras de ces desloyaux estrangers , il ne sera pas alors question de nous venger les uns des autres. Et

N iij

des autres. Et quand bien les choses reüssiroient à plein-souhait, il nous conuiendra par necessité estre amis de ceux qui nous sont mortels aduersaires, & par consequant ennemis de ceux que nous deburions hair le moins. De moy, comme ie vous ay dit du commencement, ie suis d'une ville la plus puissante de ceste isle, & qui au lieu de ce que les autres sont contrainsts de se retenir sur la deffensue, peult, & a le moien d'assaillir, parquoy nous auons moins à craindre : ce neantmoins ie vous conseille, prie & exhorte, qu'à l'aduenir pouruoians mieuX à nostre faict que par le passé, nous nous accordions par ensemble, & vueillons mettre sous le pied nos vieilles hargnes & rancunes, sans nous laisser si auenglement transporter d'un felon desir de vindicte, qu'en cuiddant faire du mal aux autres, nous ne nous en faisons plus à nousmesmes : & ne soions si forcenez par nos contentions intestines, que nous nous persuadions d'estre les maistres de nos proieets, & de regenter la fortune, a qui les hommes ne commandent pas comme ils veulent, ains c'est elle qui leur donne la loy, & domine leurs entreprises. Mais selon que la raison & le droit

voudront que nous soyons les superieurs de nos contraires, ou que nous flechissions sous eux; supportons pluſtoſt cela les vns des autres, que de l'endurer de nos plus inueterex ennemis. Car ce ne nous ſera pas choſe honteuſe ne diſorme, qu'un Dorien ſoit ſurmonté d'un Dorien; ou un Chalcidië d'un Chalcidië, puis que nous ſômes tous voiſins & habitâs d'une meſme Iſle, portâs to^u le n^o de Siciliâs; leſquels viendront touſiours à temps de ſ'entreguerroyer les vns les autres, lors qu'il ſera plus à propos; puis nous nous rappointerons de rechef, quand nous y aurons bien penſé en nous meſmes. Mais les Eſtrangers qui ſ'attendent de venir icy comme aux nopces Franches, ſi nous ſommes ſi ſages que nous deuons eſtre, & nous reſengeons tous d'un meſme accord pour les repoulſer hors de nos limites, n'y croupiront pas longuement: car ſi on vient faire quelques torts & violences à aucuns de nous, bien que ce ſoit ſeparement, le general ne laiſſe pas de ſ'en ſentir incommodé, & courir la meſme fortune. N'appellons doncq plus cy apres ces Eſtrangers à deſembrouiller nos querelles, ny pour nous rappointer enſemble, car nous en viendrons bien à bout ſans eux: Ce faiſant, nous ne deſſraulderons poinct la Sicille de deux gran-

N iiij

des commoditez ; l'une toute prompte & presente de la delivrer de la guerre qui la talonne de la part des Atheniens ; & par mesme moyen de l'interieure & civile aduenir ; & que nous la possederons desormais libre & exempte des machinations & aguets, que nos aduersaires luy brassent. AINSI parla Hermocrates ; a la suasion duquel les Siciliens s'accorderent.

IVSQVESICY Thucydide. Enquoy on peut voir la conformité des affaires du temps d'alors avecques ceux de maintenant, quelque longue distance de temps, & de lieux qu'il y ait de l'un à l'autre : & plusieurs beaux admonnestemens & remonstrances tressalutaires y entremeslees, qui nous redresseroient bien facilement dans le bon chemin, si nous y voulions tant soit peu tendre l'œil, & prester l'oreille. Car changez seulement Sicile pour France, & les Atheniens en Espagnols, seroit-il possible de rien veoir au reste de plus semblable ; ne qui s'y peust rapporter mieux ? Ce seroit au demeu tant faire tort à l'industriuse recherche des bōs esprits, de leur vouloir icy tracer yne adaptation de cela, car oultre ce

que le tout est assez clair de foy, il est bien raisonnable de le leur remettre pour s'y exercer , & y mediter plusieurs beaux traiçts correspondans les vns aux autres. Que cela demeure donc à leurs beaux discours. Trop bien nous pouuons nous icy emanciper à dire ; & cecy sera la conclusion; qu'il se faut attendre que ces aduersaires , non tant de nous que du Publicq, & de leur Patrie ; voire s'ils le sçauoiēt considerer, d'eux mesmes plus que des autres ; car en cuidans prochasser la ruine de cest Estat , c'est la leur qu'ils ont prochassée; cognoistront en fin, s'ils s'y aheurtenant plus auant , & se rendurcissent en leurs obstinees rebellions, que leurs assistans & fauteurs, quelques cauts & maddrez qu'ils soient, auront eu affaire à d'aussi fins qu'eux: & que de toutes leurs trames & menees ils n'auront aduancé autre chose, que vuidier inutilement leurs bourses, se dessaisir de leurs moyens ; encourir l'indignation de Dieu, qui deteste la mauuaise foy, le barat & la tricherie, voyant clair iusqu'au dedans de leurs pēses; la malvueillance de tout le monde; la haine & abomination des leurs pro-

pres, pour leur auoir leur temerité esté cause de tant de preiudices & dommages; la mocquerie & derision d'un chacun, qui leur morguent vn pan de nez: & pour le dernier mets endurcir & armer ce peuple trop plongé en ses aydes, & voluptez, à leur confusion & ruine, si qu'en eux se fera verifié l'ancien Prouerbe, *que le pernicleux conseil ne faut gueres de retomber sur la teste de ceux qui le donnent.* Car le conseil estant chose tressacré sainte, comme disoit Epicharmus; si on le prophane, & qu'on en abuse, cela touche à Dieu de s'en ressentir. Nous voyõs comme tous ceux qui à Athenes furent les Autheurs & executeurs de ceste entreprise de la Sicile, finirent mal; car Lamachus & Nicias les deux principaux Capitaines & conducteurs, y demeurèrent pour les gages: & Alcibiades qui gaigna au pied de bonne heure, nonobstant que ces trois eussent accepté ceste charge, en leur corps deffendant, & contraints à ce de fine force par le peuple, fut tousiours en perpetuel desastre, & mourut en fin malheureusemēt. En semblable, & à meilleure raison encore, c'est accariastre de Domp Bernardin de Mendoce l'un des

principaux persōnages de ceste tragedie; lequel durant le siege proposa de faire moudre les ossemens de S. Innocent, plustost que de venir a aucune composition; le Commandeur Moree son adextrāt, & leurs cōplices: ie me veux taire du Duc de Parme, Prince valeureux à la verité, & qui infinies fois a detesté & maudit ceste inique temeraire entreprise: mais qu'elle recompence a il eue à la fin de ses tant signalez seruices, personne ne l'ignore point, Je me tairay aussi des nōstres, pour ne reueler d'auantage nostre vergongne & infamie; ioinct que chacun a peu veoir l'issue de la plus grand' part; & qu'on peut iuger ce qu'on doit esperer du reste, de ceux au moins qui ne se voudront recognoistre; car de la grace & benignité de nostre tresbon valeureux & clemēt Roy, la porte de sa misericorde est ouuerte à tous ceux qui ne voudront acheuer de se perdre; ce qui ne leur peult à la fin manquer; parce que Dieu qui est la Iustice mesme, ne voudra laisser impunie vne telle perfidie & meschanceté; qu'ils ont voulu courir & armer de sa cause, comme s'il estoit ignorāt de nos secretes & pallices conceptions: mais il voit tout & iuge tout par vne prouidēce infallible;

& ramene en fin toutes choses au poinct
ou elles doyent estre , nonobstant tous
les efforts , entreprises & astuces de ses
creatures: comme l'a sçeu fort biẽ remar-
quer Euripide en ces tant beaux & do-
rez vers de sa Tragedie de la Medee, alle-
guez de plusieurs excellens Autheurs.

*Fort rarement ce qu'on desire
Vient au succez ou l'on aspire;
Ains arrive le plus souvent
Ce qu'on ne voudroit nullement:
Mais Dieu à tout trouve une issue.*

F I N.

Condiciu aye pite de mor
se uenue de soner pour
la morde nous moie nnon
nosre sinter qrae nnon
et nous uenue (ben nist fof
dout moute sam son mis com
nostre bonst aye aye aye
Conte d'itue d'itue d'itue que
dout aye aye aye aye aye
aye aye aye aye aye aye

Condiciu aye pite de mor
a me de uenue aye aye aye
la morde nous moie nnon
nosre sinter qrae nnon
et nous uenue (ben nist fof

Handwritten text in a cursive script, likely a letter or document. The text is written in a dark ink on a light background. The first line is the most legible and appears to be a salutation or address.

Handwritten text in a cursive script, likely a letter or document. The text is written in a dark ink on a light background. The first line is the most legible and appears to be a salutation or address.

Handwritten text in a cursive script, likely a letter or document. The text is written in a dark ink on a light background. The first line is the most legible and appears to be a salutation or address.

